

Pexanialivaisi Jesucristo pelivaisi, San Marcos peyaquinaelivaisi

**Pacuenia Juan jivibautisabinë jivi livaisi tsipaeba petusato nacuata
yabara pelivaisi**

(Mt 3.1-12; Lc 3.1-9, 15-17; Jn 1.19-25)

1 ¹ Mara pacuenia taxuxuaba pexanialivaisi, Jesucristo Dioso pexënato pelivaisije.

² Bajayata Diosojumepaebinëmi, profeta Isaíaspijinë, tajëvelia yaquina Dioso pejumaitisijava pexënatojavabelia. Dioso jumaitsi pexënatojavabelia mapacueniaje:

Itorobianajë nevajënaeyabelia tanejumelivaisipaebinënexa.

Catsivajënaexanebijitsia nijanamuto. ³ Nexata tanejumelivaisipaebinë vavajai tsane petusato nacuata. Jumaitsi tsane jivijavabelia:

“Jivi baxaneba panamutoverena najetarucaejitsia petuxanenë.

Batoroviaexananua namuto. Bajara pijinia pacuenia paxamë ata

panajamatabëcuenexaniavaere pepo petuxanenë pepatsivajënaeya

paxamëjavaberena,” jai tsane tanejumelivaisipaebinë xamë yabara,

jai bajayata tajëvelia Dioso pexënatojavabelia pejumaitisijava Juan jivibautisabinë jivijavabelia Dioso pejumelivaisi petsipaebanajetarucajavanexa yabara.

⁴ Bajaraxuata nexata Juan jivibautisabinë Dioso pejumelivaisipaebinë najetaruca petusato nacuajava Jesús pevajënaeya. Juan jivijavabelia jumai tsaponae mapacueniaje:

—Pacopabare pibisiacuene paneexanabiabijava.

Panajamatabëcuenepënëyorore Diosojavabelia. Bajaraxuacujinae pacabautisabianatsi. Nexata Dioso pacavecuaajibiaexanaena panijaneconimi, jai tsaponae Juan jivijavabelia.

⁵ Nexata ayaibitsaëtoخانeto Judea nacuapijivi, Jerusalén tomarapijivinua, muxunaponabiabatsi Juan petsipaebilivaisi

penamuxunaevetabibinexatsi. Nexata bajarapamonae pibisiacuene pexanaejavami, roviaalia Diosojavabelia navecuapaebapona. Bajaraxuacujinae Juan bautisabapona bajarapamonae Jordán meneta.

⁶Juan naxatata camellonata pexanaejava. Naepacëta cuerobocoto. Pexaejava ëbosesa, jabëra yajava. ⁷Juan Jesús pelivaisi jivi tsipaebapona. Jumai tsaponae tajëvelia Jesús yabara:

—Tacovëverena patsiana itsanë. Bajaraponë daxitacuene pexanaenexa pecaëjëpaenëtsi tsane. Xanë raja saya beveliajamatabëcuenenënë bajaronëvecua. Nexata vecuaauranë bajaraponë bepíjajivitonënë tanataenexa. Nexata auranë píjazapato ata tataxujonotsinexa. ⁸Xanë raja saya pacabautisabatsi merata. Ponë rajane xanëcujinae patsiana, bajaraponë pacatsijamatabëjoneyaexanaponaena Espíritu Santo, jai tsaponae Juan jivíjavabelia Jesús yabara tajëvelia pevajunupaebíjavata Jesús penajetarucaejavanexa.

Pacuenia Juan bautisaba Jesús yabara pelivaisi

(Mt. 3.13-17; Lc 3.21-22)

⁹Jesús najetaruca Nazaret tomaraverena, Galilea nacuata peecae-tomaraverena. Nexata Juan bautisaba Jesús Jordán meneta. ¹⁰Jesús pebautisabicujinaetsi menevetsina penonotajunaejavata, tane itaboxo penapatsíjava. Bajarajota Jesús tane Espíritu Santo ata perunaejavatsica pematatsënëatsica beucucuto. ¹¹Jesús jumetanenua athëbëvetsica Dioso pejumaitsíjavatsi: “Xamë raja taxënatomë, bitso tacaasivanë. Bitso casivajamatabëcuenebarëyatsi,” pejaijavatsi.

Pacuenia Jesús jamatabëcuenejëbatsi dovathi yabara pelivaisi

(Mt 4.1-11; Lc 4.1-13)

¹²Jesús Juan pebautisabicujinaetsi, bepíjiayo Espíritu Santo ponaeyaxanatsi petusato nacuayabelia. ¹³Bajarajotalia daxitacueneviria unupíjivi jinavanapa. Nexata bajarajota Jesús ponapona, caenë, cuarenta pamatacabibeje. Bajarapamatacabianëta dovathi picani Jesús jamatabëcuenejëbatsi pibisiacuene pexanaenexa. Bajaraxuacujinae ángelevi runaica Jesús peyavenonaenexatsi.

Pacuenia Jesús Galilea nacuata taxuxuaba Dioso pitorobilivaisi jivi petsipaebíjava yabara pelivaisi

(Mt 12.12-17; Lc 4.14-15)

¹⁴Juan penaneconitsiaexanaenexatsi vajabitsaë vaetabatsi. Nexata penaneconitsivi pejebabiabibota Juan naneconitsiaponapona. Nexata abaxë Juan penaneconitsivi pejebabiabibota itsa ponapona, Jesús najetaruca Galilea nacuajavaberena. Jesús jivi tsipaebaponarena pexanialivaisi. Tsipaebaponarena daxita Dioso píjajivi pevetsíjavanexa. ¹⁵Jesús jumai tsaponae jivíjavabelia mapacueniaje:

—Imoxoyo rabaja pevajënae pecopiapatsinexa Dioso papecaeve-tsimatacabinexa. Nexata pacopabare pibisiacuene paneexanabiabija-va. Panajamatabëcuenepëñëyorore Diosojavabelia. Pajumecovënëre mapapexanialivaisije papecacapanepaelivaisinexa, jai tsaponae Jesús jivijavabelia.

**Pacuenia Jesús junata cuatro ponëbeje dujuai peyamatajucabiabivi
yabara pelivaisi
(Mt 4.18-22; Lc 5.1-11)**

¹⁶ Jesús najetaruca Galilea pucaxaneto itapaya. Nexata Galileapuca ita-pata Jesús taenuta anijanëbeje nacaebananëbeje, Simónbeje Andrésbeje. Bajaraponëbeje daxitamatacabi canacujitsia dujuai yamatajucabiababeje. ¹⁷Nexata Jesús jumaitsi bajaraponëbejejavabelia:

—Naxanitsia. Panepënaponarebeje. Nexata pacacujarubianatsibeje jivi panejucaenexabeje. Pacuenia dujuai payamatajucabiabamebeje, bajarapacuenia jivi pajucaenamebeje Dioso pijajivinexa, jai Jesús bajaraponëbejejavabelia.

¹⁸ Nexata bajaraponëbeje dujuai peyamatajucabiabijavamibeje bajarajota puenetabuatabeje. Nexata baja naponabeje Jesús pepëta.

¹⁹ Nexata icatsia bebeliayo pevajënaeyabelia Jesús barëpona. Icatsia Jesús taenuta anijanëbeje Santiagobeje Juanbeje, Zebedeo pexënatobeje. Bajaraponëbeje pijajeraënëta xanebanucabeje dujuai peyamatajucaejavabeje. ²⁰ Nexata icatsia Jesús junata bajaraponëbeje ata. Nexata bajaraponëbeje bajarajota jerata puenetanutabeje paxa Zebedeo jane baja. Nexata Zebedeo, pijajivi yajava, nacopatanuca bajarajota. Nexata baja Santiagobeje Juanbeje naponabeje Jesús pepëta.

**Pacuenia pebi dovathi peyajavaponaponaenë Jesús jamatejemayaexana
yabara pelivaisi
(Lc 4.31-37)**

²¹ Nexata Jesús, pijajivi yajava, pata Capernaum tomarabelia. Judíovi penacueraevetsimatacabita Jesús joneya judíovi penacaetuatabiabiboyalia. Nexata bajarajota Jesús jivi livaisi tsipaeba. ²² Nexata Jesús pejumetaevitsi jamatabëcuenenabenajaca Jesús petsipaebilivaisi yabara. Bajarapamonae jamatabëcuenenabenajaca tsipaji xaniavaetsia Jesús tsipaeba Dioso pitorobinëtsicuenia. Apo tsipaebi pacuenia judíovi pecujarubivi tsipaebabiaba. ²³ Bajarajota pebi dovathi peyajavaponaponaenë naeca. Nexata bajaraponë Jesúsjavabelia vavajai tsaxuabi. Jumaitsi:

²⁴ —¡Jesús, Nazaret tomarapijinëmë, panevecuaponare baja! ¿Detsa xua paneexanaejitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexënatomë, pepo pexaniajamatabëcuenenëmë, jai dovathi peyajavaponaponaenë Jesúsjavabelia.

²⁵ Jesús nexata jumeitaveta dovathi. Jumaitsi:

—iMoyamëre! iVecuapitsapare baja maponëje! jai Jesús.

²⁶ Nexata dovathi pebi pinijicuenia devacaibiaexanatsi. Dovathi vavajai pinijicuenia. Nexata baja dovathi pitsatabijirava jivitonëvecua. ²⁷ Nexata daxitajivi bajarapacuene itsa tane, bitso jamatabëcuenenabenajaca. Najumaitsi bajarapamonae:

—¿Detsa mapitsicueneye? ¿Detsa mapitsipejanacujarubicueneye? iMaponëje Jesús, beDioso pitorobinëtsitsica! iDovathi ata jumecovënëta-tsi! iNexata Jesús pitavetsixae dovathi, pebi baja vecuapitsapatsi! najai bajarapamonae.

²⁸ Nexata daxita Galilea nacuapijivi bepíjia Jesús vënëlivaisitanetsi Dioso pesaëta pinijicueni pexanaponaejava.

**Pacuenia Simón Pedro pijava pena Jesús tojamatejemayaexana
yabara pelivaisi**

(Mt. 8.14-15; Lc 4.38-39)

²⁹ Jesús baja pitsapa judíovi penacatuatabiabibovecua. Nexata Santiagobeje Juanbeje Jesús yajavapona. Jesús bana napon Simónbeje Andrésbeje pijaboyabelia. ³⁰ Nexata Simón pijabota Simón pijava pena Jesús bana pevajënae romaebanucatsi camata. Nexata itsamonae bepíjia Jesús tsipaebarecëpatsi bajarapova peromaebanucaejavatsi. ³¹ Nexata Jesús imoxoyotabalia peromaebanucaevatsi. Cobeyotsiaya matacota. Nexata bajarajota peromaebanucaevatsi vecuaajibi tsanajetsitsireca baja domae. Nexata bajarapova Jesús bana pexaejava toexanatsi.

**Pacuenia ayaibitsaëto jivi piavitanevi Jesús jamatejemayaexana
yabara pelivaisi**

(Mt 8.16-17; Lc 4.40-41)

³² Itsa baja ajena meravitsia, Jesús javaberena tocapatatsi daxita piavitanevi. Tocapatatsinua dovathi peyjavajinavanapaevinua. ³³ Daxita tomarapijivi Jesús pepatsibota baupjavaberena nacaetuata. ³⁴ Nexata Jesús jamatejemayaexana ayaibitsaëto daxitacuenevitane pexainaevimi. Vecuacapsapanua dovathi peyjavajinavanapaevi. Jesús apo tocopatsi dovathi pecuaicuaijainexa jivijavabelia pevajunupaebiyanivatsi. Tsipaji dovathi xaniavaetsia Jesús yapëtanetsi Dioso pexënatocueni.

**Pacuenia Dioso pitorobilivaisi Jesús jivi tsipaeba Galilea nacuata
yabara pelivaisi**

(Lc 4.42-44)

³⁵ Pepo bajayacunua, abaxë itsa apo napebetsi matacabi, Jesús naëcota. Nexata pitsapalia bovecua. Pesaicaeyojavabelia pona pevajëtsinexa Diosojavabelia. Jesús nexata pecovëta matacabi baja. ³⁶ Itsa baja

matacabi, Simónbana Jesús pējaitaponalia. ³⁷Itsa baja bajarapamonae Jesús caxitajaraba, jumaitsi bajarapamonae:

—Daxita raja cajaitaruta pecataenexa, jai bajarapamonae Jesúsjavabelia.

³⁸Nexata Jesús jumaitsi:

—Ponatsi baja imoxoyo penaetomaraxijavabelia bajarajotalia tatsipae-binexa Dioso pitorobilivaisi. Bajaraxuanexa bovecua pitsaparenajë, jai Jesús.

³⁹Nexata daxita Galilea nacujava Jesús jivi tsipaebapona Dioso pitorobilivaisi judíovi penacaetuatabibonëjava. Jesús jivi dovathi vecuacapitsapapanua.

**Pacuenia Jesús jamatejemayaexana bajayajebi bitso
peperabëtsabanaenë yabara pelivaisi
(Mt 8.1-4; Lc 5.12-16)**

⁴⁰Jesús imoxoyorenatsi bajayajebi bitso peperabëtsabanaenë. Nexata bajaraponë pematabacabëta nucajunua Jesús pitabarata. Bajaraponë pini-jicuenia vajëta Jesúsjavabelia. Jumaitsi:

—Cacaëjëpa tanejamatejemayaexanaenexamë. Itsa jitsipame, nejamatejemayaexanare mapavitanevecuaje, jai peperabëtsabanaenë Jesúsjavabelia.

⁴¹Nexata Jesús bajaraponë itaxutobejiobiatane. Pecobeta perabëjayalia. Jumaitsi:

—Jājā, jitsipajë cajena. Jamatejemamë rabaja, jai Jesús peperabëtsabanaenëjavabelia.

⁴²Bajarapacuenia Jesús pejumaitsijavata peperabëtsabanaenëmi baja perabëxanepananajereca. Jamatejema baja. Peperabëtsabanaejavami baja ajibi. ⁴³Nexata baja Jesús naviatsiaexana bajaraponë. Pinijicuenia Jesús muxujioba bajaraponë penaviatsivajënaeya. Jesús jumaitsi:

⁴⁴—Nejumetaema. Pëtsa itsajivijavabelia tsipaebame tacajamatejemayaexanaejava. Naitajëremelia jane sacerdotenëjavabelia templobota penacuenebinëjavabelia. Nexata sacerdotenë cataena pecavecuaajibijava baja niavitanejavami. Diosonexa rajuremelia ofrenda sacerdotenëjavabelia pecavecuaajibiaexanaexae niavitanejavami. Bajara tsipaji pacuenia bajayata vajasalinainëmi Moiséspijinë nacaitoroba. Nexata jivi yapëtaena pepacune baja pecavecuaajibijava niavitanejavami, jai picani Jesús baja-yajebi bitso peperabëtsabanaenëmijavabelia.

⁴⁵Nexata bajaraponë lia. Itsiata tsipaebanajetaruca daxitajivijavabelia Jesús pejamatejemayaexanaejavatsi. Bajaraxuata Jesús apo jitsipae naitajëtsiaya pejonejava itsatomarabelia ata, jivi ayaibitsaëtoxaneto pematatoyoronaeyanivatsi. Jesús saya ponapona tomaranë piajibijava. Itsiata cajena daxita nacuanëjavaverena jivi muxunapatabiabatsi Jesús.


**Pacuenia Jesús jamatejemayaexana petabusipacuenabinētsi
yabara pelivaisi
(Mt 9.1-8; Lc 5.17-26)**

2 ¹Itsamatacabi icatsia Jesús naviarena Capernaum tomaraberena. Nexata jivi yapētane pabota Jesús patajopa. ²Nexata jivibitsaētoخانeto nacaetuata Jesús pepatsibota. Bo baupa ata cajena bitso jivi vënëca. Nexata bajarapamonaiejavabelia Jesús tsipaeba Dioso pitorobilivaisi. ³Nexata cuatro ponēbeje parena, camayota peyavētacaranajetarubenaevi petabusipacuenabinētsi. ⁴Nexata petabusipacuenabinētsi acuenebi bajarapamonaie peca-patsijava Jesús pitabarayabelia. Tsipaji bo ēnētuatuajē bitso jivi yavënëca. Nexata petabusipacuenabinētsi pecapatsivi, bomatatujuvavetsica vojoexana Jesús pecanacujitsiatsica. Nexata bajarapavojotuatsica camayota yacopatsica petabusipacuenabinētsi. ⁵Jesús jamatabēcueneyapētane pacuenia bajarapamonaie sivanajamatabēxainatsi. “Nacatojamatejemayaexanaenatsi cajena,” pesivajamatabējaijavatsi Jesús jamatabēcueneyapētane. Bajaraxuata petabusipacuenabinētsijavabelia Jesús jumaitsi mapacueniaje:

—Tajabananē, pibisiacuene rabaja nexanaeneconimi cavecuaajibiaexanatsi, jai Jesús.

⁶Bajarajota judfovi pecujarubiviyajuvënëvi naena. Bajarapamonaie itsa jumetaeyena bajarapacuenia Jesús pejumaitsiyava, nexata jamatabēcuenenavēxaniabiaya bēpēnēa jamatabējumai tsenae mapacueniaje:

⁷—Maponēje Jesús Dioso apo pejitsipaecuenia cuaicuaijai. Itsanē ata cajena apo caējēpaetsi itsajivi pibisiacuene pexanaeneconi pevecuaajibiaexanaenexa. Caenē Dioso caējēpatsi pevecuaajibiaexanaenexa bajarpacuene, jamatabējai tsenae bajarapamonaie.



(Mr 2.4)

⁸ Jesús jamatabëcueneyapëtane bajarapamonae jamatabëcuenenavë-xaniabiaya bajarapacuenia pesivanajamatabëxainaejavatsi. Nexata Jesús jumaitsi bajarapamonaejavabelia:

—Pëtsa bajarapacuenia panesivanajamatabëxainame. Tsipaji cajena xanë necaējëpa jivi pibisiacuene pexanaeneconimi tavecuaajibiaexanaenexa. ⁹Paxamë apo pacacaējëpae ata itsajivi pibisiacuene pexanaeneconi panevecuaajibiaexanaenexa, pacacaējëpa picani saya jema panejumaitsinexa petabusipacuenebinëtsijavabelia mapacueniaje: “Cavecuaajibiaexanatsi rabaja pibisiacuene nexanaeneconimi,” panejainexa. Tsipaji itsajivi ata apo yapëtae tsipae saya jema panejumaitsijava. Itsiata baitsi jane itsa apo pacacaējëpae panejamatejemayaexanaenexa petabusipacuenebinëtsi, acuenebi panejumaitsinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaējëpaeacuene panejamatejemayaexanaenexa, jai nexata Jesús judíovi pecujarubivijavabelia.

¹⁰ Icatsia Jesús jumaitsi bajarapamonaejavabelia:

—Xanë, Daxitajivi Pematapijinënë, mapanacuata necaējëpa tavecuaajibiaexanaenexa itsajivi pibisiacuene pexanaeneconimi ata pacuenia baja exanajë maponëjavabeliaje. Nexata patanecueneyapëtaenexamë tanecaējëpaeacuene tavecuaajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianë maponëjë, jai Jesús judíovi pecujarubivijavabelia.

Nexata icatsia Jesús jumaitsi petabusipacuenebinëtsijavabelia:

¹¹ —Xamë cajumaitsi. Nonotapunare. Nijacamayo pire. Nijaboyabelia baja ponare, jai Jesús.

¹² Nexata bajarapacuenia Jesús pejumaitsijavata petabusipacuenebinëmitsi nonotapuna. Pebocaecamayo baja pita. Pitsapalia baja daxitajivi pitabarata. Nexata daxitajivi itsa tane bajarapacuenia, jamatabëcuenenabenajaquena. Bajarapamonae jumai tsenae mapacueniaje:

—Dioso cajena bitso ayaijamatabëcuenenë. Caeto ata abaxë mapitsicue-ne pexanaejava apo taetsije, jai tsenae bajarapamonae.

Pacuenia Jesús pijajivitonënexa junata Levívënënë yabara pelivaisi
(Mt 9.9-13; Lc 5.27-32)

¹³ Jesús pona pucaxaneto itapajavabelia. Nexata jivi ayaibitsaëttoxaneto pënapatatsi bajarabelia. Nexata Dioso pejumelivaisi Jesús tsipaeba bajarapamonaejavabelia. ¹⁴ Bajaraxuacujinae penajetarucajavata Jesús taeyeta Levívënënë, Alfeo pexënato. Leví eca pabota gobierno pejamatabëcuene jivijavabelia matamoyanijobabiaba impuestomatamo. Nexata Jesús jumaitsi Levíjavabelia:

—Leví, naxanitsia. Nepënaponare, jai Jesús.

Jejai Leví. Nexata nonotapuna. Leví baja napona Jesús pepëta.

¹⁵Nexata Leví junata Jesús pebarënananinexa pijabota. Nexata Leví pijabota Jesús pexaejava naxane. Leví pijabota ayaibitsaëto naena gobierno pejamatabëcuene jivijavabelia impuestomatamo pematamoyanijobiabiavi. Itsamonae ata nanabane pijamatabëcuenebejevi. Nexata Jesús pijajivi nabarëca bajarapamonaejavata. ¹⁶Nexata fariseovi, judíovi pecujarubivinu, Jesús taeyetatsi daxita bajarapamonaejavata pijajivi penabarënanecaejava. Nexata bajarapamonae jamatabëcuenenavëxaniabiaya jumaitsi Jesús pijajivijavabelia:

—Papecacujarubinë Jesús naneconita Diosojavabelia. Tsipaji gobierno pejamatabëcueneta impuestomatamo pematamoyanijobiabivijavata, pijamatabëcuenebejevijavatanua, naxaeyeca pexaejava, jai bajarapamonae Jesús pijajivijavabelia.

¹⁷Itsa Jesús jumetane mapajumeje, nexata jumaitsi bajarapamonaejavabelia:

—Pevaëbinë raja apo vaëbi pejamatejemavi. Pevaëbinë raja piavitanevi vaëba. Bajara pijinia xanë ata itsinë. Apo sivapatajopaenë tajunatsinexa pamonae baja aneconijibi tsavanapae. Sivapatajopajë raja tajunatsinexa pijaneconí pexainaevi. Bajarapamonae junataponajë pecopabinexa pibisiacuene pexanaejava penajamatabëcuenepëñëyorotsinexa Diosojavabelia, jai Jesús bajarapamonaejavabelia.

**Pacuenia Jesús yanijobatsi pamatacabibeje jivi vajëtapona
Diosojavabelia pexaejava apo pexaeyabiabixae yabara pelivaisi
(Mt 9.14-17; Lc 5.33-39)**

¹⁸Itsamatacabi Juan pijajivi, fariseovi pijajivinu, pexaejava apo xaevanapae pamatacabibeje Diosojavabelia vajëcapona. Nexata itsamonae Jesúsjavaberena pata. Yanijobatsi pexaejava piatsobicuene yabara. Jumaitsi mapacueniaje:

—Juan pijajivi, fariseovi pijajivinu, pexaejava apo xaeayabiabi pamatacabibeje Diosojavabelia vajëtapona. ¿Detsa xuajitsia itsiata xamë nijajivi pexaejava xaeayabiaba pamatacabibeje Diosojavabelia vajëtapona? jai Jesús peyanijobivitsi.

¹⁹Nexata Jesús jumaitsi bajarapamonaejavabelia:

—Pamonae junatatsi penacasabifiestajavabelia penanabaninexa, apo atsobi pexaejava itsa abaxë yajavaecatsi pejananacasabinë. Itsa abaxë pejananacasabinë yajavaponaponatsi, acuenebi pexaejava piatsobinexa bajarapamonae. ²⁰Itsiata baitsi jane itsa pejananacasabinë tsimaxëpatsipatsi pevecuacaponanexatsi itsajavabelia, nexata bajarapamonae pexaejava apo xae tsipae. Tsipaji bitso najamatabëxainaejitsipa pevecuacaponanexatsi. Bajara pijinia itsi tajajivi ata. Tayajavaponaponaeepato abaxë

apo atsobabiabi pexaejava pamatacabibeje Diosojavabelia vajëtapona. Itsiata pamatacabi xanë necaponaena bajarapamonaevécua, nexata jane baja bajarapamatacabi pexaejava apo xae tsane bitso tanesivanajamatabë-xainaexae, jai Jesús peyanijobivitsijavabelia.

²¹ Nexata bajarapamonaë perujujamatabëcuene baja pecopabinexa, Jesús livaisi tsipaeba comparacióncuena bajarapamonaë pejumecovënëtsinexa ëpejanalivaisi, Jesús petsipaebilivaisi. Bajarapamonaë anijajamatabëcuenebeje pexainaeyaniva perujujamatabëcuene baja pecopabinexa, Jesús livaisi tsipaeba comparacióncuena. Perujujamatabëcuene yabara Jesús jumaitsi bajarapamonaëjavabelia mapacueniaje:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivojoto titinaejitsipa. ²² Itsajivi ata pijinia apo epacae pejanavinoranë perujubocodorianëjavabelia bajayajebi peyajebinexa. Pejanavinoranë itsa epacaejitsipa perujubocodorianëjavabelia, nexata pejanavinoranë yatititibia tsipae. Tsipaji perujubocodorianë apo yanayeretsi tsipae. Tsipaji pejanavinoranë pejumalitsëxë abaxë xaina. Nexata itsa yatititibia tsipae, mene naxuabijitsipa, vinoranëmi. Bajaraxuata bepaca pejanavinoranë pejanabocodorianëjavabelia, jai Jesús peyanijobivitsijavabelia bajarapamonaë pejumecovënëtsinexa ëpejanalivaisi, Jesús petsipaebilivaisi, perujujamatabëcuene baja penacopabinexa.

Pacuenia Jesús pijajivi namutua siricanajetarubena trigoxu

penacueraevetsimatacabita yabara pelivaisi

(Mt 12.1-8; Lc 6.1-5)

²³ Judíovi penacueraevetsimatacabita Jesús, pijajivi yajava, najetaruca namutua trigo pabianëjava. Nexata Jesús pijajivi pïajanixae, trigoxu siricanajetarubena. Xuxaeyabuatapona. ²⁴ Nexata fariseovi jumaitsi Jesúsjavabelia:

—iTaema mapacuenije! Dioso Moiséspijinëta penajumecopatsilivaisita vajanacaitavetsicuene, nijajivi exana. Apo nacaitavetsi ata trigoxu vajaxaejava, itsiata ajena penacueraevetsimatacabixae, nijajivi apo bexanaë mapacuenije, jai fariseovi Jesúsjavabelia.

²⁵ Nexata Jesús jumaitsi fariseovijavabelia:

—Ajena, penacueraevetsimatacabita, tajajivi bajarapacuenia exanaë ata, itsiata apo pibisiacuene. Tsipaji bitso pïajani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainëmi Davidpijinë, pebarëponaponaëvi yajava, exana pamatacabi bitso pïajani?

²⁶ Davidpijinë joneya Dioso pijatemploboyalia pamatacabi Abiatarpijinë daxita sacerdotëvi penamatacaitorobinë tsaponaponaë. Nexata Dioso pijatemplobëne, mesajumata, bobena Diosonexa ofrendacuenia

petojebipanbëanë. Bajarapapanbëanë itsajivi ata apo tocopatsitsi pexaenexa penaneconitsiyaniva Diosojavabelia. Ësacerdotevi picani tocopatatsi pexaenexa. Davidpijinë apo sacerdotenë ata, xae ata bajarapapanbëanë pijajivi barë, itsiata apo vënananeconitsi Diosojavabelia, jai Jesús fariseovijavabelia.

²⁷Icatsia Jesús jumaitsi fariseovijavabelia:

—Dioso raja tocopata caematacabi jivi penacueraevetsinexa. Tsipaji Dioso yapëtane pacuenia jivi namatavenona penacueraevetsinexa. Dioso apo exanae jivi saya jema peyaiyataenexa penacueraevetsimatacabianë.
²⁸Nexata xanë, Daxitajivi Pematapijinënë, netoxanepana cajena tatsipaebinexa pacuene xanepana jivi pexanaenexa penacueraevetsimatacabita ata, jai Jesús fariseovijavabelia.

**Pacuenia Jesús jamatejemayaexana pebi pecobetsaquenaenë
yabara pelivaisi**

(Mt 12.9-14; Lc 6.6-11)

3 ¹Penacueraevetsimatacabita Jesús joneya judíovi penacaetuatabiabiboyalialia. Nexata bajarajota pebi naeca pecobetsaquenaenë. ²Nexata Jesús naitaxutocaevetatsi fariseovi petanexatsi pecobetsaquenaenë pejamatejemayaexanaejava penacueraevetsimatacabita. Nexata Jesús pecobetsaquenaenë itsa jamatejemayaexana penacueraevetsimatacabita, “Jesús raja naneconita Diosojavabelia. Tsipaji penacueraevetsimatacabita nacueneba,” pejainexa bajarapamonae. ³Nexata Jesús jumaitsi pecobetsaquenaenëjavabelia:

—Nonotapunare. Nucare mapamonae pitabarataje, jai.

⁴Nexata Jesús jumaitsi fariseovijavabelia:

—Penacueraevetsimatacabita ata xanepana vajaexanaenexa pexania-cuene. Xanepana vajajamatejemayaexanaenexa piavitanevi, jai Jesús fariseovijavabelia.

Nexata fariseovi Jesús apo jumepitsitsi. ⁵Nexata Jesús anaeya naëcota bajarapamonae. Bajaraxuacujinae Jesús bejamatabëjiobireca. Tsipaji yapëtane piajamatabëcuenetajajava fariseovi. Nexata Jesús jumaitsi pecobetsaquenaenëjavabelia:

—Namaxërovire, jai.

Nexata pecobetsaquenaenë namaxërovita. Bajarajota cobexanepanajereca baja. Pecobetsaquenaejavami ajibi. ⁶Nexata fariseovi itsa tane Jesús pecobexanepanaeayaexanaejava pecobetsaquenaenë, fariseovi anaepana. Nexata bajarapabovecua pitsapa. Pona penabarëcuaicuajainexa nacuaevetsinë Herodes pijajivijavabelia. Bajarapamonae najumejaita Jesús pebeyaxuabinexatsi.

Pacuenia jivi nacaetuata Galilea pucaxaneto itapata yabara pelivaisi

⁷Jesús, pijajivi yajava, pona Galilea pucaxaneto itapayabelia. Nexata Jesús pënaponaliatsi ayaibitsaëtoxaneto Galilea nacuapijivi. ⁸Nexata

Jesús pēnaponaliatsi Judea nacuapijivinua, Jerusalén tomarapijivinua, Idumea nacuapijivinua, Jordánmene itsapanaverenapijivinua, imoxoyo Tiro tomaravecua pejinavanapaevinua, imoxoyo Sidón tomaravecua pejinavanapaevinua. Daxita bajarapamonae Jesús pēnaponaliatsi tsipaji Jesús vēnēlivaisitanetsi Dioso pesaēta pinijicuene pexanaponaejava. ⁹Nexata Jesús pijajivi itoroba jera petoxaniavaetarutsinexatsi menetareca. Itsa bajarapajivibitsaētoxañeto Jesús bitso matacēnēnaponatsi, nexata bajarapamo ēnēabereca Jesús perunaenexareca. ¹⁰Jesús baja ayaibitsaēto piavitanevi jamatejemayaexana. Bajaraxuata itsamonae, piavitanevi, Jesúsjavabelia natorotaponabiaba pejayatsinexatsi.

¹¹Dovathi peyajavajinavanapaevi Jesús ita taeyabiabatsi, bajarapamonae irata othopabiaba Jesús pitabarata. Bajarapamonae aējai tsabiabi.

—Xamē tsaena Dioso pexēnatomē, jai tsabiabi dovathi peyajavajinavanapaevi.

¹²Nexata Jesús jumeitaveta bajarapamonae. Jumaitsi:

—“Dioso raja pexēnato,” pajamē pētsa xanē yabara itsajivijavabelia, jai Jesús bajarapamonaejavabelia.

**Pacuenia Jesús pijajivi ayaibitsaētoxañetoyajuvēnēvi itapeta saya doce
ponēbeje apóstolevinexa yabara pelivaisi
(Mt 10.1-4; Lc 6.12-16)**

¹³Jesús pijajivi ayaibitsaētoxañetoyajuvēnēvi, doce saya ponēbeje, itapeta apóstolevinexa. Jesús pitapetsivajēnae apóstolevinexa, junaya petsutojumabetsia. Bajaravetsica Jesús junatanuca ponēbeje jamatabēitapeta apóstolevinexa. Nexata pamonae Jesús itapeta apóstolevinexa, junaya petsutojumabetsia, Jesúsjavabetsia. ¹⁴Nexata Jesús caetuata caebitsaētoyo, doce ponēbeje pijajivi, pepēnajinavanapaevinexatsi. Jesús itorobijitsianua bajarapamonae daxitanacuanējava jivi petsipaebanajetarubenaenexa Dioso pitorobilivaisi. ¹⁵Jesús pijajivi jamatabēcuenecaējēpaeyaexana Dioso pesaēta pejamatejemayaexanaponaeñe piavitanevi. Jamatabēcuenecaējēpaeyaexananua Dioso pesaēta dovathi jivi pevecuacapsapaponaeñe. ¹⁶Jesús pijaapóstolevi, doce ponēbeje, mapevēnēnēje. Copiaya ponē pevēnē Simón. Bajaraponē Jesús vēnēruba itsavēnē, Pedro. ¹⁷Itsanē Santiago. Itsanē Juan. Santiagobeje Juanbeje nacaebananēbeje, Zebedeo pexēnatobeje. Bajaraponēbeje Jesús vēnēruba Boanerges. “Boanerges,” ita jai, bajarapamonae pijajumeta mapajumetaje pejumaitsiijume: “Yamaxē pexēnatobeje,” pejaijume. ¹⁸Itsanē pevēnē Andrés. Itsanē Felipe. Itsanē Bartolomé. Itsanē Mateo. Itsanē Tomás. Itsanē Santiago, Alfeo pexēnato. Itsanē Tadeo. Itsanē Simón, celotenē. ¹⁹Itsanē Judas Iscariote. Bajaraponē bexējavabelia Jesús canajetsijitsiatsi pijavajabitsaē pecobeyabelia pebeyaxuabinexatsi.

**Pacuenia itsamonae Jesús yabara jamatabëcuenenavëxaniabiaya
jumaitsi: “Beelzebú raja pesaëta, Jesús dovathi jivivecua
capitsapapona,” jai yabara pelivaisi
(Mt 12.22-32; Lc 11.14-23; 12.10)**

²⁰ Jesús boya joneya pijajivi yajava. Icatsia jivibitsaëtoخانeto nacaetua-ta. Nexata acuenebi Jesús pijajivi pebarënanabijava. ²¹ Itsamonae Jesús yabara jumaitsi: “Jesús raja matajemabatsi,” jai. Nexata bajarapacuenia itsamonae Jesús yabara pejumaitsijava, Jesús pijamonae vënëlivaisitanetsi. Nexata Jesús pijamonae ponarena Jesúsjavaberena pebarëponaenexatsilia picani.

²² Judíovi pecujarubivi, Jerusalén tomaraverena peponaevi, jamatabëcuenenavëxaniabiaya Jesús yabara jumaitsi:

—Mara ponë Jesúsje, Beelzebú yajavaponapona. Beelzebú raja daxita dovathivi pevetsinë. Bajaraxuata Jesús Beelzebú pesaëta dovathi jivivecua capitsapapona, jai judíovi pecujarubivi jamatabëcuenenavëxaniabiaya Jesús yabara.

²³ Nexata Jesús junata bajarapamonae jamatabëcuenenavëxaniabiaya pejumaitsijava pecanaëjëtsinexa. Nexata bajarapamonaejavabelia Jesús jumaitsi mapacueniaje:

—Beelzebú raja dovathivi jivivecua apo capitsapapona tsipae. Tsipaji Beelzebú dovathi jivivecua itsa capitsapaponaejitsipa, nexata Beelzebú bepíjavajabitsaë taejitsipa pijajivi. ²⁴ Pacanaëjëre mapacue-neje. Nacaenacuapíjivi ata itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaenacuapíjivi ata. ²⁵ Bajara pijinia nacaemonae ata itsipae. Itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaemonae ata. ²⁶ Bajara pijinia itsipae dovathi ata. Dovathi jivivecua itsa capitsapaponaejitsipa pijajivi dovathivi, nexata bepíjavajabitsaënë taejitsipatsi pijajivi. Nexata apo sivaajamatabëcuenesaë tsipae pexanaponaejavanexa. Nacopiarucaeyaexanaejitsipa dovathi, jai Jesús judíovi pecujarubivijavabelia.

²⁷ Bajarapamonae pecanaëjëtsinexa Jesús bitso piasaënëcuene dovathi matatoxenetsia, Jesús icatsia jumaitsi bajarapamonaejavabelia mapacueniaje:

—Itsajivi ata apo caëjëpaetsi pejonenexa bitso piasaënë pijaboyalia peyacajërëtsinexa xua xaina pijabota. Itsiata itsa patsipa bajaraponë matatoxenetsia bitso piasaënë, nexata cobecëtabuatsipatsi. Taxucëtabuatsipatsi yajava. Matapania bajarapacuenia yacajërëtsipatsi daxita xua xaina pijabota. Bajara pijinia pacuenia xanë ata bitso tasaënë dovathi matatoxenetsia. Bajaraxuata necaëjëpa jivivecua tacapitsapaenexa dovathivi.

²⁸Xaniajanë pacuenia pacatsipaebatsi. Dioso cajena caējēpatsi daxita-jivi pibisiacuenia pexanaeneconī pevecuaajibiaexanaenexa. Pibisiacuenia jivi Dioso baracuaicuajai ata, bajarapaneconī ata Dioso caējēpatsi pevecuaajibiaexanaenexa. ²⁹Itsiata baitsi jane pajivi pibisiacuenia baracuaicuajai Espiritu Santo, bajarapajivi Dioso apo vecuaajibiaexanae tsane bajarapaneconī. Bajarapajivi naneconitsiana daxita matabijavabeliane-xa, jai Jesús bajarapamonaejavabelia.

³⁰Bajarapacuenia Jesús jumaitsi tsipaji Jesús Espiritu Santo yajavaponaponaē atatsi, judíovi pecujarubivi jumaitsi Jesús yabara: “Jesús raja Beelzebú yajavaponapona,” jai. Nexata bajaraxuata bajarapamonae naneconita Espiritu Santojavabelia.

**Pacuenia Jesús pejuypijivi, pena yajava, nubena bojumavelia
yabara pelivaisi**

(Mt 12.46-50; Lc 8.19-21)

³¹Jesús pejuypijivi, pena yajava, pata Jesúsjavaberena. Itsiata bajarapamonae boyalia apo jonelia Jesús penucaeboyalia. Nexata bajarapamonae junatsiaexana Jesús pejumetaeyenaevitsijavabelia. ³²Nexata pamonae Jesús petsipaebilivaisi matatoyorotsia jumetaeyenatsi, Jesúsjavabelia jumaitsi:

—Patajatuxanenē, ena raja, nejuyapijivi yajava, nuca patapēnēverena. Cajaita raja xamē, jai bajarapamonae Jesúsjavabelia.

³³Nexata Jesús jumaitsi bajarapamonaejavabelia:

—¿Detsa pitsijamatabēcuenēvi taena, tajuyapijivinu? jai Jesús.

³⁴Bajaraxuacujinae Jesús naēcota pematatoyorotsiaenaevitsi. Jumaitsi bajarapamonaejavabelia:

—Mara jota pamonae xanējavata penaevije, bajarapamonae jane taenajivi, tajuyapijivinu. ³⁵Tsipaji raja pamonae exana pacuenia Dioso itorobatsi, bajarapamonae jane baja tajuyapijivi, taenajivinu, jai Jesús bajarapamonaejavabelia.

**Pacuenia Jesús jivi livaisi tsipaeba peubinē pelivaisicuenia
yabara pelivaisi**

(Mt 13.1-9; Lc 8.4-8)

4 ¹Icatsia Jesús taxuxuaba livaisi petsipaebijava Galilea pucaxaneto itapjavata. Nexata jivi ayaibitsaētohaneto nacaetuata itsajota Jesús livaisi tsipaebanuca. Nexata Jesús runareca jera ēnēabereca. Ecareca jera ēnētareca. Daxita jivibitsaētohaneto tajetaboveliala nubena. ²Nexata Jesús daxitacuene livaisianē tsipaeba jivijavabelia. Jesús jumai tsaponae bajarapamonaejavabelia mapacueniaje:

³—Panenamuxunaevere mapalivaisije. Peubinē pona pabiabelia peubinexa. Nexata itsa pata pabita, peubixu pexucayabajabarabicuenia

ubanjataruca. ⁴Nexata pexucayabajarabijavata itsaxu othopa pabi tua-tuajëjava, penajetarucaenamutojumata. Nexata bajarajota pata baratsui. Xane bajarapaxumi juvinejeva. ⁵Itsaxu pijinia othopa ibopananëjuma-ta, itsajota bitso ira apo aitayaë. ⁶Nexata icotia bitso itsa ataju, nexata bajarapaxu juvi ata, tsaquenapona. Tsipaji irabereca bitso apo atabune-pepiareca. ⁷Itsaxu pijinia othopa xanëebacabomijavata. Nexata peubixu xanëebotonë caecuenia itsa yajavajuva, bitso xanëebotonë matacënënatsi peubijavami. Nexata peubijava apo xainae pecuai. ⁸Itsaxu pijinia otho-pa pexaniairata. Nexata juva. Xaniavaetsia vitsabaponanua. Xainanua pecuai. Itsabotonë capitsapa treinta paxutobeje tsaponae. Itsabotonë capi-tsapa sesenta paxutobeje tsaponae. Itsabotonë capitsapa cien paxutobeje tsaponae, jai Jesús bajarapalivaisi petsipaebivijavabelia.

⁹Nexata icatsia Jesús jumaitsi jivibitsaëtoxanetojavabelia:

—Pajivi jamatabënejumeyapëtane patacatsipaebilivaisi, nenamuxunae-vetsi xaniavaetsia, jai Jesús.

Pacune yabara Jesús jivijavabelia livaisi tsipaeba ëcomparacióncuenia yabara pelivaisi

(Mt 13.10-17; Lc 8.9-10)

¹⁰Jesús livaisi petsipaebicujinae, jivibitsaëtoxaneto baja Jesús vecua-naviabatsi. Nexata Jesús pijaepato barënacopata doce ponëbeje pijaji-vi, itsamonae itsiata yajava. Nexata bajarapamonae Jesús yanijobatsi. Bajarapamonae jumaitsi Jesúsjavabelia:

—Palivaisi jivijavabelia tsipaebame peubinë pelivaisicuenia, pajama-tabëcuene xaina, patayapëtaenexa panetsipaebare, jai bajarapamonae Jesúsjavabelia.

¹¹Nexata Jesús jumaitsi bajarapamonaejavabelia:

—Paxamë rabaja xaniavaetsia Dioso pacayapëtaeyaexana Dioso papi-jajivimë papecaevecsijava. Bajarapacune abaxë daxitajivi apo yapëtae. Baitsi ra saicaya pamonae apo tajajivi, tsipaebajë livaisianë ëcomparación-cuenia. ¹²Bajaraxuata nexata bajarapamonae tae ata Dioso pesaëta pinijicuene taexanaejava, itsiata apo yapëtae pajamatabëcuene yabara exanajë pinijicuene taexanaejava. Nenamuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi. Bajarapacuenia apo jumeyapëtae penajamatabëcuenecopatsiyaniva Diosojavabelia pibisia-cuene pexanaeconimi Dioso pevecuaajibiaexanaeyanivatsi, jai Jesús.

Pacuenia Jesús yapëtaeyaexana pijajivi, itsamonae yajava, pajamatabëcuene xaina palivaisi tsipaeba peubinë pelivaisicuenia yabara pelivaisi

(Mt 13.18-23; Lc 8.11-15)

¹³Jesús icatsia jumaitsi pijajivijavabelia:

—Itsa apo pajumeyapëtaemë pajamatabëcuene xaina palivaisi pacatsipaebatsi peubinë pelivaisicuenia, ¿detsa nexata pacuenia pajumeyapëtaename daxita palivaisianë pacatsipaebijitsiatsi comparacióncuenia? jai Jesús pijajivijavabelia.

¹⁴Nexata icatsia Jesús jumaitsi pijajivijavabelia pijajivi peyapëtaenexa pajamatabëcuene xaina palivaisi tsipaeba peubinë pelivaisicuenia:

—Pajivi raja peubixu uba, bajarapajivi bepepaebinë Dioso pitorobilivaisi. ¹⁵Pacuenia itsi pabita peubixu, paxu othopa pabi tuatuajëjava penajetarucaenamutojumata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabëubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabëjuvinejevatsi, dovathi vecuapitatsi bajarapalivaisimi, petsijamatabëubilivaisimitsi. ¹⁶Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barëyaya jumecovënëta. ¹⁷Itsiata baitsi jane pacuenia irabereca apo atabunepepiareca paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tsipaji pepacuene pejamatabëëthëtovetsina apo jumecovënëtsi bajarapalivaisi. Nexata apo ajamatabëcuenesaë tsavanapae bajayajebi pejumecovënëtsinexa bajarapalivaisi. Nexata itsa tocopiapatatsi daxita petoayapëbejecuenetsi, itsa yalivaisibatsinua Dioso pitorobilivaisi yabara, nexata pejumecovënëtsijavami bajarapalivaisi bepijia copaba. Pevajënaeyabelia apo jumecovënëtavanapae. ¹⁸Pacuenia pijinia paxu othopa xanëebacabomijavata, itsa juva, bitso matacënënatsi xanëebotonë, bajara tsijamatabëcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. ¹⁹Itsiata baitsi jane bitso jamatabëcueneenatsi mapanacuapijicuene yabaraje. Tsipaji najamatabëxaina ayaijava palata pexainaenexa. Nexata pijacuata najamatabëcueneyamaxëitojoroba. Daxitacuene mapanacuapijicuene bitso jitsipa pexainaenexa. Bajaraxuata Dioso pitorobilivaisi apo tovitsabitsi pejamatabëëthëtota. Nexata pacuenia itsi pabita piacuaijibibotonë, bajara itsi bajarapamonae. Tsipaji Dioso xaniavaetsia apo tojinavanapae. ²⁰Pacuenia pijinia itsi paxu othopa pexaniairata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, tsijamatabëjunuatsi. Nexata tsijamatabëcuenevitsabaponatsi Dioso pitorobilivaisi. Nexata pacuenia peubijava capitsapa itsabotonë treinta paxutobeje tsaponae, itsabotonë sesenta paxutobeje tsaponae, itsabotonë cien paxutobeje tsaponae, bajara tsijamatabëcueneitsitsi bajarapamonae Dioso pitorobilivaisi, jai Jesús pijajivijavabelia.

**Pacuenia Jesús pijajivi livaisi tsipaeba lámparabê pelivaisicuenia
yabara pelivaisi
(Lc 8.16-18)**

²¹ Jesús icatsia jumaitsi doce ponêbeje pijajivijavabelia, itsamonaejavabelia ata: —Itsajivi ata lámparabê pitanojotsicujinae apo etsi cajoniênëalia. Apo etsi cama bëxëpanalia ata. Jume baja cajena. Biji rajane athëbëyo etsia daxitaboênë pitayotecaenexa. ²² Bajara pijinia itsi palivaisianê tsipaebaponajê comparación-cuenia daxitajivi picani peyapêtaenexa. Najumematayatsia apo tsipaebaponaenê. Itsamona nejumetae ata, aeconoxae abaxê apo nejumeyapêtae pajamatabêcuenexaina tatsipaebilivaisianê. Itsiata itsamatacabi, bexëajavabelia, daxitajivi nejumeyapêtaena pajamatabêcuene xaina palivaisianê comparacióncuenia tsipaebaponajê. ²³ Pajivi jamatabênejumeyapêtane patacatsipaebilivaisi, xaniavaetsia nenamuxunaevetsi, jai Jesús pijajivijavabelia.

²⁴ Icatsia Jesús jumaitsi bajarapamonaejavabelia:

—Panejumecanaëjêre patacatsipaebilivaisi. Itsamonae ata itsa pacatsipaebiana, bajarapamonae ata pajumecanaëjêtsianame papecatsipaebilivaisi. Palivaisivajêto panejumecanaëjêtsianame, nexata bajarapalivaisivajêto pajumeyapêtaename. Itsiata icatsia pematatsênêa bajarapitsilivaisivajêto Dioso pacaya-pêtaeyaexanaena. ²⁵ Pajivi xaniavaetsia nejumeyapêtane patacatsipaebilivaisi, bajarapajivi icatsia itsalivaisi pematatsênêa Dioso jumeyapêtaeyaexanaenatsi. Itsiata pajivi apo jitsipae pematatsênêa pejumeyapêtaeponaenexa, bajarapajivi palivaisiyovajêto picani jumeyapêtane, nacofênëtsiana, jai Jesús.

Pacuenia peubixu pejuvicujinae, Dioso pesaêta vitsaba yabara pelivaisi

²⁶ Jesús icatsia jivi comparacióncuenia livaisi tsipaeba Dioso pijajivi pevetsicuenene yabara. Jumaitsi mapacueniaje:

—Pacuenia peubixu pejuvicujinae, Dioso pesaêta vitsaba, bajara pijinia pacuenia Dioso pijajivi ata Dioso pesaêta jinavanapa. Peubinê pabita peubixu xucayajabajarabanajetaruca. ²⁷ Peubinê peubicujinae vemaxëmajitabiaba meravi canacujitsia. Naëcotabiaba matababita. Bajarapacuenia panepapona matababianê. Nexata pijinia peubixu pabita juva. Vitsabapona. Itsiata baitsi jane peubinê apo yapêtae pacuenia peubixu pijacuata juva. ²⁸ Ira raja pejamatabêcueneta naxaniaba peubijava. Copiata pepaboto vitsabaya. Xuacujinae namatonota. Xuacujinae cuainavereta. ²⁹ Itsa baja yaniona peubijava, penotsivi pona penotsinexa. Tspaji baja penotsimatababinexa tocopiapatatsi, jai Jesús jivijavabelia.

**Pacuenia mostazaxutoyo pejuvicujinae, mostazanae bepijia vitsaba
yabara pelivaisi
(Mt 13.31-32; Lc 13.18-19)**

³⁰⁻³¹ Jesús icatsia jumaitsi doce ponêbeje pijajivijavabelia, itsamonaejavabelia ata:

—¿De meta xua pelivaisi jëpa Dioso pijajivi bepíjia ayaibitsaëtoxañeto penaexanaejavanexa? Jivi meta peyapëtaenexa ayaibitsaëtoxañeto bepíjia Dioso pijajivi penaexanaejavanexa, mostazaxutoyo meta pelivaisicuenia tsipaebianajë. Jumaitsinë meta tsane: “Pacuenia mostazaxutoyo pejuvicutujinae, bepíjia vitsaba mostazanae, bajara pijinia itsane Dioso pijajivi ata. Bepíjia Dioso pijajivi ayaibitsaëtoxañeto naexanaena. Mostazaxu raja bitso tsiquirixutoxi daxita peubixuvecua. ³²Itsiaa baitsi jane mostazanae itsa juva, bepíjia vitsaba. Caevaita pinijinae naexana itsapeubinaenë matatoxenetsia. Nexata baratsui ata pematapenanë exana mostazanae-maxërananëjavata. Bajara pijinia itsane jivi ata. Bepíjia ayaibitsaëto Dioso pijajivi naexanaena,” janë meta tsane mapacueniaje, jai Jesús pijajivijavabelia, itsamonaejavabelia ata.

**Pacuenia Jesús jivi livaisi tsipaebabiaba ëcomparacióncuenia
yabara pelivaisi
(Mt 13.34-35)**

³³Dioso pitorobilivaisi Jesús tsipaebabiaba jivijavabelia. Dioso pitorobilivaisi Jesús jivi tsipaebabiaba ëcomparacióncuenia. Pacuenia baja jivi caëjëpatsi pejumeyapëtaenexa, bajarapacuenia Jesús tsipaebabiaba. ³⁴Jesús ëcomparacióncuenia livaisi tsipaebabiaba bajarapamonaejavabelia. Itsiaa saicaya Jesús ëpijajivijavabelia xaniavaetsia yapëtaeyaxana-biaba pajamatabëcuene xaina daxita bajarapalivaisianë.

**Pacuenia Jesús itaveta joviboxañeto, malataca yajava, piayaijavami
yabara pelivaisi
(Mt 8.23-27; Lc 8.22-25)**

³⁵Dioso pitorobilivaisi Jesús tsipaeba jivijavabelia. Bajarapamatacabi Jesús petsipaebicutujinae itsa baja caniviyotsia, Jesús jumaitsi pijajivijavabelia:

—Nicabaliatsi mapapucaxañeto itsapanabeliaje, jai Jesús.

³⁶Nexata baja Jesús, pijajivi yajava, vecuapona jivi. Pajerata Jesús ecareca, pijajivi yajava pona. Itsiaa itsamonaë pënaponatsi itsajeranëta. ³⁷Nexata pinijijoviboxañeto jemata najetaruca. Nexata malataca jera ënëaberena mera epabajarabapona. Nexata baja jera ënëaberena mera vënëcapona. ³⁸Jesús itsiaa majitanuca jamatejema jeratabufejavavetsina. Namatabëxëyaëtanuca penamatabëxëyaëtabibijavata. Nexata Jesús pija-jivi yaitavabatsi. Jesús pijajivi jumaitsi:

—iPatajatuxanenë, vaxaitsimi rabaja yaothopaenatsi! ¿Apo jamatabëcuenebëjamë tsaja? jai Jesús pijajivi.

³⁹Nexata Jesús pemajitanucaenëmi naëcotapuna. Pinijijumeta itaveta-xuaba jovibo. Jesús jumaitsi pucajavabelia, jovibojavabelia ata:

—iVainae ecare baja! jai.

Bajarapacuenia Jesús pejumaitisjavata jovibo baja ajibi tsaxuabi. Daxitapuca baja nexata vainae ecaxuaba. ⁴⁰Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús.

⁴¹Nexata Jesús pijajivi najunaviaca bajarapacuenie petaexae. Ëpamonae najumaitsi:

—¿De meta tsipaji maponëje? ¡Itaveta jovibo, malataca ata! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

**Pacuenia pebi, dovathivi peyajavaponaponaenë, Jesús vecuacapitsapa
Gerasa nacuata yabara pelivaisi
(Mt 8.28-34; Lc 8.26-39)**

5 ¹Jesús pijajivi barëpata pucaxaneto itsapanabelia, Gerasa nacua-yabelia. ²Nexata Jesús jerajavavetsina nonotajuna. Pebi dovathivi peyajavaponaponaenë, cujítabarenatsi jivimëthëanëjavaverena. ³Bajaraponë ponaponabiaba jivimëthëanëjavata. Itsajivi ata apo caëjëpaetsi pecëtsinexa bajaraponë cadenamaëtota ata. ⁴Cadenamaëtonëta picani taxucëtabiabatsi anijatonë. Cobecëtabiabatsi picani yajava. Itsiata cajena pecobecëtsicadenamaëtotsi ucutajarababiaba pesaëta. Bajaraxuacujinae petaxucëtsicadenamaëtotsi pecobeta tsaquibiaxuababiaba. Nexata cadenamaëtomi tsiquirijavaxi exanapenetabiaba. Itsajivi ata cajena apo caëjëpaetsi pecëtsinexa bajaraponë. Tsipaji bitso asaë. ⁵Bajaraponë petsutonëjava, jivi petëpaevi pemëthëcaejava, matababijebi, meravijebi yajava, ponaponabiaba. Vavajai tsabiabaponapona. Ibotonëjavabelia natsaqui-bajarababiabaponapona. ⁶Bajaraponë itsa taetaba Jesús penajetarucæjava, nexata tajëverena cujinaeponarena Jesúsjavaberena. Jesús pitabarata pematicabëta nucajunua. ⁷Bajaraponë aëjai pinijijumeta Jesús pitabarata.

—Jesús, pepo Dioso, athëbëtatsia peecaenë, pexënatomë. ¿Detsa xua jaitame xanëjavaberena? Pexaniacuene bitso cavajëtatsi Dioso pitabarata. Nejamatabëcuenebejibitsipame, jai dovathivi peyajavaponaponaenë Jesúsjavabelia.

⁸Bajarapacuenia jumaitsi dovathivi peyajavaponaponaenë tsipaji Jesús jerajavavetsina penonotajunaejavata, dovathivi peyajavaponaponaenë pemataenenaëjavatatsi, Jesús itaveta dovathivi. Jesús jumaitsi dovathivijavabelia mapacueniaje:

—¡Dovathivi, bajaraponë baja pavecuapitsapare! jai Jesús.

⁹Nexata Jesús jumaitsi bajaraponëjavabelia:

—¿Detsa pavënëmë? jai.

Nexata dovathivi peyajavaponaponaenë navënëpaeba.

—Tavënë raja Legión. Tsipaji raja bitso paayaibitsaëtoxfanetonë, jai dovathivi peyjavaponaponanënë.

¹⁰Nexata dovathivi pinijicuenia vajëta Jesúsjavabelia itsairabelia pejutsiya-nivatsi bajarapairavecua. ¹¹Nexata bajarajota, imoxoyo petsutojavata, marranobitsaëtoxfaneto xaevanapa. ¹²Dovathivi bitso vajëca Jesúsjavabelia.

—Paneitorobare marranobitsaëtoxfanetojavabelia. Panetocopare patajone-nexa bajara pamarranobitsaëtoxfanetojavabelia, jai dovathivi.

¹³Nexata Jesús tocopata pacuenia dovathivi vajëcatsi. Dovathivi baja pebi vecuapitsapecatsi. Nexata baja marranobitsaëtoxfanetojavabelia dovathivi junua. Bajara pamarranobitsaëtoxfaneto jinavanapa anijamilbeje ponëbeje. Nexata daxita marranobitsaëtoxfanetomi cujinaeyeca. Pucaxaneto itapajani-tuareca othopareca. Nexata daxita marranobitsaëtoxfanetomi meneta bubuna.

¹⁴Bajara pamarranobitsaëtoxfanetomi pevetavanapaevi rëcëpeca. Pona, pacuene tane, petsipaebineca tomarapijivijavabelia, petsipaebineca vaya-fotusatojava penaevijavabelia ata. Nexata jivi ponarena petaenexa bajarapacuene. ¹⁵Nexata dovathivi peyjavaponaponanënëmi bajarapamonae taeyeta Jesús pemuxuneneta. Bajaraponë penaxatatsijava baja naxatate-ca. Jamatejema baja. Xaniavaetsia eca. Nexata bajarapamonae cujunavatsi Jesús. ¹⁶Pamonae cuenetanetsi Jesús pejamatejemayaexanaejava dovathivi peyjavaponaponanënëmi, bajarapamonae paeba pepatsivijavabelia daxita pacuene tane. Paeba pacuene ata Jesús exana marranobitsaëtoxfanetojavabelia. ¹⁷Nexata Gerasa nacuapijivi jumaiti Jesúsjavabelia:

—Pexaniacuene pacavajëtatsi. Ponare baja patajanacuavecua, jai Gerasa nacuapijivi Jesúsjavabelia tsipaji cujunavatsi.

¹⁸Jesús baja itsa runareca jera ënëabereca, ponë dovathivi peyjavaponaponanënëmi, bitso picaní navajëca Jesús pepëta penaponanexa.

¹⁹Itsia Jesús apo jejai. Jumaiti bajaraponëjavabelia:

—Ponare nijaboyabelia. Nijamonae tsipaebare papinijicuene Dioso caexana. Tsipaebare pacuenia ata caitaxutotsoniatane Dioso, jai Jesús dovathivi peyjavaponaponanëmijavabelia.

²⁰Nexata baja dovathivi peyjavaponaponanënëmi pona. Taxuxuaba penavajunupaebijava papinijicuene Jesús exanatsi. Bajaraponë navajunupaebapona Decápolisvënë nacuajava. Decápolisvënë nacuata eca diez patomarabeje. Daxitajivi jamatabëcuenenabenajaca itsa jumetanetsi bajaraponë penavajunupaebaponaejava.

**Pacuenia Jesús copiaya namutoepatota jamatejemayaexana
piavitaneva, pacuenia icatsia cotocaevi toasaëyaexana Jairo
pexënatovayo, petëpaevayomi, yabara pelivaisi
(Mt 9.18-26; Lc 8.40-56)**

²¹Jesús icatsia pecovëyaberena jerata naviarena pucaxaneto itsapanaverena. Nexata tajetabojavatarena jivibitsaëtoxfaneto Jesús

matatoyoronatsi. ²²Nexata bajarajota napatajopa Jairovënënë. Bajaraponë judíovi penacaetuatabiabibo pevetsiviyajuvënënë. Jairo itsa taetaba Jesús, nexata Jairo pematabacabëta yayataeya Jesús pitabarata nucajunua.

²³Pinijicuenia Jairo vajëta Jesúsjavabelia. Jumaitsi:

—Taxënatoyo raja netobitso. Najumalipeneta rabaja petëpaenexa. Pexaniacuene netoexanare. Naxanitsia. Netoperabëjayatsianame necobeta petëpaeyaniva, jai Jairo.

²⁴Jejai Jesús. Jesús nexata napona Jairo pepëta. Nexata jivibitsaëtoxa-neto Jesús pepënaponaevitsi matatoyorotsia cënënanajetarubenatsi. ²⁵Bajarapajivibitsaëtoxa-neto tuatujëta itsava, pijanacuene pecapunaevatsi, nanajetaruca. Bajarapova pijanacuene pecapunaecujinaetsi doce baja pavaibeje xaina. ²⁶Bitso nexata bajarapova bejiobi pexainaecuene yabara pevaëbivitsi pejamatabëcueneta. Tsipaji belia daxita pexinaejavaximi navecuavereta pematamobaponaeta pevaëbivitsi. Itsiata apo caevi piavitanecuene. Biji caranata pevajënaeyabelia capunaponatsi piavitanecuene. ²⁷Nexata bajarapova jumetane itsamonae pecuaicuaijajava Jesús piavitanevi pejamatejemayaexanaponaeyava yabara. Nexata bajarapova ponataba Jesús pepënëvelia, jivibitsaëtoxa-neto tuatujëalia. Nexata bajarapova tojayataba Jesús penaxatatsijava. ²⁸Tsipaji cajena bajarapova jamatabëjumaitsi: “Itsa Jesús penaxatatsijava tojayatabianajë, tavitanejavami nevecuaajibi tsane,” jamatabëjai. ²⁹Nexata bajarapova itsa tojayataba Jesús penaxatatsijava, bajarajota pijanacuenemi vecuaajibitsi baja. Nexata bajarapova pijanacuenemi pecaevijavareca, nayapëtane. ³⁰Jesús ata nayapëtane pesaëta pejamatejemayaexanaeyava pepënëyabelia. Nexata pejayatabijavatatsi Jesús napënëyorotaxuaba. Naëcobaruta. Yanijoba jivijavabelia. —¿Jipatsa tanaxatatsijava netojayataba? jai.

³¹Nexata Jesús pijajivi jumaitsitsi:

—Taneme rabaja jivibitsaëtoxa-neto pecacënënanajetarubenaeyava. ¿Detsa xuajitsia: “¿Jipatsa tanaxatatsijava netojayataba?” jamë? jaitsi Jesús pijajivi.

³²Jesús naëcobaruta daxitajivijava petaenexa pajivi tojayatabatsi penaxatatsijava. ³³Nexata bajarapova neconecojai tsanucacae pecajunavi penayapëtaexae Jesús pejamatejemayaexanaejavatsi. Nexata bajarapova najetabarena Jesús pitabarayabarena. Pematabacabëta nucajunua. Nexata daxita pacuene exana, bajarapova tsipaeba Jesúsjavabelia. ³⁴Nexata Jesús jumaitsi bajarapovajavabelia:

—Xamë nesivajamatabëjumaitsimë: “Jesús penaxatatsijava itsa tojayatabianajë, tavitanejavami nevecuaajibi tsane,” nesivajamatabëjamë. Bajaraxuata jamatejemamë baja. Ponare baja jamatejema. Niavitaneyavami rabaja ajibi, jai Jesús bajarapovajavabelia.

³⁵Bajarapacuenia Jesús pejumaitsanucacajavata namutoepatota, Jairo pijaboverena peponaevi mataenenatsi. Bajarapamonae jumaitsi Jairojavabelia:

—Jairo, nexënatoyo rabaja tēpa. Pētsa baja matavējēa jamatabēitonota-poname Jesús, jai bajarapamonae Jairojavabelia.

³⁶ Jesús jumetae ata bajarapajume, itsiata jumaitsi Jairojavabelia:

—Jairo, pētsa najamatabēxainame. Najamatabēcuenecopare saya ēxa-nējavaberena nexënatovayo pecatoasaënexa, jai Jesús Jairojavabelia.

³⁷ Nexata Jesús, pajivibitsaētozaneto pēnanajetarubenatsi, pueneta bajarajota. Jesús pona Jairo pijaboyabelia. Jesús saya yajavalia mapamatabēxēyoje: Pedro, Juan, Santiago, Jairo jane baja. Juanbeje Santiagobeje nacaebananēbeje. ³⁸ Itsa baja Jesús palia Jairo pijaboyabelia, tane jivibitsaēto pinijijumeta pematanyabijava petēpaevayo. ³⁹ Jesús itsa joneya boyalia, jumaitsi bajarapamonaejavabelia:

—Pētsa bitso pamatanueyabame. Pejanava raja apo tēpae. Saya raja majitanuca, jai Jesús tsipaji yapētane Jesús piasaēyaexanaejavanexa bajarapovayo.

⁴⁰ Bajarapacuenia Jesús pejumaitsijava, bajarapamonae saya jumecapocaponatsi. Nexata daxita Jesús bovecua pitsapaeyaexana. Itsaxuayolia petēpaevayo boca, Jesús barējoneya caejiviyobeje saya. Jesús saya barējoneya mapamatabēxēyoje: petēpaevayo paxa, pena, Jesús pijajivi, acueyabi ponēbeje. Bajarapamatabēxēyo saya Jesús barējoneya. ⁴¹ Nexata Jesús petēpaevayo cobepita. Jesús pijajumeta jumaitsi:

—Talita cumi, jai, mapajumetaje pejumaitsijume: “Pejanava, nonotapunare,” pejaijume.

⁴² Bajarapacuenia Jesús pejumaitsijavata, pejanavayo nonotabapuna. Ponapona baja. Bajarapovayo doce pavaibeje xaina. Nexata Jesús peyavajavonevilia pinijicuenia jamatabēcuenenabenajaca bajarapacuenia itsa tane. ⁴³ Nexata Jesús pinijicuenia jumaitsi:

—Pētsa itsajivi ata patsipaebame mapacueneye, jai Jesús.

Bajaraxuacujinae Jesús jumaitsi pejanavayo penajavabelia:

—Nexënatovayo pexaejava rajure, jai.

**Pacuenia Jesús naviata pijanacuayabelia, Nazaret tomarabelia,
yabara pelivaisi**

(Mt 13.53-58; Lc 4.16-30)

6 ¹ Jesús baja, pijajivi yajava, pona Capernaum tomaravecua. Naviata pijanacuayabelia, pevitsabitomarabelia. ² Judíovi penacueraevetsimatacabita Jesús taxuxuaba jivi livaisi petsipaebijava judíovi penacae-tuatabiabibota. Ayaibitsaētozaneto pejumetaevitsi sivajamatabēcuenenabenajacatsi. Nexata bajarapamonae Jesús jamatabēcuenaebiatanetsi. Bajarapamonae Jesús yabara najumaitsi mapacueniaje:

—¿Detsa meta verena maponē capitsapa mapajamatabēcuenelivaisije? ¿Detsa pacuenia meta yapētane daxita mapacueneye? ¡Pitsipinijicuen maponē exanaje, vaxaitsi abaxē caeto ata apo taetsi! ¡Matapania

matanetsije! ³Maponëje vaxaitsiyajuvënënë. Carpinteronë. María pexëna-to. Bajaraponë pejuyapijivi Santiago, José, Judas, Simón. Papetiriavi ata vajatomarata jinavanapa, bajaraponë pejuyapijivi, najai bajarapamonae Jesús yabara.

Nacaetomarapijivixae, bajarapamonae Jesús apo jumexaniataetsi.

⁴Nexata Jesús jumaitsi bajarapamonaejavabelia:

—Bajara maitisabiabije. Diosojumepaebivi profetavi itsanacupijivi yaiyataeyabiabatsi. Itsiata pijanacupijivi, pijaviriavi, pijamonae ata, apo yaiyataeyabiabitsi, jai Jesús.

⁵Nexata Jesús bajarajota jivi ayaibitsaëtojavabelia pinijicuene pexanaejava apo tsitaexanae. Tsipaji apo jumecovënëtsitsi. Saya caejiviyobeje piavitanevi pecobeta jayata. Jamatejemaya exana. ⁶Nexata Jesús bitso najamatabëxaina. Tsipaji jivi apo jumecovënëtsitsi. Bajaraxuacujinae Jesús tsiquiritomaraxijava Dioso pitorobilivaisi jivi tsipaebanajetaruca.

**Pacuenia Jesús pijajivi itoroba Dioso pitorobilivaisi jivi
petsipaebanajetarubenaenexa yabara pelivaisi
(Mt 10.5-15; Lc 9.1-6)**

⁷Jesús junata pijajivi doce ponëbeje penacatuatsinexa. Nexata Jesús pijajivi itoroba anijanëbeje tsaponae. Jesús pijajivi pecaëjëpaejamatabëcuenetsi jamatabëcuenecaëjëpaeyaexana dovathi peyavajinavanapaevi pevecuacapitsapaponaenexa. ⁸Jesús jane baja pijajivi penaropobivajënae, Jesús jumaitsi pijajivijavabelia mapacueniaje:

—Pëtsa itsacuenejala ata pacaponame panijanamutonexa. Pëtsa pacaponame panemarue ata, doro ata, palata ata. Ènaeboyoy saya pacaponare. ⁹Itsiata pataxunaponare panenataxuxatabijava. Caejava panenaxatatsijava pajumaponare. Pëtsa anijacamisabeje pacaponame. ¹⁰Itsajota papatabiabianame, caebota pamajitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponae name, bajarapabovecua papitsapaenae name. ¹¹Patomarata apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, nexata paponae name bajarapatomaravecua. Paneponaevajënae bajarapatomarata panataxuatsapërëvarëbianame. Bajarapacuenia itsa panataxuatsapërëvarëbianame, bajarapatomarapijivi yapëtaena Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi. Xaniajanë pacuenia pacatsipaebijitsiatsi. Pamatacabi Dioso jivi naneconitsiaexanaena, bajarapamatacabi Dioso bitso naneconitsiaexanaenatsi patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodoma tomarapijivimi, Gomorra tomarapijivimi ata, bajarapaneconivajëto matatoxenetsia Dioso naneconitsiaexanaenatsi patomarapijivi apo pacacopiapitsi tsane, jai Jesús pijajivijavabelia.

¹²Nexata jane baja Jesús pijajivi naropoba Dioso pitorobilivaisi jivi petsipaebanajetarubenaenexa. Jesús pijajivi naropoba anijanëbeje tsaponae. Nexata Jesús pijajivi jumai tsaponae jivijavabelia:

—Pacopabare baja pibisiacuene paneexanabiabijava.

Panajamatabëcuenepënëyorore Diosojavabelia, jai tsaponae.

¹³Jesús pijajivi dovathi peyajavajinavanapaevi vecuacapitsapapona. Piavitanevi ata mataexabapona aceiteranëta. Bajarapacuenia Jesús pijajivi jamatejemayaexapona piavitanevi.

**Pacuenia bajayata Juanpijinë jivibautisabinëmi beyaxuabatsi
yabara pelivaisi
(Mt 14.1-12; Lc 9.7-9)**

¹⁴Herodes, Galileanacua pevetsinë. Nexata Herodes jumetane itsamonae jamatabëcuenenavëxaniabiaya pejumaitisijava Jesús yabara: “Juanpijinë raeta jivibautisabinëmi icatsia asaë petëpaecujinae. Bajaraxuata caëjëpatsi Dioso pesaëta pinijicuene pexanaenexa,” pejaijava itsamonae jamatabëcuenenavëxaniabiaya Jesús yabara, Herodes jumetane.

¹⁵Itsamonae pijinia jumai tsaponae Jesús yabara:

—Bajayata raeta ponëmi ponapona, profeta Elíaspijinëmi, baja raeta ponë, jai tsaponae itsamonae.

Itsamonae pijinia jumai tsaponae Jesús yabara:

—Diosojumepaebinë profeta raja. Tsipaji rabaja pacuenia bajayata profetavi jinavanapa, bajara icatsia maponë itsije, jai tsaponae itsamonae.

¹⁶Bajarapacuenia itsamonae jamatabëcuenenavëxaniabiaya pejumaitsaponaejava Jesús yabara, Herodes itsa jumetane, Herodes ata jamatabëcuenenavëxaniabiaya jumaitsi Jesús yabara:

—Maraeta Juanpijinëmije, ponëmi bajayata xanë tajajivi vësiucutaxua-biaexanajë. Icatsia raeta asaë petëpaecujinae, jai Herodes jamatabëcuenenavëxaniabiaya Jesús yabara.

¹⁷Bajarapacuenia Herodes jumaitsi tsipaji abaxë Juanpijinë itsa asaë, Herodes pijajivi, vajabitsaëvi, itoroba Juanpijinë pevaetabinexatsi. Nexata vajabitsaëvi Juanpijinë cobecëtsiaya caponatsi penaneconitsivi pejebabiabiboyalia. Bajarapacuenia Herodes pijajivi itoroba Herodes pijava, Herodíasva, pejamatabëcueneta. Herodíasva picani copiata pita Felipe, Herodes pejuyapijinë. Nexata Herodes pejuyapijinë pijava yacajërëta. ¹⁸Nexata Herodes pejuyapijinë pijava peyacajërëtsixae, Juanpijinë abaxë itsa apo vaetabitsi, muxujioba Herodes. Juanpijinë jumaitsi Herodesjavabelia:

—Acuenebi raja nejuyapijinë pijava nepitsijava,” jai Juanpijinë Herodesjavabelia.

¹⁹Nexata bajarapacuenia Juanpijinë pejumaitsixae, itoyatsi Herodíasva. Nexata abaxë Juanpijinë itsa ponapona penaneconitsivi pejebabiabibota,

bajarapova picani Juanpijinë jamatabëbeyaxuabiaexanatsi. Itsiata apo caëjëpaetsi. ²⁰Tsipaji Herodes yapëtane Juanpijinë bitso pejamatabë-xanepanaenëcuene. Nexata Herodes yaiyatane Juanpijinë. Bajaraxuata Herodes apo tocopatsi pijava pejamatabëcueneta pebeyaxuabinexatsi Juanpijinë. Juanpijinë itsa cuaicuajai tsabiabi Herodesjavabelia, nexata picani Herodes jamatabëbëjai tsabiabi pijaneconi yabara. Itsiata Herodes xaniavaetsia namuxunaevetabiaba. ²¹Nexata pamatacabi Herodes najamatabënapita penaexanaematacabi, najamatabëxaina pexaniafiesta pexanaenexa. Bajarapafiestajava Herodes junata pijaboyaberena jivi ayaibitsaëtozaneto penabaninexa. Junata Herodes pijajivi, pamonaetoevetatsi pijairanë. Junata vajabitsaëvi pevetsivinua. Junata petuxanevinua, Galilea nacuata pejinavanapaevi. Nexata bajarapafiestajavata Herodíasva toyapëxanepanatsi Juanpijinë pebeyaxuabiaexanaenexatsi. ²²Herodíasva toyapëxanepanatsi tsipaji pexënatoyo joneya Herodes pejunatsivi pebarënanabecaejavaliala pijacujirucuenia caevayo peyavajibinexa. Nexata Herodes pejunatsivi bitso barëitajitsipa pejionëyo peyavajibijava. Nexata Herodes najumecapanepaeya pexaniajaijumeta jumaitsi pejionëyojavabelia:

—Nevajëre xua jitsipame. Carajutsianatsi raja. ²³Pacunejjava nevajëtsianame, carajutsianatsi. Itsa nevajëtsianame taneevetsiaexanaenacua ata, tuatuajëjava carajutsianatsi, jai Herodes najumecapanepaeya pejionëyojavabelia.

²⁴Nexata bajarapovayo pitsatabalia. Jumaitsi penajavabelia:

—¿Detsamë ra xua vajëtsianajë? jai penajavabelia.

Nexata Herodíasva pexënatoyojavabelia jumaitsi:

—Juan jivibautisabinë pematabocoto vajëre, jai.

²⁵Nexata bepíjia bajarapovayo jopajoneya Herodes peecaejavabelia. Jumaitsi Herodesjavabelia:

—Jitsipajë cajena tanerajutsinexamë platota Juan jivibautisabinë pematabocoto, jai bajarapovayo Herodesjavabelia.

²⁶Nexata Herodes pinijicuenia bejamatabëjiobi tsanajetsireca. Herodes nexata acuenebi: “Jume,” pejaijava. Tsipaji baja Herodes najumecapanepaeya jumaitsi pejionëyojavabelia pexaniajaijumeta daxita pejunatsivi pitabarata. ²⁷Nexata Herodes bepíjia itoroba vajabitsaënë petocarenanexatsi Juan pematabocoto. ²⁸Vajabitsaënë nexata pona penaneconitsivi pejebabiabiboyabelia. Juanpijinëmi vësiucutaxuabatsi. Juanpijinëmi pematabocoto vajabitsaënë carena platota. Nexata pejanava rajutatsi. Nexata bajarapovayo juya pena rajuta. Nexata baja Herodíasva yapëtane capanepaeya baja Juanpijinë pebeyaxuabijavatsi.

²⁹Nexata Juanpijinë pijajivi itsa vënëtanetsi pebeyaxuabijavatsi, bajarapamonae ponarena Juanpijinë pebocaejavaberena. Pitatsi petëpaenë. Pepitsicujinaetsi Juanpijinë pijajivi mëthëtatsi.

Pacuenia Jesús pexaejava rajuta cinco mil ponēbeje yabara pelivaisi
(Mt 14.13-21; Lc 9.10-17; Jn 6.1-14)

³⁰ Jesús pitorobivi, apóstolevi, naviabanajetarubena Jesúsjavaberena. Nexata bajarapamonae Jesúsjavabelia navajunupaeba daxita pacuene exanavanapa, pacuenia ata jivi livaisi tsipaebavanapa. ³¹ Nexata Jesús jumaitsi bajarapamonaejavabelia:

—Naxanitsia. Ponatsi pesajinaejavabelia. Nacueraevetsianatsi caeepato-yo, jai Jesús.

Bajarapacuenia Jesús jumaitsi pijajivijavabelia tsipaji jivibitsaëtoxanetonē topatabiabatsi. Itsamonae naviabaponabiaba. Itsamonae juya patabiaba. Nexata Jesús pijajivi pebarēnabaninexa, apo cuenecaējēpabiabitsi. ³² Nexata Jesús ēpijajivi jerata yajavapona itsabelia jivi ajibi. ³³ Itsiata jivi ayaibitsaëtoxaneto pētanetsi Jesús peponaejava. Nexata itsabelia Jesús pona, matatsēnēa pēnacujinaerubenatsi daxita tomaranēpijivi. Caranata Jesús pevājēnaeyabelia pata bajarapamonae. ³⁴ Ita baja Jesús bana nono-bajunaya jeravecua, Jesús tane jivibitsaëtoxaneto. Nexata Jesús bajarapamonae itaxutobejibiatane. Nexata Jesús bajarapamonae sivajamatabējumaitsi mapacueniaje:

—Pacuenia baitsi ovejabitsaëtoxaneto itsa toajibitsi pevetsinētsi, bajara itsi mapamonaeje, sivajamatabējai Jesús.

Nexata Jesús ayaicuenia livaisi tsipaeba bajarapamonaejavabelia. ³⁵ Ita baja bitso caniviyotsia, Jesús pijajivi cujibarenatsi. Jumaitsi:

—Caniviyo rabaja bitso. Majota ajibi pexaejava. Tsipaji itsajivi ata pijabo apo xainae. ³⁶ Itorobare baja jivi peponaenexa imoxoyo penaetomaranējavabelia pecomuacaenexa pexaejava, jaitsi Jesús pijajivi.

³⁷ Jesús nexata jumaitsi pijajivijavabelia:

—Paxamē parajure pexaejava, jai.

Nexata Jesús pijajivi jumaitsi:

—¿Paponae ajē tsaja tomarabelia patacomuatsinexa pan doscientos denariota bajarapamonae pexaenexa? jai Jesús pijajivi.

³⁸ Jesús icatsia jumaitsi pijajivijavabelia:

—¿Detsa papanbēbeje paxainame paxamē? Pataema copiata, jai Jesús. Jesús pijajivi petaecujinae tsipaeba Jesúsjavabelia. Jumaitsi:

—Paxainajē saya cinco papanbēbeje, anijanēyobeje dujuainēyobeje yajava, jai Jesús pijajivi.

³⁹ Nexata Jesús itoroba daxitajivi penaenexa ponajavata. ⁴⁰ Nexata bajarapamonae pepobitsaëtonē natsanaeya ena. Caebitsaëtota enapona cien pajivibeje. Itsabitsaëtota enapona cincuenta pajivibeje. Bajarapacuenia caebitsaëto canacujitsia enapona. ⁴¹ Nexata Jesús pita cinco papanbēbeje, anijanēyobeje dujuainēyobeje yajava. Athēbēa benaēcotsia. Jumaitsi Diosojavabelia:



(Mr 6.41)

—Pexaniacuene panetoexaname. Panerajutame pataxaejava, jai Jesús.

Bajaraxuacujinae Jesús pan epatsicacapona. Pijajivijavabelia rajutapona pepatsicacaejava. Nexata juya Jesús pijajivi pan tsicobetsana jivijavabelia. Djuaijavaxi ata tsicobetsana jivijavabelia. ⁴²Daxita xaniavaetsia nabane. ⁴³Bajaraxuacujinae Jesús pijajivi caetuata pan, dujuai yajava, jivi peyajuvenëcopabejebijavanë. Nexata vënëba doce xuabeje bemapirecuenia pexanaejavanë. ⁴⁴Pamonae pexaejava xane, ayaibitsaëtoخانeto. Itsiata ëpebijivi namatajëtatsi cinco mil ponëbeje.

Pacuenia Jesús mene itaboxoya najetaruca yabara pelivaisi

(Mt 14.22-27; Jn 6.16-21)

⁴⁵Jesús jivi ayaibitsaëtoخانeto pexaejava perajutsicujinae, Jesús pijajivi bepijia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Jesús baja jivi naviabiaexana. Bajaraxuata abaxë caenë nacopatanuca bajarajota. ⁴⁶Itsa baja jivi napëvereta penaviabijava, Jesús junaya petsutojumabetsia peva-jëtsinexa Diosojavabelia. ⁴⁷Itsa baja bitso meravi, Jesús pijajivi pucaxaneto itapavecua tajë baja yanajetarubenalia. Jesús abaxë bajarapaepatota caenë nacopatanucarena pucaxanetoitapatarena. ⁴⁸Nexata Jesús tane pijajivi petoayapëbejebjavatsi pevaetsijava. Tsipaji bitso joviboxaneto ayai

pevajënaeverena. Bajaraxuacujinae bajayacunua, ajena matabijitsia, Jesús pijajivi pecovëvelia imoxoyotanjataruca. Jesús najetaruca mene itaboxoya. Rovia picaní xenetsijitsia. ⁴⁹Jesús pijajivi itsa tanetsi mene itaboxoya penajetarucajava, Jesús pijajivi jamatabëjumaitsi:

—iPetëpaenëmi raeta pejumape najetaruca! jamatabëjai.

Nexata Jesús pijajivi vavajai tsaxuabi ayajumeta. ⁵⁰Tsipaji daxita Jesús pijajivi tane bajarapacuenia penajetarucajava. Nexata Jesús pijajivi jamatabëcuenenajunaviaca. Nexata Jesús bepijiayo jumaitsi pijajivijavabelia:

—Xanë raja. Pëtsa panecujunavame. Pajamatejemamëre saya, jai Jesús pijajivijavabelia.

⁵¹Nexata baja Jesús nonolia bajarapajera ënëabelia. Ajibi baja tsaxuabi jovibo. Nexata Jesús pijajivi pinijicuenia jamatabëcuenenajunaviaca. Tsipaji tane jovibo, malataca yajava, Jesús piajibiaexanaejava. ⁵²Jesús baja picaní pijajivi copiaya tane, pan tsiquirijavayomi ata, jivibitsaëtoxa-netojavabelia Jesús perajutsijava. Itsiata Jesús pijajivi apo jamatabëcueneyapëtae Jesús pecaëjëpaenëcuenetsi pinijicuenene pexanaenexa. Abaxë bajarapamonae jamatabëcuenetaja.

**Pacuenia Jesús jamatejemayaexana piavitanevi Genesaret nacuata
yabara pelivaisi
(Mt 14.34-36)**

⁵³Jesús pijajivi jerata yajavapata puca itsapanabelia. Pata Genesaret nacuayabelia. Peyapatsijera bajarajota puca itapata querataruta. ⁵⁴Nexata Jesús, pijajivi yajava, nonotajunaya jeravecua. Bajarajota bepijia jivi yapëtanetsi Jesús cuene. ⁵⁵Nexata Jesús pepatsijava penatsipaebínexa, nava-junucacujinaejinaruta daxita bonëjava. Nexata piavitanevi pijacamaxita yavëtacarapatatsi itsajota jivi jumetane Jesús pepatsijava. ⁵⁶Jesús pata tsiquiritomaraxijava, pinijitomaranëjava ata, tomarapënëya penaebonëjava ata. Daxitajava, itsa patomarata Jesús patabiaba, bajarapatomaranëjava callejavata, jivi tojebabiabatsi piavitanevi. Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuenene bitso netoexanare. Tocopatsianame maponëje pecatojayatsínexa nenaxatatsijavacopia, jai tsabiabi.

Nexata daxita pamonaie Jesús penaxatatsijavacopia tojayataponatsi, jamatejema baja tsaponae piavitanejavamivecua.

**Pacuenia Jesús tsipaeba xua jivi jamatabëcuenebijianatsi
yabara pelivaisi
(Mt 15.1-20)**

7 ¹⁻⁴Daxita judíovi catsiteca pijasalinaivimi pijacuene. Judíoviyajuvënëvi, pamonaie fariseovi naexana, bajarapamonae

bitso catsiteca pijasalinaivimi pijacuene daxita judíovi matatoxenetsia. Jamatabëcuenenavëxaniabiaya jamatabëjumai tsabiabi:

—Itsa catsitecajë tajasalinaivimi pijacuene, nexata Dioso aneconijibia netaena, jamatabëjai tsabiabi.

Nexata bajarapamonae pijasalinaicuenia anijatonë xaniavaetsia itsa apo napënanacobequiatsi, pexaejava apo xaeyabiabi. Itsajota pexaejavacuene canajetabiaba, bajaraverena itsa naviaba pecomuacaecujinae, bajarapamonae pijasalinaicuenia xaniavaetsia itsa apo napënanacobequiatsi, pexaejava apo xaeyabiabi. Bajarapamonae pematatsënëa navitsia itsacujiruxi ata, pijasalinaivimi pijacujiru, catsiteca. Bajarapamonae tazaxi, mera peyajebinëanë ata, pecasetsinëanë ata, camanë ata, pijasalinaivimi pijacuenia xaniavaetsia quiatabiaba. Nexata judíovi pecujarubivi Jerusalén tomaraverena pata. Nexata judíovi pecujarubivi, fariseovi yajava, cujibarenatsi Jesús. Nexata bajarapamonae tane Jesús pijajivi judíovi pijasalinaicuenia anijatonë napënanacobequiatsinejeva penabanijava. Bajaraxuata bajarapamonae jumaitsi Jesúsjavabelia:

—Jesús, nijajivi naneconita Diosojavabelia. ⁵Tsipaji nijajivi apo jumecovënëtsiajinavanapae vajasalinaivi pijacuene. Nijajivi itsa xane pexaejava, anijatonë napëna apo nacobequiatabiabi, jai bajarapamonae Jesúsjavabelia.

⁶Jesús nexata jumaitsi bajarapamonaejavabelia:

—iPaxamë saya jivi paneyamaxëitojorobivi! Diosojumelivaisipaebinëmi profeta Isáfaspjinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumaitsijava paxamë yabara profeta Isáfaspjinë peyaquinaelivaisita jumaitsi mapacueniaje:

Bajarapamonae nejitsipaena saya pijumeta. Itsiata pepo tanejitsipaejamatabëcuene nevecuatajë tsane. ⁷Saya baitsi bajarapamonae pijajumaitsita tsane: “Pacajitsipatsi,” nejai itajara tsane. Itsiata apo xaniajai tsane. Bajarapamonae saya jivi tsipaebaponaena pejamatabëcuenepijilivaisi. Pepo taitorobilivaisi apo tsipaebi tsane,

jai tajëvelia Dioso pejumaitsijava paxamë yabara Isáfaspjinë peyaquinaelivaisita, jai Jesús bajarapamonaejavabelia.

⁸Jesús icatsia jumaitsi fariseovijavabelia, judíovi pecujarubivijavabelia ata:

—Paxamë Dioso papecaitorobicuenia apo paexanaemë. Caranata ëvajasalinaivi pijacuene pacatsitecame.aebaponaena pejamatabëcuenepijilivaisi. Pepo Nexata vajasalinaivi pijacuenia xaniavaetsia paquiatabiabame mera peyajebinëanë. Xaniavaetsia paquiatabiabame tazaxi ata. Pematatsënëa navitsia itsacujiru ata pacatsitecame. ⁹Apo pajumecovënëtsimë Dioso pitorobilivaisi vajasalinaivi pijacuene panecatsitecaenexa. Apo pajumecovënëtsi atamë Dioso

pitorobilivaisi, jamatabëcuenenavëxaniabiaya pajamatabëjumaitsimë tsa-biabi: “Pexaniacuene raja exanajë,” pajamatabëjamë tsabiabi. ¹⁰Bajayata Dioso najumecopata Moiséspijinëta. Bajarapalivaisi jumaitsi: “Axa yayataema. Ena ata yayataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinëta penajumecopatsilivaisi. ¹¹⁻¹²Itsiata baitsi jane paxamë jivi pamuxubijapienetababame peyaiyataeyaniva paxajivi, penajivi ata. Paxamë pajumaitsimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenonaejala, jumaitsimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita baxaxua tsipaebajë baja tarajutsinexa Diosojavabelia. Nexata baja acuenebi patacarajutsinexabeje,’ jamë tsane neyavenonaeyaniva,” pajamë tsabiabi jivijavabelia. ¹³Nexata caranata Dioso pejumaitsi jume: “Axa yayataema. Ena ata yayataema,” peaijume, paxamë jivi pacopabiaexanaponame. Tspaji paxamë patsipaebaponame saicaya vajasalinaivimi pijalivaisi. Itsalivaisianë ata pematatsënëa saicayacuenia patsipaebaponame Dioso pitorobilivaisivecua, jai Jesús judfovi pecujarubivijavabelia, fariseovijavabelia ata.

¹⁴Nexata icatsia Jesús junata jivi. Jumaitsi jivijavabelia:

—Daxita paxamë panenamuxunaevere xaniavaetsia patanejumeyapëtaenexamë. ¹⁵Xua jivi pecuibota xane, pexaevajënae napëna anijatonë apo nacobequiatsi ata, apo jamatabëcuenebijianaetsi. Apo vënananeconitsi Diosojavabelia. Baitsi rajane xua jivi najamatabëxaina pejamatabëëthëtovetsina, xua ata pibisiacuenia cuaicuaijai, bajara baitsi jane xua jivi bajamatabëcuenebijianatsi. ¹⁶Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús.

¹⁷Itsa baja Jesús jivivecua natixita, boya joneya. Nexata boyalia pijajivi yanijobatsi bajarapalivaisi. ¹⁸Nexata Jesús jumaitsi pijajivijavabelia:

—¿Paxamë ata tsarovia abaxë apo panejumeyapëtaemë? Daxitacuene raja pexaejava jivi xae ata, apo jamatabëcuenebijianaetsi. Diosojavabelia apo vënananeconitsi. ¹⁹Tspaji raja jivi pexaejava apo tsijamatabëëthëjointsi. Saya pënëareca joneca. Bajaraxuacujinae icatsia vecuapitsapatsi, jai Jesús.

Bajarapacuenia Jesús jumaitsi Jesús pijajivi peyapëtaeyaxanaenexa pacuenia daxitacuene jivi pexaejava xae ata, apo pibisiacueni.

²⁰Icatsia Jesús jumaitsi:

—Baitsi rajane jivi pejamatabëëthëtojavavetsina, papibisiajamatabëcuene pitsapa, bajara baitsi jane xua jivi jamatabëcuenebijianatsi. ²¹Tspaji rabaja jivi pejamatabëëthëtojavavetsina pitsapa pibisiacueni penajamatabëxainaenexa. Pitsapa pebi pijava pevecuanamatayajitsi jamatabëcuenenexa. Pitsapa petirivijavabelia pebi penaperabëquenetsiatae jamatabëcuenenexa. Pitsapa jivitonë pebeyaxuabijamatabëcuenenexa. ²²Pitsapa penacobetoxotsijamatabëcuenenexa. Pitsapa itsamonae

pecobecovë penaxainaeyabijamatabëcuenenexa. Pitsapa piacujirubejejamatabëcuenenexa. Pitsapa itsamonaejavabelia peyamaxëitojorobijamatabëcuenenexa. Pitsapa itsamona pexainaecuene pecobecaëbijamatabëcuenenexa. Pitsapa itsajivi pibisiacuena pebaracuaicuaijai jamatabëcuenenexa. Pitsapa ayaijamatabëcuenejivi penataejamatabëcuenenexa. Pitsapa saya jema peponaponaejamatabëcuene-nexa. ²³Daxita bajarapajamatabëcuene jivi pejamatabëëthëtojavavetsina pitsapa. Nexata bajarapacuene jivi jamatabëcuenebijnatsi, jai Jesús pijajivijavabelia.

**Pacuenia Jesús itsanacuapijiva pexënatoyo tojamatejemayaexana
yabara pelivaisi
(Mt 15.21-28)**

²⁴Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Nexata Jesús bajarapanacuatalia bota patajopa. Muetsia picaní Jesús patsijitsia. Itsiata acuenebi muetsia pepatsijava. ²⁵Nexata bepíjia petiriva vënëlivaisitaetabatsi Jesús pepatsijava. Nexata petiriva pata Jesúsjavaberena. Nexata bajarapova yayataeya Jesús pitabarata pematabacabëta nucajunua. Bajarapova pexënatoyo dovathi yajavaponapona. ²⁶Bajarapova sirofeniciaviriava, apo judíova. Nexata Jesúsjavabelia jumaitsi:

—Pexaniacuene bitso netoexanare. Taxënatovayo netovecuacapsapare dovathi, jai bajarapova.

²⁷Nexata Jesús jumaitsi bajarapovajavabelia:

—Copiaya abaxë veyavenonajë tajanacuapijivi, judíovi. Tsipaji apo xanepanae xamë itsanacuapijivamë copiaya tacayavenonaenexa. Xamë copiaya itsa cayavenonaejitsipatsi, nexata pacuenia pejevaxi pexaejavaminexa yacajërëtsipajë tarajutsinexa avirixijavabelia, bajara itsinë tsipae, jai Jesús bajarapovajavabelia.

²⁸Itsiata baitsi jane bajarapova ajumesaë tsaponae. Icatsia jumaitsi Jesúsjavabelia:

—Xaniajamë rabaja picaní. Itsiata neyavenonare. Tsipaji avirixi ata mesa bëxëpanata itsa nubena, nexata pejevaxi pexaepanpërë itsa othopareca mesa bëxëpanareca, banaxane avirixi ata. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

²⁹Nexata icatsia Jesús jumaitsi bajarapovajavabelia:

—Xaniavaetsia nejumecanaviatame. Naviare baja nijaboyabelia. Dovathi rabaja catovecuapitsapatsi nexënatovayo, jai Jesús.

³⁰Itsa baja bajarapova pijaboyabelia pata, pexënatovayo taeyabuata jamatejema baja pebocaejava camata. Nexata yapëtane pexënatovayo baja petovecuapitsapaejavatsi dovathi.

**Pacuenia Jesús jamatejemayaexana bitso siyanë, apo
pejumetaenë, piajumecëcënë, yabara pelivaisi**

³¹Jesús baja naropota Tiro nacuavecua. Najetaruca Sidón nacujava. Bajaraxuacujinae najetaruca Decápolis nacujava. Bajaraxuacujinae

patajopa Galilea pucaxanetojavabelia. ³²Bajarajota jivi tocapatatsi siyanë, bitso apo pejumetaenë, piamumecëcënë. Nexata bajarapamonae jumaitsitsi Jesúsjavabelia:

—Jesús, pexaniacuene panetoexanare. Panetojayare maponëje pejumetaenexa, pecuaicuaijainexanua, jai bajarapamonae.

³³Nexata Jesús jivivecua bajaraponë barëpona pesaicaeyojavabelia. Nexata Jesús pecobesitota namataenetsia muxuvojobëta. Bajaraxuacujinae nacobesioniata. Ebarëtojayata. ³⁴Nexata Jesús athëbëa benaëcotsia. Jesús athëbë venajumalixuabica. Nexata Jesús pijajumeta jumaitsi bajaraponëjavabelia:

—iEfata! jai.

“Efata,” pejajume Jesús pijajumeta, mapajumetaje pejumaitsijume: “iMuxuvojorucaremelia!” pejajume.

³⁵Bajarapacuenia Jesús pejumaitsijavata, bajaraponë muxuvojorucalia baja. Jumetane jane baja. Peebarëto ata jane baja xanepana. Natsipaeba baja xaniavaetsia. ³⁶Nexata Jesús jumaitsi bajaraponë petocapatsivitsijavabelia:

—Pëtsa papaebame itsamonaejavabelia pacuene exanajë maponëjavabeliaje, jai picani Jesús asaëyata.

Itsiata bajarapamonae jumeitavetsi atatsi, bitso tsipaebapona jivijavabelia. ³⁷Nexata pamonae jumetane bajarapalivaisi, pinijicuenia jamatabëcuenenabenajaca. Bajarapamonae jumaitsi:

—Bajaraponë, Jesús, daxitacuenovitane pexainaevi ata xaniavaetapona. Siyavi ata, bitso apo pejumetaevimi ata, jumetaeyaexanapona. Apo pecaëjëpaevitsi ata pecuaicuaijaijava, cuaicuaijaiyaexanapona xaniavaetsia, jai bajarapamonae Jesús yabara.

Pacuenia Jesús rajuta pexaejava bejamatabëcuene cuatro mil pajivibeje yabara pelivaisi
(Mt 15.32-39)

8 ¹Itsamatacabi Jesús jivibitsaëtoxaneto muxunanacaetuatatsi. Nexata bajarapamonae penabaninexa, bajarajota pexaejava apo xinae. Nexata Jesús junata pijajivi. Jesús jumaitsi pijajivijavabelia mapacueniaje:

²—Netsitabejiobi baja rovia mapamonaeje. Tsipaji baja ajena acueyabi pamatacabibeje xaina xanëjavata pejinavanapaecujinae. Pemarue baja tovereverecatsi. ³Itsa meta itorobijitsipajë pijabonëjavabelia peponaenexa pexaejava xaenejeva, apo asaë meta tsipae namutua peponaejava. Tsipaji raja itsamonae pata tajëverena, jai Jesús pijajivijavabelia.

⁴Nexata Jesús pijajivi jumaitsi:

—¿Detsa jane pacuenia pexaejava berajutatsi? Majotaje ajibi pexaejava. Tsipaji itsajivi ata pijabo apo xinae, jai Jesús pijajivi.

⁵Nexata Jesús yanijoba pijajivijavabelia.

—¿Detsa papanbêbeje paxainame? jai.

Nexata Jesús pijajivi jumaitsi:

—Siete papanbêbeje paxainajê, jai.

⁶Nexata Jesús itoroba daxitajivi penaenexa irata. Nexata Jesús pita siete papanbêbeje. Nexata Diosojavabelia Jesús jumaitsi:

—Pexaniacuene panetoexaname. Panerajutame pataxaejava, jai.

Bajaraxuacujinae Jesús epatsicacapona pan. Nexata Jesús pepatsicacae-pan rajutapona pijajivijavabelia. Nexata juya Jesús pijajivi bajarapapan tsicobetsana daxitajivi pexaenexa. ⁷Djuainëxinua xaina. Icatsia Jesús jumaitsi Diosojavabelia dujuainëxi yabara:

—Pexaniacuene panetoexaname. Panerajutame dujuainëxi, jai.

Nexata icatsia pijajivi itoroba petsicobetsanaenexa daxitajivi bajarapadjuainëxi. ⁸Daxitajivibitsaëtozaneto nabane xaniavaetsia. Nexata peyajuvenëcopabijavanê Jesús pijajivi caetuata. Vënëba siete xuabeje bemapi-recuenia pexanaejavanê. ⁹Pexaejava nabane bejamatabëcuene cuatro mil pajivibeje. Nexata jane baja pexaejava pexaecujinae, Jesús jivi naviabiaexana pijabonëjavabelia. ¹⁰Bajaraxuacujinae Jesús, pijajivi yajava, runareca jera ënëabereca. Jesús pijajivi barëpona Dalmanuta nacuyabelia.

**Pacuenia fariseovi Jesús itorobatsi Dioso pesaëta pinijicuene
pexanaejava petsitaexanaenexa picani yabara pelivaisi
(Mt 16.1-4; Lc 12.54-56)**

¹¹Fariseovi Jesúsjavaberena pata. Bajarapamonae jamatabëcueneëjë-biaya jumenotaponatsi. Nexata bajarapamonae jumaitsi Jesúsjavabelia:

—Jesús, Dioso pesaëta pinijicuene exanare. Nexata pacacueneyapëtaenatsi Dioso pepacuene athëbëvetsica pecaitorobinëcuenetsica, jai.

¹²Nexata bajarapamonae yabara Jesús bitso jamatabëcuenebëjai. Nexata Jesús athëbë venajumalixuabica. Jumaitsi:

—¿Detsa xuajitsia panevajëcame pinijicuene patacatsitaexanaenexa pataneyapëtaenexamê pepacuene Dioso athëbëvetsica taneitorobinëcuenetsica. Xaniajanê pacuenia pacatsipaebijitsiatsi. Itsiata apo pacatsitaexanaetsi tsane pinijicuene taexanaejava, jai Jesús.

¹³Nexata baja Jesús bajarapamonae vecuapona. Icatsia runareca jera ënëabereca. Pucaxaneto itsapanabelia baja Jesús pona.

**Pacuenia Jesús pijajivi muxujioba fariseovi petsipaebilivaisi
pejumecovënëtsiyaniva yabara pelivaisi
(Mt 16.5-12)**

¹⁴Jesús pijajivi nacofënëta pamarue. Nexata saya caepanbëyo capona jerata. ¹⁵Nexata Jesús pijajivi muxujioba pejumecovënëtsiyaniva fariseovi itsa tsipaebatsi saicayacuenia Dioso pejumelivaisivecua. Jesús jumaitsi pijajivijavabelia mapacueniaje:

—Panejumetaema. Xania panayajivitaema fariseovi pijalevadura, jai Jesús pijajivijavabelia.

Bajarapacuenia Jesús jumaitsi fariseovi petsipaebilivaisi, nacuaevetsinë ata, Herodes, petsipaebilivaisi, Jesús pijajivi pejumecovënetsiyaniva.

¹⁶ Itsiata Jesús pijajivi apo jumeyapêtaetsi. Bajaraxuata Jesús pijajivi nabarêcuaicuajai bajarapacuenia Jesús pejumaitsijume yabara. Jesús pijajivi najumaitsi:

—Jesús nacajumaitsi: “Xania panayajivitaema fariseovi pijalevadura,” nacajai. Baja raeta pacuenia Jesús nacajumaitsi pan apo vajacaponaexae, najai Jesús pijajivi.

¹⁷ Jesús pijajivi jamatabêcueneyapêtane bajarapacuenia jamatabêcuene navêxaniabiaya penajumaitsijava levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimê: “Baja raeta pacuenia Jesús nacajumaitsi pan apo vajacaponaexae,” panajamê? Paxamê abaxê apo panejumeyapêtaemê xua yabara pacajumaitsi. Pajamatabêcuenetajamê bitso. ¹⁸ Pan yabara raja apo pacajumaitsi. Pan itsa namatavenonaejitsipatsi, necaêjêpa taexanaenexa. ¿Apo panajamatabênapsitimê tsipaji pacuenia exanajê pamatacabi pan namatavenonatsi? ¹⁹ Pacujinae epatsicacajê cinco papanêmibeje panetsicobetsanaenexa cinco mil ponêbejejavabelia, bajarapacujinae peyajuvênêcopabijavanê, ¿detsa xuabeje pavênêtame bemapi-recuenia pexanaejavanê? jai Jesús pijajivijavabelia.

Nexata Jesús pijajivi jumaitsi:

—Doce xuabeje pavênêtajê, jai.

²⁰ Jesús icatsia jumaitsi:

—Pacujinae epatsicacajê siete papanêmibeje panetsicobetsanaenexa cuatro mil pajivibejejavabelia, bajarapacujinae peyajuvênêcopabijavanê, ¿detsa xuabeje pavênêtame bemapi-recuenia pexanaejavanê? jai Jesús.

Nexata Jesús pijajivi jumaitsi:

—Siete xuabeje pavênêtajê, jai.

²¹ Nexata Jesús jumaitsi pijajivijavabelia:

—¿Panejumeyapêtaneme tsabaja pan yabara apo patacajumaitsi-ja-va? Xanê pacajumaitsi: “Xania panayajivitaema fariseovi pijalevadura,” pacajaitsi. Bajarapacuenia pacajumaitsi panejumecovênetsiyaniva fariseovi petsipaebilivaisi, panejumecovênetsiyaniva nacuaevetsinë ata Herodes. Tsipaji bajarapamonae pacatsipaebiana saicayacuenia Dioso pejumelivaisivecua, jai Jesús pijajivijavabelia.

**Pacuenia Jesús itaxutoxaniavaeta bitso pitaxutotsêcênaenê,
apo petanê tsiquirijavayo ata, yabara pelivaisi**

²² Jesús, pijajivi yajava, patajopa Betsaida tomarata. Nexata Jesús tocanaje-tarubenatsi bitso pitaxutotsêcênaenê, apo petanê. Pinijicuenia vajêcatsi Jesús

pitaxutojayatsinexa bajaraponë pitaxutoxanepanaenexa. ²³Nexata Jesús cobepita. Barëpona pesaicaeyojavabelia, tomarapënëyabelia. Nexata bajarajotalia Jesús peionitota itaxutoexaba. Itaxutojayata. Bajaraxuacujinae Jesús yanjíjoba.

—¿Cacaëjëpa tsabaja netaejava? jai Jesús.

²⁴Nexata bajaraponë naëcota. Jumaitsi:

—Taniji pebijivi pejinavanapaejava. Itsiata saya benetsita naejavanë, jai bajaraponë.

²⁵Nexata icatsia Jesús itaxutojayata. Bajara jane xaniavaetsia naitaxutobabatsiaya naëcota. Itaxutoxanepana jane baja. Xaniavaetsia baja tane.

²⁶Nexata Jesús jumaitsi bajaraponëjavabelia:

—Naviare nijaboyabelia. Pëtsa abaxë poname tomarabelia. Pëtsa pae-bame itsajivijavabelia ata pacuene caexanatsi, jai Jesús.

Pacuenia Pedro jumaitsi Jesúsjavabelia: “¡Xamë raja Cristomë! jai yabara pelivaisi

(Mt 16.13-20; Lc 9.18-21)

²⁷Jesús, pijajivi yajava, najetaruca. Pona pepatsinexa Cesarea de Filipovënë tomarajumaverena penaetomaraxijavabelia. Namutua abaxë penajetarubenaiejavata Jesús jumaitsi pijajivijavabelia:

—¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

²⁸Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta, profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Bajayata raeta Diosojumepaebivimi profetavimiyajuvënë icatsia asaë,” jai tsabiabi xamë yabara, jai Jesús pijajivi.

²⁹Nexata icatsia Jesús jumaitsi pijajivijavabelia.

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

Nexata Pedro jumaitsi Jesúsjavabelia:

—Xamë cajena Cristomë, athëbëvetsica Dioso pecaitorobinëtsica jivi necapanepaenexa, jai Pedro Jesúsjavabelia.

³⁰Nexata Jesús pijajivijavabelia jumaitsi:

—Pëtsa bajarapacuenia itsajivijavabelia papaebame. “Cristo raja,” pajamë pëtsa xanë yabara, jai Jesús.

Pacuenia Jesús tajëvelia navajunupaeba pebeyaxuabijavanexatsi yabara pelivaisi

(Mt 16.21-28; Lc 9.22-27)

³¹Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueniaje:

—Xanë, Daxitajivi Pematapijinënë, pinijicuenia bejiobinë tsane. Judíovi pijaancianovi, sacerdotevi penamatacaitorobivina, judíovi pecujarubivina, apo nejumecovënëtsi tsane Cristonëcuenenë. Nexata bitso nebejiobiaexanaena. Bajaraxuacujinae nebeyaxuabiana. Itsiata baitsi jane tatëpaecujinae, acueyabi matacabita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

³² Jesús jumenapebetsiaya pijajivi xaniavaetsia tsipaeba mapajumeje. Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—Pëtsa bajarapacuenia cuaicuaijamë netëpaejavanexa yabara, jai Pedro Jesúsjavabelia.

³³ Nexata Jesús Pedrovecua napënëyorotaxuaba. Taenuca pijajivi penaejavabelia. Nexata Jesús napënëyorotsia jumai tsanucac Pedrojavabelia:

—iDovathi, nevecuanatixire! Tsipaji xamë apo jitsipaemë pacuenia Dioso jitsipa taexanaenexa. Saya ëjivi pacuenia jitsipa taexanaenexa, jitsipame, jai Jesús.

³⁴ Nexata Jesús junata pijajivi, daxita jivibitsaëto yajava. Jumaitsi bajarapamonaejavabelia:

—Pajivi jitsipa tanepënaponaejava, bajarapajivi copatsi pejitsipaecuenia pexanaenexa penajamatabëxainabiabijavami. Exanaponaponaetaitorobicuenia. Najamatabëcueneveretsinua bejiobiaexanaejitsia atatsi, beyaxuabijitsia atatsinua, Dioso pejumelivaisi yabara pijamatabëcuenesaë tsaponaponaenexa. Nexata jane baja xuacujinae nepënaponaena. ³⁵ Pajivi exanaponapona penatojitsipaecuenia, apo xainae tsane matacabi apo pevereceajava. Pajivi xanë tajamatabëcueneta copata penatojitsipaecuenia pexanabiabijavami, jivi tacapanepaelivaisitanexa pejamatabëcuenetanua, bajarapajivi xainaena matacabi apo pevereceajava. ³⁶ Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuenae xainae ata mapanacuapijicuenaje, itsiata nacuerata. Tsipaji pexainaeacuenae apo capanepae tsanetsi Diosojavabelia. ³⁷ Tsipaji acuenebi tsane itsajivi ata pematamotsinexa penaxuabianiva Diosovecua. ³⁸ Pajivi tajajivitonë ata, Dioso apo pejumecovënëtsivi tuatuajëta, pibisiacuenae pexanaevi tuatuajëta ata, navënëlivaisicaura tsane xanë tajajivitonëcuenae, tanejumecovënëtsijava ata yabara, nexata juya xanë bajarapajivi, tajajivitonë ata, tajajivitonëcuenae vënëlivaisicauranë tsane taxa Diosojavabelia. Bajarapajivi vënëlivaisicauranë tsane pamatacabi icatsia patsianicajë. Baitsi pamatacabi xanë, Daxitajivi Pematapijinënë, ángelevi yajava, patsianicajë, pamatacabi yajavapatsianicajënua taxa Dioso pijapenivenivenaecotia, jai Jesús pijajivijavabelia.

9 ¹ Icatsia Jesús jumaitsi jivijavabelia:

—Xaniajanë pacuenia pacatsipaebijitsiatsi. Daxita paxamë patëpaenejevamë, Dioso taxuxuabiana pijajivi pevetsijava mapanacuataje.

Nexata paxamëyajuvënëvi pepuatae tsane Dioso petaxuxuabijava pijajivi pevetsijava mapanacuataje, tēpaena. Dioso raja pijajivi evetsiana pinijijamatabēcuenesaëta, jai Jesús jivijavabelia.

Pacuenia Jesús caeepatoyo perabēnivenivenataba yabara pelivaisi

(Mt 17.1-13; Lc 9.28-36)

²Jesús petēpaejavanexa tajēvelia penavajunupaebicujinae, seis pama-tacabibecujinae, Jesús pijajivi, acueyabi ponēbeje, barēpona pinijitsuto-xanetojumabetsia. Jesús barējunaya mapamatabēxēyoje: Pedro, Santiago, Juan. Bajarapamatabēxēyo Jesús barējunaya pinijitsutoxanetojumabetsia. Nexata petsutojumatatsia Jesús perabēnivenivena bajarapamonae pitabara-ta. ³Jesús penaxatatsijava bitso nivenivena. Bitso niojai. Mapanacuataje pexaniaquiatsiva ata apo caējēpaetsi bajarapacuenia peniojaiyaexanae-na. ⁴Jesús pijajivi bajarajota tane jemata penaitajētsijava bajayata petē-paenēmibeje, Eláspijinēbeje Moiséspinjinēbeje. Jesús barēcuaicuaijaisi bajaraponēbeje. ⁵Nexata Pedro jumaisi Jesúsjavabelia mapacueniaje:

—iPatajatuxanenē, pijacuaxae panebarēponame! Pacatoexanaenatsi acueyabi pabobērēto-beje. Itsabobērēto xamēnexa tsane. Itsabobērēto Moisésnexa tsane. Itsabobērēto Elíasnexa tsane, jai Pedro Jesúsjavabelia.



(Mr 9.4)

⁶Bajarapacuenia Pedro jumaitsi Jesúsjavabelia canaējētsinejeva. Tsipaji bitso bajarapamonae najunaviaca. Nexata apo yapētae pacuenia jumaitsijsitsia. ⁷Nexata daxita bajarapamonae pematatsēnēvētsica itarērēbo mataacataxuabatsi. Nexata bajarapamonae jumetane bajarapaitarērēbojavavetsica Dioso pejumaitsijsiva.

—Mara ponē taxēnato, tasivanēje. Panamuxunaevere bajaraponē, jaiticsica Dioso Jesús pijajivijavabelia.

⁸Bajarajota bajarapamonae itsa naēcobarēcēpalia Jesúsjavabelia, ajibi baja bajaraponēbeje. Caenē baja Jesús nuca.

⁹Nexata Jesús pijajivi itsa barērunanucaponaica petsutojumavetsica, jumeitaveta pijajivi. Jumaitsi pijajivijavabelia:

—Pētsa patsipaebame itsajivi ata pacuene pataneme. Matapania xanē, Daxitajivi Pematapijinēnē, icatsia asaēnē tsane tatēpaecujinae, nexata jane baja matapania patsipaebianame, jai Jesús pijajivijavabelia.

¹⁰Bajarapamonae, acueyabi ponēbeje, jumecovēnēta pejumaitsicuenia-tsi. Itsiata ēpamonae nayanijobabiaba.

—Jesús jumai tsabiabi: “Tatēpaecujinae icatsia asaēnē tsane,” jai tsabiabi. ¿De tsamēra pajamatabēcuene xaina bajarapalivaisi? najai tsabiabi bajarapamonae.

¹¹Nexata Jesús pijajivi yanijoba Jesúsjavabelia. Jesús pijajivi jumaitsi:

—Patajatuxanenē, ¿detsa xuajitsia judíovi pecujarubivi jumai tsabiabi: “Bajayata ponēmi ponapona, Elíaspijinē, petēpaecujinae icatsia asaē tsane. Bajaraponē copiata patsiana. Bajaraxuacujinae patsiana Cristo, ponē Dioso athēbēvētsica itorobijitsiatsica pepo vajanacacapanepaenēnexa jane baja,” jai tsabiabi? jai Jesús pijajivi Jesúsjavabelia.

¹²Nexata Jesús jumaitsi pijajivijavabelia:

—“Copiata Elíaspijinē patsiana. Nexata bajaraponē jamatabēcuene-xanetsiana daxitajivi,” itsa jai, Juanpijinēmi jivibautisabinēmi yabara jumaitsi. Nexata baja xaniajai pacuenia judíovi pecujarubivi jumaitsi. Tsipaji baja Juanpijinē tavajēnaeya jivi jamatabēcuenexanetanajetaruca. Xanē, Daxitajivi Pematapijinēnē, athēbēvētsica Dioso nitoroba jivi tapanepaenexa. Nexata xanē yabara tajēvelia Dioso pejumelivaisibaxutota jumaitsi mapacueniaje: “Bejiobi tsane pinijicuenia. Apo jitsipaetsi tsane. Naitaxutojematsianatsi,” jai xanē yabara tajēvelia Dioso pejumelivaisibaxutota, jai Jesús pijajivijavabelia.

¹³Jesús icatsia jumaitsi pijajivijavabelia Juanpijinēmi yabara:

—Xaniajanē pacuenia pacatsipaebijitsiatsi. Elíaspijinē rabaja patajopa. Pepatsicujinae baja exanatsi daxita pacuenia jamatabēexanatsi. Nexata exanatsi pacuenia baja cajena Dioso pejumelivaisibaxutota tajēvelia jumaitsi bajaraponēmi yabara, jai Jesús pijajivijavabelia Juanpijinēmi yabara.

**Pacuenia Jesús jamatejemayaexana pejevaxinē, dovathi
peyajavaponaponaenē, yabara pelivaisi
(Mt 17.14-21; Lc 9.37-43)**

¹⁴ Jesús pijajivi, acueyabi ponēbeje, petsutojumabetsia pebarēponaecujinae, icatsia barēnaviatsica. Itsamonae Jesús pijajivi pepuenetsivijavabetsica, barēnaviatsica. Nexata Jesús tane pijajivi jivibitsaētoxaneto pevajēnae pematatoyoronaejavatsi. Jesús tanenua judfovi pecujarubivi anaeya pejumenotsijavatsi Jesús pijajivi. ¹⁵ Nexata bajarapamonae itsa taerēcēpa Jesús, daxita jamatabēcuenabarēyaya cujinaeyeca Jesúsjavabelia pebajacobinexatsi Jesús. ¹⁶ Nexata Jesús jumaitsi bajarapamonaejavabelia:

—¿Detsa xua yabara panajumeanaenotame pinijicuenia? jai Jesús.

¹⁷ Caenē bajarapajivi bitsaētoxanetoyajuvēnēnē jumaitsi Jesúsjavabelia:

—Jesús, mara picani taxēnatonēyo, dovathi peyajavaponaponaenēyo, catocanajetarucatsije. Maponēyoje dovathi apo netonatsipaebiaexanaetsi.

¹⁸ Itsa raja dovathi vaetababiabatsi, irata xuababiabatsi. Nexata bajarajota pecuibothamu tsabiabi. Vonoquirajainua tsabiabi. Daxitanēyo aperabēbaba tsatababiabireca. Picani raja nijajivijavabelia jumaitsinē: “Panetovecuacapsapare dovathi,” janē. Itsiata bajarapamonae apo caējēpaetsi tanetovecuacapsapaenexa, jai bajaraponē Jesúsjavabelia.

¹⁹ Jesús nexata jumaitsi pijajivijavabelia:

—iPaxamē baja rovia apo pajumecovēnētsimē Dioso papecayavenonaejavanexa! Bajaraxuata apo pacajamatabēcuenecaējēpae pejevaxinē panevecuacapsapaenexa dovathi. ¿Detsa paepatojebi abaxē paxamējavata ponaponaenajē? ¿Detsa paepatojebi abaxē paxamējavabelia ajamatabēcuenesaenē tsaponapona tsane patanejumecovēnētsinexamē? Panetocarenamēre pejevaxinē, jai Jesús pijajivijavabelia.

²⁰ Nexata tocarenatsi Jesús pejevaxinē. Dovathi itsa tanetsi Jesús, nexata icatsia bajarajota dovathi pejevaxinē tēpajoneyaexanatsi. Irata xuabatsi pejevaxinē. Nexata pejevaxinē natorenaba irata. Pethamu pitsapa pecuibuatsina. ²¹ Nexata Jesús yanijoba pejevaxinē paxajavabelia.

—¿Detsa pamatacabibeje xaina petaxuxuabicujinaetsi mapacueneje? jai Jesús.

Nexata pejevaxinē paxa jumaitsi:

—Penacuetojavaveliacujinae cajena taxuxuabatsi. ²² Bajayajebi picani isotojavalia dovathi netoxuababiabaliatsi. Menialia ata netoxuababiabaliatsi. Beyaxuabijitsiatsi bajarapacuenia. Xamē itsa cacaējēpa itsacuenia ata taneyavenonaenexamē, initaxutotsoniataema! iNeyavenonare! jai pejevaxinē paxa Jesúsjavabelia.

²³ Nexata Jesús jumaitsi pejevaxinē paxajavabelia:

—Pajivi jumecovēnēta Dioso peyavenonaejavanexatsi, bajarapajivi Dioso yavenonatsi daxita xua namatavenona, jai Jesús.

24Nexata pejevaxinë paxa aëjai. Jumaitsi:

—iJumecovënëtajë baja cajena! iNeyavenonare bitso orijibia tajumeco-vënëtsinexa! jai bajaraponë Jesúsjavabelia.

25Nexata Jesús itsa tane jivibitsaëtoخانeto penacaetuataponaejala Jesúsjavaberena, nexata Jesús itaveta dovathi. Jumaitsi:

—Dovathi, xamë pejevaxinë apo nenatsipaebiaexanaenë. Apo nejumetaeyae-xanaenënu. Xanë caitavetatsi. Pitsapare mapapejevaxinëvecuaje. Pëtsa baja icatsia junuame matavëjëa maponëyojavaberenaje, jai Jesús dovathijavabelia.

26Nexata dovathi pejevaxinë icatsia aëjaiyaexanatsi.

Tëpajoneyaexanatsi. Vecuapitsapatsi jane baja. Puenetabuatatsi bepetë-paenëyo. Nexata itsamonae bajarajota jumaitsi:

—Pejevaxinë rabaja tëpa, jai bajarapamonae.

27Nexata Jesús cobepita pejevaxinë. Cobevaetabiaya yotsina. Nexata pejevaxinë nonotabapuna.

28Nexata xuacujinae Jesús boya itsa joneya, Jesús pijajivi jumaitsi:

—¿Detsa xuajitsia meta paxanë apo panecaëjëpae patavecuacapitsapae-nexa dovathi? jai Jesús pijajivi.

29Nexata Jesús jumaitsi pijajivijavabelia:

—Mara paviria dovathije apo jitsipae pepitsapaejavaje. Matapania panexaejava apo paxaemë tsipae panevajëtsinexa asaëyata Diosojavabelia panecapitsapaenexa dovathi, pitsapaejitsipa, jai Jesús pijajivijavabelia.

**Pacuenia icatsia Jesús tajëvelia navajunupaeba pebeyaxuabijavanexatsi
yabara pelivaisi**

(Mt 17.22-23; Lc 9.43-45)

30Jesús pejevaxinë dovathi pevecuacapitsapaecujinae, Jesús baja, pijajivi yajava, pona. Nexata Jesús, pijajivi yajava, najetaruca Galilea nacuajava. Jesús jitsipa pijajivi pebarënajetarucaenexa bajaraxuayo itsajivi ata yapëtaenejevatsi.

31Tsipaji Jesús pebeyaxuabijavanexatsi, tajëvelia navajunupaebapona pijajivijavabelia. Jumai tsaponae Jesús pijajivijavabelia mapacueniaje:

—Xanë, Daxitajivi Pematapijinënë, necanajetsiana itsamonae pecobeyabelia. Bajarapamonae nebeyaxuabiana. Itsiata baitsi jane tanebeyaxuabicujinae, acueyabi matababita, icatsia asaënë tsane, jai tsaponae Jesús pijajivijavabelia.

32Itsiata pijajivi apo jumeyapëtaetsi. Bajarapamonae ajumeura Jesúsjavabelia peyanijobinexa bajarapalivaisi yabara.

**Pacuenia Jesús pijajivi: “¿Detsa ponë vaxaitsiyajuvënëne
nacavecuayaajamatabëcuenenë bitso?” najai tsanajetarubenae
yabara pelivaisi**

(Mt 18.1-5; Lc 9.46-48)

33Jesús pijajivi barëpata Capernaum tomarata. Jesús pijajivi pebarëpatsicujinae, boyalia itsa barëjoneya Jesús, yanijoba pijajivijavabelia.

—¿Detsa pitsicuene yabara namutua bitso panajumenotanajetarubena-me? jai Jesús.

³⁴Nexata Jesús pijajivi moya. Tsipaji Jesús pijajivi namutua najumaitsi tsanajetarubena:

—¿Detsa ponë vaxaitsiyajuvënënë nacavecuaayaijamatabëcuenenë bitso? najai tsanajetarubena Jesús pijajivi.

³⁵Nexata Jesús eca. Junata pijajivi, doce ponëbeje. Jumaitsi pijajivijavabelia:

—Pajivi jitsipa ayaijamatabëcuenejivi penaexanaenexa daxitajivi mata-toxenetsia, bajarapajivi beveliajamatabëcuenejivi natae peyavenonaenexa daxitajivi, jai Jesús pijajivijavabelia.

³⁶Bajaraxuacujinae Jesús cobepita pejevaxinëyo. Pijajivi pitabarata nuteta. Bajaraxuacujinae Jesús isapita. Jumaitsi pijajivijavabelia:

³⁷—Pajivi copiapita tanejumecovënëtsijiviyo, mapitsipejevaxinëyo ataje, xanë taniji tanecopiapitsijava. Pajivi necopiapita, ëxanë apo necopiapi-tsi. Ponë nitoroba, neyajavacopiapita, jai Jesús pijajivijavabelia.

Pacuenia Jesús jumaitsi pijajivijavabelia itsa vënëlivaisitane itsanë dovathi jivivecua pecapitsapaejava Jesús pevënëta yabara pelivaisi
(Mt 10.42; Lc 9.49-50)

³⁸Jesús pijajivitonë, Juan, jumaitsi Jesúsjavabelia:

—Tajatuxanenë, pataniji itsanë nevënëta dovathi jivivecua pecapitsapaejava. Itsiata bajaraponë apo paxanëyajuvënënë. Nexata paitavetajë bajaraponë dovathi jivivecua pecapitsapaponaejava, jai Juan.

³⁹Nexata Jesús jumaitsi Juanjavabelia:

—Pëtsa paitavetame bajaraponë. Tsipaji raja pajivi pinijicuene pexanaejava exana tavënëta, bajaraxuacujinae acuenebi bajarapajivi tanebarana-tsipaebinxia pibisiacuenia. ⁴⁰Tsipaji raja pajivi pibisiacuenia apo najamatabëxainae vaxaitsijavaberena, bajarapajivi nacajamatabëcueneyavenona. Bajarapajivi bevaxaitsijamatabëcuenejivi. ⁴¹Xaniajanë pacuenia pacatsipaebijitsiatsi. Pajivi tsiquirijavayo ata mera pacarajutsiana paneapaenexa patajajivixaemë, bajarapajivi pepacuene Dioso matamotsianatsi mera papecarajutsimatamo, jai Jesús Juanjavabelia.

Pacuenia Jesús pijajivi muxujioba itsajivi ata pibisiacuenia pexanaeyaexanaeyaniva yabara pelivaisi
(Mt 18.6-9; Lc 17.1-2)

⁴²Icatsia Jesús jumaitsi pijajivijavabelia:

—Pajivi pibisiacuenia exanaeyaexanaejitsipa mapitsipejevaxijivi-xi ataje, tanejumecovënëtsiyajuvënëjiviyo, bajarapajivi Diosojavabelia bitso naneconitsipa. Nexata Dioso ayaicuenia naneconitsiaexanaejitsipatsi. Nexata pajivi najamatabëxaina pibisiacuenia pexanaeyaexanaenexa

tanejumecovënëtsivijavabelia, abaxë pibisiacuene exanaeyaexanaeneje-va, bajarapajivi bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatujëareca. Bajarapajivi bexuarecatsi bitso penaneconitsiyaniva Diosojavabelia pibisiacuene itsa exanaeyaexana tanejumecovënëtsiviyajuvënëvi.

⁴³Bajaraxuata panecobeta pibisiacuene itsa paexaname, panacobecacure. Itsiata xanepana panejonenexa cobemataxucaeja apo pevereverecae-nacuajavabelia. Biji rajane apo xanepanae tsipae panejonenexa infierno-javabelia anijacobebeje yajava, itsajota isotocotia apo itaxupae caeto ata.

⁴⁴Bajarajota apo tēpae oro, jivivixaevi. Isotocotia ata apo itaxupae caeto ata. ⁴⁵Itsa panetaxuta ata pibisiacuene paexaname, panataxucaucure.

Itsiata xanepana panejonenexa taxumataxucaeja apo pevereverecaenacuajavabelia. Biji apo xanepanae tsipae panejonenexa infiernojavabelia anijataxubeje yajava. ⁴⁶Bajarajota apo tēpae oro, jivivixaevi. Isotocotia ata apo itaxupae caeto ata. ⁴⁷Paneitaxutota ata panetaejava yabara pibisiacuene itsa paexaname, panaitaxutocajure. Itsiata xanepana panejonenexa pacaeitaxutojivimë apo pevereverecaenacuajavabelia, Dioso pijanacuayabelia. Biji rabiji apo xanepanae tsipae panejonenexa anijaitaxutobeje yajava infiernojavabelia. ⁴⁸Bajarajota apo tēpae oro, jivivixaevi. Isotocotia ata apo itaxupae caeto ata.

⁴⁹Dajubinë jivi itsa beyaxuaba Diosojavabelia ofrendacuenia pevi perajutsinexa, viexaba yajota pevixanepanaenexa. Bajara pijinia pacuenia pejamatabëcuenexanepanaenexa, daxita Dioso pijajivi ata jamatabëcuenëjëbianatsi mapanacuataje. ⁵⁰Yajo raja xanepana. Itsiata yajo pexaicaejavami itsa ajibi tsipae, apo xanepanae tsipae itsacuenëjavayonexa ata. Bajara pijinia pacuenia paxamë ata pajamatabëcuenëitsimë tsipae Diosojavabelia, itsa apo pavecuapanepaemë tsipae papecajamatabëcuene ëjëtaponaejava. Nexata pajamatabëcuenesaëmëre panejamatabëcuenexanepanaenexa Diosojavabelia. Pajinavanapare xaniavaetsia itsamonaejavabelia ata, jai Jesús pijajivijavabelia itsajivi ata Jesús pijajivi pibisiacuene pexanaeyaexanaeyaniva.

Pacuenia Jesús jivi livaisi tsipaeba penacojiobinë pijava pexuabiyaniva yabara pelivaisi

(Mt 19.1-12; Lc 16.18)

10 ¹Jesús baja pona Capernaum tomaravecua. Pona Judea nacuayabelia. Bajaraxuacujinae Jordánmene itsapanabelia, paira, Jesús pona. Bajarajotalia icatsia jivibitsaëtoxaneto pata Jesúsjavaberena. Nexata icatsia Jesús livaisi tsipaeba bajarapamonae. Tsipaji baja cajena Jesús livaisi petsipaebanajetaruaenë. ²Nexata fariseovi Jesús cujibarenatsi petsipaebilivaisi yabara jamatabëcueneëjëbiaya peyanijobinexatsi. Nexata Jesús bijiaya itsa jumecanaviata, neconitsijitsiatsi. Nexata fariseovi jumaitsi Jesúsjavabelia:

—¿Xanepana tsaja penacojiobinē pijava pexuabinexa? jai.

³ Jesús nexata jumaitsi fariseovijavabelia:

—¿Detsa pacuenia bajayata Moiséspijinē pacaitoroba panijavajivi pane-xuabiyaniwa? jai Jesús.

⁴ Nexata fariseovi jumaitsi Jesúsjavabelia:

—Moiséspijinē tocopata, ponē pijava jamatabēxuaba, pexuabinexa. Itsiata baitsi jane Moiséspijinē tocopata, ponē pijava xuabijitsia, copiaya petoyaquinaenexa cuyalatobaxuto pijavajavabelia. Nexata ponē pijava xuabijitsia, copiaya pijava toyaquinabiaba pitavetsilivaisi pexuabinexa jane baja pijava. Bajarapacuenia pexanaenexa, ponē pijava jamatabēxuaba, Moiséspijinē tocopata, jai fariseovi Jesúsjavabelia.

⁵ Nexata Jesús jumaitsi fariseovijavabelia:

—Moiséspijinē raja bajarapacuenia pacatocopata paneajamatabēcuenelivaisitajaxae. ⁶ Pamatacabi Dioso taxuxuaba nacua pexanaejava, bajarapamatacabita Dioso exana pebi, pijava yajava. ⁷ Bajaraxuata pebi itsa nacojioba pijavajavabelia, banatsata paxavecua, pena atavecua. ⁸ Nexata Dioso tane anijajivimibeje becaejivi. Nexata Dioso apo tae beanijajivibeje. Becaejivi saya tane Dioso. ⁹ Bajaraxuata itsanē ata apo bexuabi pijava. Tsipaji Dioso pejamatabēcueneta napitsiaexanatsibeje, jai Jesús fariseovijavabelia.

¹⁰ Bajaraxuacujinae Jesús pijajivi pijaepato itsa barēnacopata bota, nexata Jesús pijajivi yanijobatsi bajarapacueni yabara. ¹¹ Nexata Jesús jumaitsi pijajivijavabelia:

—Ponē pijava pexuabicujinae, itsava icatsia itsa pita, bajaraponē pibisiacuene exana pevitota. Nexata naneconita Diosojavabelia. Tsipaji itsava jaita pepo pijavavecua. Dioso cajena abaxē bajaraponē pexuabiva pepo pijavacuenia totanetsi. ¹² Bajara pijinia itsi petiriva ata pamona pevecuanaviatsicujinae, itsanē icatsia itsa pitatsi. Bajarapova pibisiacuene exana pevitota. Nexata naneconita Diosojavabelia. Tsipaji itsanē jaita pepo pamonavecua, ponē abaxē Dioso totanetsi pamonacuenia, jai Jesús pijajivijavabelia.

Pacuenia Jesús jumaitsi pejevaxijivixijavabelia yabara pelivaisi

(Mt 19.13-15; Lc 18.15-17)

¹³ Jesúsjavaberena itsamonae pejevaxijivixi tocapataponatsi Jesús pejayataponaenexa pecobeta. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavaberena, jai.

¹⁴ Nexata Jesús itsa tane bajarapacuenia pijajivi pejumaitsiyava, Jesús jamatabēcueneanapanaxuareca. Jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanējavaberena. Mapitsipejevaxijivixije jumeaebinejeva, xaniavaetsia

bajumecovënëta palivaisi tsipaebatsi. Nexata pamonaе jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. ¹⁵Xaniajanë pacuenia pacatsipaеbijitsiatsi. Mapitsipejevaxijivixije itsa jumecovënëta palivaisi tsipaebatsi, bajumecovënëta xaniavaetsia jumeabinejeva. Bajara pijinia pacuenia jumeabinejeva, xaniavaetsia bejumecovënëta Dioso pejumelivaisi pamonaе jitsipa pejonejava Dioso pijanacuayabetsia, jai Jesús pijajivijavabelia.

¹⁶Nexata Jesús isapitapona pejevaxijivixi, caejiviyo canacujitsia. Pecobeta jayatapona. Jesús pejevaxijivixijavabelia jumai tsaponaе: —Dioso xaniavaetsia caevetsiana, jai tsaponaе.

**Pacuenia pevjëato, bitso pexainaenë, cuaicuaijai Jesúsjavabelia
yabara pelivaisi**

(Mt 19.16-30; Lc 18.18-30)

¹⁷Pabota Jesús pejevaxijivixi isapitapona, bajarapabovecua itsajavabelia baja icatsia Jesús ponaеjitsia. Nexata baja Jesús itsa naropotsijitsia, pevjëato cujinaerucarena Jesúsjavaberena. Jesús pitabarata pematabacabëta nucajunua. Jumaitsi pevjëato Jesúsjavabelia:

—Petuxanenë, pexaniajamatabëcuenenëmë. ¿Detsa pitsicune bexanajë taxainaenexa matababi apo pevereverecaejava? jai pevjëato.

¹⁸Nexata Jesús jumaitsi pevjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. ¹⁹Xamë baja yapëtaneme pacuenia Dioso pejumelivaisita itoroba jivi pejumecovënëtsinexa. Jumaitsi mapacueniaje: “Pëtsa jaitame itsava nijavavecua. Pëtsa beyaxuabame jivitonë. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame. Pëtsa yamaxëitojorobiaya vecuapitame itsajivi pexanaejava. Axa yaiyataema. Ena ata yaiyataema,” jai Dioso pejumelivaisita. Xamë baja yapëtaneme bajarapalivaisi, jai Jesús pevjëatojavabelia.

²⁰Nexata pevjëato jumaitsi Jesúsjavabelia:

—Petuxanenë, daxita rabaja bajarapalivaisianë jumecovënëtajë pejeva-xinëjavaveliacujinaenë, jai pevjëato.

²¹Nexata Jesús asivaya tane pevjëato. Jumaitsi:

—Caejava raja catosaica nexanaenexa. Ponare necanajetsinexa daxita nexainaecuenemi. Bajarapamatamomi tsicobetsanaename bepejiobivi. Nexata bajarapacuenia xainaename bitso nexainaecune Dioso pijanacuatatsia. Nexata najamatabëcueneverere, cabejiobiaexanae ata, cabe-yaxuabijitsia atanua tajumelivaisi yabara, niajamatabëcuenesaë tsaponaponaenexa. Nexata jane baja xuacujinae nepënaponaename, jai Jesús pevjëatojavabelia.

²²Nexata pevëjëato itsa jumetane bajarapacuenia Jesús pejumaitsijava, najamatabëxainaeya baja vecuapona Jesús. Tsipaji pevëjëato daxitacuene bitso pexainaenë. Nexata pevëjëato apo jamatabëjumecovënëtsi palivaishi Jesús tsipaeba.

²³Nexata pevëjëato pecovëta Jesús pijajivi matatoyorotsia naëcota. Jumaitsi:

—iPamonae bitso daxitacuene pexainaevi, tsiaypëbejetsi penajamatabëcuenecopatsinexa Diosojavabelia pecapanepaenexatsi Dioso pijanacua-yabetsia! jai Jesús pijajivijavabelia.

²⁴Nexata Jesús pijajivi jamatabëcuenenabenajaca itsa jumeta-ne bajarapacuenia Jesús pejumaitsijava. Nexata icatsia Jesús jumaitsi pijajivijavabelia:

—Tajamonae, pamonae bitso ëpexinaejavanexa najamatabëxaina, bajarapamonae bitso tsiaypëbejetsi tsane pejonenexa taxa Dioso pijanacuayabetsia. ²⁵Pacuenia camello ayainëxae, acuenebi pejonejava palutaetaitaxutovojotualia, bajara pijinia pacuenia bitso pexainaenë acuenebi tsane pejonejava Dioso pijatomarabetsia. Tsipaji najamatabëxaina bitso ayaijava pexainaenexa, jai Jesús pijajivijavabelia.

²⁶Jesús pijajivi itsa jumetane bajarapacuenia Jesús pejumaitsijava, bitso jamatabëcuenenabenajaca. Nexata bajarapamonae jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexainaevi ata itsa apo panepae tsane Diosojavabelia? jai.

²⁷Nexata Jesús asaëya naëcota pijajivijavabelia. Jumaitsi pijajivijavabelia:

—Jivi raja apo caëjëpaetsi pijacuata penacapanepaenexa Diosojavabelia. Caenë Dioso caëjëpatsi jivi pecapanepaenexa. Dioso raja caëjëpatsi daxitacuene pexanaenexa, jai Jesús pijajivijavabelia.

²⁸Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxainaejavami. Nexata baja pacapënajinavanapatsi, jai Pedro.

²⁹Nexata Jesús jumaitsi:

—Xaniajanë pacuenia pacatsipaebijitsiatsi. Pajivi xanë tajamatabëcueneta, jivi tacapanepaelivaisitanexa pejamatabëcuenetanua, pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijapabianë ata, nexata bajarapajivi bitso ayaijava Dioso rajutsianatsi pepuenetsijavanëmi matatoxenetsia. ³⁰Caejavayomijamatabëcuene tsaponae, rajutsianatsi mapanacuataje cien xuabeje tsaponae pevajënaeyabelia. Bajarapajivi icatsia xainaena bonë, pematapijivi ata, pejuyapijivi ata, pena ata, pexi ata, pabianë ata. Itsiata bajarapajivi itoya tsanetsi mapanacuapijivije. Bejiobiaexanabianatsinua. Itsiata baitsi jane bexëjavabelia xainaena matabi apo pevereverecaejava. ³¹Pamonae

aeconoxae mapamatacabitaje ayaijamatabëcuenevi tanetsi, bajarapamona-e Dioso beveliajamatabëcuenevi exanaenatsi. Pamonae pijinia mapamatacabitaje beveliajamatabëcuenevi tanetsi, bajarapamonae Dioso ayaijamatabëcuenevi exanaenatsi, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi

(Mt 20.17-19; Lc 18.31-34)

³² Jesús, pijajivi yajava, najetaruca namutua. Pona Jerusalén tomara-belía. Jesús pijajivi, pepënaponaevisi, jamatabëcuenenabenajaca. Tsipaji Jesús apo junavi bajarabelia peponaejava, yapëtae ata, pacuenia exanaejitsiatsi Jerusalén tomarata. Nexata Jesús icatsia junata pijajivi, doce ponëbeje, pesaicaeyojavabelia. Navajunupaeba tajëvelia pacuenia exanaejitsiatsi Jerusalén tomarata. ³³ Jumaitsi Jesús tajëvelia pijajivijavabelia:

—Panejumetaema. Mara Jerusalén tomarabelia ponatsije. Bajarajotalia xanë, Daxitajivi Pematapijinënë, sacerdotevi penamatacaitorobivi, judíovi pecujarubivinu, pecobeyabelia necanajetsiana tanevaetabinexa. Nexata xanë neneconitsiana tanebeyaxuabinexa. Bajaraxuacujinae icatsia necanajetsiana itsanacuaverena pepatsivi pecobeyabelia. ³⁴ Bajarapamonae necanecaponaena. Nesuabiana. Nejumatitibabena penaneconitsivi pejumaconitabiabimacata. Bajaraxuacujinae nebeyaxuabiana jane baja. Itsiata baitsi jane tanebeyaxuabicujinae, acueyabi matababita, icatsia asaënë tsane, jai tajëvelia pijajivijavabelia Jesús penavajunupaebijavata pebeyaxuabijavanexatsi.

Pacuenia Santiagobeje Juanbeje vajëtabeje Jesúsjavabelia pexaniacuene petoexanaenexatsibeje yabara pelivaisi

(Mt 20.20-28)

³⁵ Zebedeo pexënatobeje, Santiagobeje Juanbeje, imoxoyoliabeje Jesús. Jumaitsibeje Jesúsjavabelia:

—Patajatuxanenë, pacuenia pacavajëtsijitsiatsibeje, bajarapacuenia pajitsipajëbeje patanetoexanaenexamëbeje, jaiabeje Santiagobeje Juanbeje Jesúsjavabelia.

³⁶ Nexata Jesús jumaitsi:

—¿Detsa pitsicuene pajitsipamebeje patacatoexanaenexabeje? jai.

³⁷ Nexata Santiagobeje Juanbeje jumaitsibeje:

—Pamatacabí daxitacuene evetsianame, panetocopatsianamebeje pata-naecaenexabeje nemuxuneneta vajanajuaevetsinexa. Itsanë naecaena necujuanenia. Itsanë naecaena netsavenonenia, jaiabeje.

³⁸ Nexata Jesús jumaitsi:

—Paxamëbeje apo payapëtaemëbeje xua panevajëta-mebeje. ¿Pacacajëpabeje tsaja panenacaevetsinexabeje

papecabejibiaexanaenexabeje pacuenia xanë nacaevetsianajë tanebejio-biaexanaenexa? ¿Pacacaejëpabeje tsaja panenacaevetsinexabeje papecabeyaxuabinexabeje pacuenia xanë nacaevetsianajë tanebeyaxuabinexa? jai Jesús pijajivitonëbejavabelia.

³⁹Nexata Santiagobeje Juanbeje jumaitsibeje:

—Jājā, panecaejëpabeje cajena, jaibeje.

Nexata icatsia Jesús jumaitsi Santiagobeje Juanbejejavabelia:

—Paxamëbeje pacabejibiaexanaenabeje pacuenia xanë nebejiobiaexanaena. Pacabeyaxuabianabejenua pacuenia xanë nebeyaxuabiana.

⁴⁰Itsiaata baitsi jane xua panevajëtamebeje panenaecaenexabeje, itsanë tacujuanenia, itsanë tatsavenonenia, bajaraxua Dioso apo netocopatsi patacatocopatsinexabeje. Tsipaji raja taxa Dioso ëpitapetsivinexa abaxë bajaraxua toxaniavaeta, jai Jesús Santiagobeje Juanbejejavabelia.

⁴¹Diez ponëbeje, Jesús pijajivi, itsa vënëtane pepëya bajaraxua Santiagobeje Juanbeje Jesúsjavabelia pevajëcaejavabeje, nexata bajara-pamonae jamatabëcuenebaraanaepana Santiagobeje Juanbejejavabelia.

⁴²Nexata Jesús daxita pijajivi junata. Jesús jumaitsi pijajivijavabelia:

—Payapëtaneme rabaja pacuenia nacuaevetsivi exana. Eveta caenacua canacujitsia. Nexata nacuaevetsivi pijajivicuenia eveta pamonae jinavana-pa pevetsinacuanëjava. Nexata bajarapanacuanë pevetsivi ayaijamatabëcuenevi nataeyabiaba. Xua jamatabëitoroba pevetsinacuanëjava pejinavapaevi petoexanaenexatsi, ajumesaëya itorobabiaba petoexanaenexatsi.

⁴³Pëtsa paxamë bajarapamonae cuenejëpaeya bajarapacuenia paexaname itsamonaejavabelia. Biji rajane ponë paxamëyajuvënënë jitsipa ayaijamatabëcuenenë penaexanaenexa daxita paxamëvecua, bajaraponë daxita paxamë bepanijajivitonëcuenia bepacayavenonabiaba. ⁴⁴Ponë paxamëyajuvënënë jitsipa penaexanaenexa papecanamatacaitorobinënexa, bajaraponë daxita paxamë bepanijajivitonëcuenia bepacayavenonabiaba.

⁴⁵Tsipaji rabaja xanë ata, Daxitajivi Pematapijinë atanë, apo patajopae-në jivi taneyavenonaenexa. Biji rajane xanë patajopajë tayavenonaenexa daxitajivi. Patajopajë tasivatëpaenexa jivi ayaibitsaëtoxa-neto pibisiacuene pexanaeneconimi taneconimatamotsinexa, jai Jesús pijajivijavabelia.

Pacuenia Jesús itaxutoxanepanaeyaexana Bartimeo, bitso

pitaxutotsëcënaenë, apo petaenë, yabara pelivaisi

(Mt 20.29-34; Lc 18.35-43)

⁴⁶Jesús, pijajivi yajava, pata Jericó tomarabelia. Jesús icatsia, pijajivi yajava, itsamonaenua ayaibitsaëtoxa-neto yajava, pitsapa Jericó tomarave-cua. Nexata Bartimeovënënë, Timeo pexënato, eca namuto muxuneneta. Bartimeo, bitso pitaxutotsëcënaenë, apo petaenë. Jivijavabelia amoneya palata pevajëcabiabinë. ⁴⁷Nexata Bartimeo itsa jumetane Nazaret tomara-pijinë Jesús imoxoyo penajetarucaejava, vavajai tsecae.

—iJesús, Davidpijinë pemomomë, nitaxutotsoniataema! jai tsecae Bartimeo.

⁴⁸Nexata picani itsamonae jumeitavetatsi Bartimeo pemoyanexa. Itsiata bitsoyo orijibia vavajai tsecae.

—iDavidpijinë pemomomë, nitaxutotsoniataema! jai tsecae Jesúsjavabelia.

⁴⁹Nexata Jesús muxunanucojopa. Jumaitsi jivijavabelia:

—Pajunaremena bajaraponë, jai.

Nexata bajarapamonae junarena Bartimeo. Pejunatsivirena jumaitsi Bartimeojavabelia:

—Najamatabësäetaxuare. Nonotapunare. Jesús raja cajunarena, jai bajarapamonae.

⁵⁰Nexata Bartimeo penajumaxuabipana xuabapuna. Bepijia najetabarena Jesúsjavaberenä. ⁵¹Nexata Jesús yanijoba Bartimeojavabelia.

—¿Detsa xua jitsipame tacaexanaenexa? jai Jesús.

Nexata Bartimeo bitso pitaxutotsëcënaenë, jumaitsi Jesúsjavabelia:

—Jesús, jitsipajë taitaxutoxanepanaejava, jai.

⁵²Nexata Jesús jumaitsi:

—Ponare baja. Nesivajamatabëjumaitsimë: “Jesús nitaxutoxanepanae-yaexanaena,” nesivajamatabëjamë. Bajaraxuata itaxutoxanepaname baja, jai Jesús Bartimeojavabelia.

Bajarapacuenia Jesús pejumaitsijavata, Bartimeo baja xaniavaetsia tane. Nexata baja bajaraponë Jesús pepëta naponä.

Pacuenia Jesús pata Jerusalén tomarata yabara pelivaisi

(Mt 21.1-11; Lc 19.28-40; Jn 12.12-19)

11 ¹Jesús baja pijajivi barëimoxoyotanajetaruca Jerusaléntomara. Barëpata baja Betfagé tomarayobeje Betania tomarayobeje muxuneneta. Itsajota petsutojumata nubena olivonaenë, bajarajota Jesús barëpata. Bajarajota pebarëpatsicujinae Jesús itoroba anijanëbeje pijajivitonëbeje. ²Jesús jumaitsi pijajivitonëbejejavabelia mapacueniaje:

—Paponarebeje mapatomarayo ecaliajejavabelia. Ajena papatsiaremeliabeje, pataenutsianamebeje burro, pecëtanutsinëtsi. Bajarapaburro itsajivi ata abaxë apo jumaponae. Paisinaenamebeje. Payamaëcarenamëbeje tsane. ³“¿Detsa xuajitsia paisinaenamebeje burro?” itsa pacajaibeje tsane itsajivi, nexata pajumaitsimëbeje tsane: “Vajatuxanenë raja namatavenona. Aeconoxae raja icatsia canaviatsiarena,” pajamëbeje tsane, jai Jesús pijajivitonëbejejavabelia.

⁴Nexata Jesús pijajivitonëbeje liabeje. Caxitajarabanutabeje burro bapamuxuneneta. Cëtanutatsi burro namuto muxuneneta. Nexata bajaraponëbeje burro isinabeje.

⁵Nexata bajarajota pejinavanapaevi yanijobatsibeje.

—¿Detsa xuajitsia paisinamebeje burro? jaitsibeje.

⁶Nexata bajaraponëbeje jumaitsibeje pacuenia baja Jesús itorobatsibeje. Nexata tocopatatsibeje pecaponaenexabeje. ⁷Nexata jane baja burro capatabeje Jesúsjavaberena. Nexata Jesús pijajivi pijacamisajumavelia penaxatabijavanë burro tsijumajeba. Bajarapajumata Jesús ecaya. ⁸Jesús penajetarucaenamutojavarena jivi ayaibitsaëtoxfaneto pijacamisajumavelia penaxatabijavanë namutua tsivajënaeyerequejebaponatsi. Itsamonae naemaxërananë, pebaxu yajava, ucubaba. Nexata namutua Jesús tsivajënaeitabëtsiaya jebaponatsi yayiataeya Jesús pecopiapitsinexatsi. ⁹Jesús penajetarucaejavata jivi ayaibitsaëtoxfaneto Jesús pevajënaeya namataxainaeya najetarubena. Itsabitsaëtoxfaneto Jesús pecovëya cotocaevanajetarubena. Daxita bajarapamonae vavajai tsanajetarubena. Jumai tsanajetarubena:

—iDioso yavenonaenatsi maponë najetarucaje! iVajatuxanenë pejama-tabëcueneta najetaruca! ¹⁰iDioso yavenonaenatsi maponë najetarucaje nacua pevetsinënexa! iPacuenia bajayata vajasalinainëmi Davidpijinëmi nacua eveta, bajarapacuenia evetsijitsia! iNexata vaxaitsi pexaniajamatabëcuene rajutatsi Diosojavabelia! jai tsanajetarubena bajarapamonae.

¹¹Nexata jane baja Jesús patajopa Jerusalén tomarata. Templobojavalia joneya. Nexata Jesús templobota naitaxutocaeveta, pacuene jivi exana templobota, petaenexa. Nexata baja Jesús pepuatae pacuene jivi exana templobota, Jesús baja icatsia pona. Naviata abaxë Betania tomarabelia pijajivi, doce ponëbeje, yajava. Tsipaji baja caniviyotsia.

Pacuenia Jesús bijataenuta higeranae piacuaijibixae yabara pelivaisi
(Mt 21.18-19)

¹²Jesús pijajivi barëmajita Betania tomarata. Nexata bajayacunua Jesús icatsia pijajivi barëlia Jerusalén tomarabelia. Nexata Jesús namutua penajetarucaejavata, piyani. ¹³Jesús namutovecua tajiyotalia higeranae yabaxua taenuta. Nexata Jesús taeyojopalia bajarapona pecuai perubenaeyava. Itsa Jesús pata bajaraponaeyavabelia, ëpebaxu saya tsanuca. Tsipaji cajena abaxë apo penacuaitsimatacabi. ¹⁴Nexata Jesús jumaitsi higeranaeyavabelia:

—Itsajivi ata apo cacuaixae tsane matavëjëa, jai Jesús.

Nexata pijajivi jumetanetsi bajarapacuenia Jesús pejumaitsijava higeranaeyavabelia.

Pacuenia Jesús Jerusalén tomarata templobovecua pitsapaeyaexana pecanajetabiivi, pecomuacabiabivinu, yabara pelivaisi
(Mt 21.12-17; Lc 19.45-48; Jn 2.13-22)

¹⁵Jesús, pijajivi yajava, pata Jerusalén tomarata. Nexata Jesús joneya temploboyalia. Nexata templobota Jesús tane pecanajetabiivi,



(Mr 11.15-17)

pecomuacaevinua. Nexata daxita bajarapamonae Jesús pitsapaeyaexa-na templobovecua. Palata pecambiababiabivi ata pijamesanēmi Jesús topēñeyorobajaraba. Ucucu pecanajetabiabivi ata penabiabijavanēminua topēñeyorobajaraba. ¹⁶ Jesús apo tocopatsi itsajivi ata itsacunejava pecaponaenexa templobojava. ¹⁷ Jesús livaisi tsipaeba. Jumaitsi bajarajota pepatsivijavabelia:

—Dioso baja cajena pejumelivaisibaxutota mapatemplobo yabara tajēvelia jumaitsi mapacueniaje: “Tajabo raja daxitanacuanēpijivi xanēja-vaberena penavajēcaebo tsane,” jai Dioso pejumaitsijava Dioso pejumelivaisibaxutota. Itsiata baitsi jane paxamē yamaxēitorobiaya panenacobetoxotsinexa panacaetuatabiabame mapabotaje, jai Jesús templobota pecanajetabiabivijavabelia.

¹⁸ Sacerdotevi penamatacaitorobivi, judíovi pecujarubivinua, jumeta-ne daxita pacuenia Jesús exana jivijavabelia templobota. Nexata bajarapamonae najumejaita pacuenia Jesús beyaxuabijitsiatsi. Bajarapamonae cujunavatsi Jesús. Tspaji daxitajivi jamatabēcuenenabenajaca Jesús petsi-paebilivaisi yabara. ¹⁹ Ajena baja meravitsia, Jesús yajavapona pijajivi Jerusalén tomaravecua.

Pacuenia higuerae tēpanuca yabara pelivaisi
(Mt 21.20-22)

²⁰ Jesús pijajivi barēmajita Betania tomarata. Nexata bajayacunua Jesús icatsia, pijajivi yajava, najetaruca pecovēnamutua. Bajarapamonae taenuta higuerae baja petēpanucaejava daxita yatabutopaya. ²¹ Nexata Pedro najamatabēnapita higuerae Jesús pebijataenutsijava. Nexata Pedro jumaitsi Jesúsjavabelia:

—Tajatuxanenē, jica, taema. Ponae higuerae bijataenutame, tēpanuca baja. ¿Detsa meta pacuenia tēpa baja? jai Pedro.

²² Nexata Jesús jumaitsi pijajivijavabelia:

—Paxamē bitso pajumecovēnēre Dioso papecatoexanaenexa pacuenia pavajētame. ²³ Xaniajanē pacuenia pacatsipaebijitsiatsi. Itsa pajamatabējumaitsimē tsipae Dioso yabara: “Dioso nejumecovēnētsiana xua vajētsianajē Diosojavabelia,” itsa pajamatabējamē tsipae, pacajumecovēnētsipa mapatsuto ataje. Nexata itsa pajumaitsimē tsipae mapatsutojavabeliaje: “Natixire majotavecuaje. Pucaxanetojavabelia jopare,” itsa pajamē tsipae, pacajumecovēnētsipa. Nexata mapatsuto ataje paneitorobicuenia, pacajumecovēnētsipa. Itsa pajumecovēnētsianame Dioso papecatoexanaejavanexa, itsa panajamatabēxainaenamenua Dioso ēpapecajumecovēnētsijavanexa, xua pavajētsianame Diosojavabelia, Dioso pacajumecovēnētsiana. ²⁴ Bajaraxuata pacajumaitsi. Daxita xua pavajētsianame Diosojavabelia, pasivajamatabējumaitsimē tsane: “Xua vajētajē Diosojavabelia, pepacune Dioso nejumecovēnētsiana,” pasivajamatabējamēre. Nexata xua pavajētsianame Diosojavabelia, Dioso pacajumecovēnētsiana. ²⁵ Itsjivi pibisiacune papecaexanaejava, pajamatabēcuenecaevare panevajētsijavata Diosojavabelia. Nexata pabarajamatabēcuenexanepanare bajarapajivi. Nexata pijinia paneaxa, athēbētatsia peecaenē, jamatabēcuenecaeviana paxamē ata pitabarata pibisiacune paneexanaejava. ²⁶ Paxamē itsa apo pajamatabēcuenecaevimē tsane itsanē pibisiacune papecaexanaejava, itsa apo pabarajamatabēcuenexanepanaemēnua tsane, nexata pijinia paneaxa, athēbētatsia peecaenē, apo jamatabēcuenecaevi tsane paxamē pitabarata pibisiacune paneexanaejava. Apo pacabarajamatabēcuenexanepanaenua tsane, jai Jesús pijajivijavabelia.

Pacuenia Jesús caējēpatsi daxitacune pexanaenexa yabara pelivaisi
(Mt 21.23-27; Lc 20.1-8)

²⁷ Jesús, pijajivi yajava, pata Jerusalén tomarata. Jesús itsa ponapona templobota, nexata sacerdotēvi penamatacaitorobivi, judíovi pecujarubivina, judíovi pijaancianovina, parena Jesúsjavaberena. ²⁸ Nexata bajarapamonae jumaitsi Jesúsjavabelia:

—¿Jipatsa pejamatabēcueneta pecanajetabiabivi, pecomuacaevinua, capitsapame mapatemplobovecuaje? jai bajarapamonae Jesúsjavabelia.

²⁹Nexata Jesús jumaitsi bajarapamonaejavabelia:

—Xanë copiaya caejumeyo pacayanijobianatsi. Itsa paxamë panejume-caviatsianame, nexata xanë juya pacatsipaebianatsi ponë nitoroba taexanaenexa bajarapacuene. ³⁰¿Jipatsa jane pejamatabëcueneta Juanpijinë jivi bautisabaponapona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? Panejumecanaviare baitsi jane, jai Jesús bajarapamonaejavabelia.

³¹Nexata ëpamonae nabarëcuaicuajai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipae-tsi: “Dioso raja pejamatabëcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovënëtsimë Juanpijinë pepaebilivaisi?” nacajai tsipae. ³²“Jivi raja saya pejamatabëcueneta Juanpijinë jivi bautisabaponapona,” acuenebi vajajaijava. Tsipaji mapatomarapijivije ayaibitsaëtoxaneto Juanpijinë yabara sivajamatabëjumaitsi: “Juanpijinë raja pepacuene Diosojumepaebinëmi,” sivajamatabëjai. Nexata bajarapamonae nacabeyejebijitsipa, najai Jesús peyanijobivitsi.

³³Nexata saya bajarapamonae jumaitsi Jesúsjavabelia:

—Apo payapëtaenë ponë Juanpijinë itorobatsi jivi pebautisabaponaenexa, jai.

Nexata Jesús jumaitsi bajarapamonaejavabelia:

—Nexata xanë ata apo pacatsipaebi tsanetsi ponë nitoroba taexanaenexa bajarapacuene, jai Jesús.

Pacuenia exana piajamatabëcuenebejevi, itsanë pijauvabacabo

petoevetsivi, yabara pelivaisi

(Mt 21.33-46; Lc 20.9-19)

12 ¹Jesús livaisi tsipaeba sacerdotevi penamatacaitorobivijavabelia, judfovi pecujarubivijavabelia ata, judfovi pijaancianovijavabelia ata. Jumaitsi mapacueniaje:

—Pijaira pexainaenë pijairata uba ayaibacaboxaneto uvavënëjava.

Bajaraxuacujinae pijaira matatoyorotsia ibopanaxanetonë mataropotsia pefaratsijavata yacaranata. Bajarapayacaranatsijava athëbëabetsia apia jivitonë matatoxenetsia. Bajaraxuacujinae irata mëthë cueyeta. Nexata pecueyetsimëthëjavata exana uvacuaibarëmene pecayujucabiabjavane-xa. Bajaraxuacujinae pijauvabacabo tuatuajëta exananuta piapiabotsia, penacuaitsimatacabi itsa tonaveretatsi, athëbëyo pevetabiabecaenexa pijauvabacabo. Nexata bajaraponë itsamonae evetsiaexana pijauvabacabo. Uvabacabo pexainaenë jumaitsi petoevetsivitsijavabelia: “Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonë itorobiarenajë xua panetotsatsianame tanetopitsinexa,” jai uvabacabo pexainaenë petoevetsivitsijavabelia. Nexata uvabacabo pexainaenë tajë nacuyabelia pona. ²Itsa baja uvabacabo pexainaenë yapëtane

pecopiapatsijava uvacuai penaveretsimatacabi penotsinexa, nexata uvabacabo pexainaenë itoroba pijajivitonë. Itoroba petoevetsivitsijavabelia petsicobetsatsinexatsi. ³Nexata uvabacabo pexainaenë pijajivitonë tovaetabatsi. Toconibabiatsi. Petoconibabecujinaetsi cobesa naviatsiaexanaliatsi. ⁴Itsiaata uvabacabo pexainaenë icatsia itoroba itsanë pijajivitonë petsicobetsatsinexatsi. Bajaraponë ata icatsia tomatajorobiaxuabatsi. Pibisiacuenia tobijatanetsi. ⁵Itsiaata icatsia uvabacabo pexainaenë itoroba itsanë pijajivitonë. Bajaraponë jane baja tobeyaxuabatsi. Bajaraxuacujinae abaxë icatsia uvabacabo pexainaenë itoroba itsamonae. Bajarapamonaeyajuvënëvi itsamonae totsauquibabiatsi. Itsamonae tobeyejebatsi.

⁶Abaxë uvabacabo pexainaenë icatsia pitorobinexa, caenë tonacopatatsi. Pexënato bitso piasivanë. Nexata jane baja uvabacabo pexainaenë pexënato icatsia itoroba. Uvabacabo pexainaenë jamatabëjumaitsi: “Tajauvabacabo tanetoevetsivi tajajivi apo netoyaiyatae ata, itsiaata meta taxënato netoyaiyataena,” jamatabëjai uvabacabo pexainaenë. ⁷Itsiaata uvabacabo petoevetsivitsi uvabacabo pexainaenë pexënato ata, apo toyaiyataetsi. Itsa tane uvabacabo pexainaenë pexënato, bajarapamonaenajumaitsi: “Mara ponëje paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevetsivitsi. ⁸Nexata icatsia uvabacabo pexainaenë pexënato ata tovaetabatsi. Icatsia pexënato ata tobeyaxuabatsi. Petëpaenë xuabatsi bajarapauvabacabo pënëyabelia, jai Jesús sacerdotevi penamatacaitorobivijavabelia, judíovi pecujarubivijavabelia ata, judíovi pijaancia-novijavabelia ata.

⁹Icatsia Jesús jumaitsi bajarapamonaejavabelia:

—¿De meta nexata xua exanaena uvabacabo pexainaenë pijauvabacabo petoevetsivitsijavabelia? Uvabacabo raja pexainaenë patsiarena. Verebiabiana daxita bajarapamonaemi. Nexata icatsia itsamonae evetsiaexanaena bajarapauvabacabo, jai Jesús bajarapamonaejavabelia.

¹⁰Icatsia Jesús jumaitsi:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia. ¹¹Vajatuxanenë Dioso raja exanaena bajarapacueni. Nexata nacatsita pexaniacueni bitso tsane bajarapacueni,

jai tajëvelia Dioso pejumelivaisibaxutota xanë yabara.

Bajarapacuenia tajëvelia Dioso pejumelivaisibaxutota itsa jumaitsi, paxamë apo patanejumecovënëtsijavanexamë yabara jumaitsi. Dioso

taneitapetsijava daxitajivi tacapanepaenexa yabara ata jumaitsi, jai Jesús bajarapamonaejavabelia.

¹²Bajarapamona picani Jesús jamatabëvaetabatsi. Tsipaji bajarapamona jumeypëtanetsi Jesús pejumaitsijava bajarapamona yabara. Itsiata abaxë apo vaetabitsi. Tsipaji cujuna jivi. Nexata baja Jesús bajarapamona vecuapona.

Pacuenia Jesús jamatabëcueneëjëbiaya yanijobatsi impuestomatamo pematamotsijava yabara pelivaisi
(Mt 22.15-22; Lc 20.20-26)

¹³Fariseoviyajuvënëvi, Herodes pijajiviyajuvënëvinua, najetarubena Jesúsjavaberena. Bajarapamona pevetsivitsi itorobatsi livaisi peyanijobinexatsi Jesús. Nexata Jesús bajarapamona bijiaya itsa jumecanaviata, peneconitsinexatsi picani nacuaevetsinëjavabelia. ¹⁴Nexata bajarapamona pata Jesúsjavaberena. Bajarapamona jamatabëcueneëjëbiaya jumaitsi Jesúsjavabelia:

—Jesús, payapëtaniji cajena nexaniajaicuene, xua yabara tsipaebabiabame livaisianë. Petuxanevi ata xamë apo cujunavimë. Apo auramë livaisi netsipaebabiabijava. Nexata daxitajivi najëpaeya livaisi tsipaebabiabame. Pexaniajailivaisi tsipaebabiabame pacuenia Dioso jitsipa jivi pejinavanapaenexa. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamona jamatabëcueneëjëbiaya Jesúsjavabelia.

¹⁵Itsiata baitsi jane Jesús jamatabëcueneyapëtane bajarapamona jamatabëcueneëjëbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—¿Detsa xuajitsia jamatabëcueneëjëbiaya paneyanijobame? Panetocarenamëre palatanëyo. Taejitsianë, jai Jesús.

¹⁶Nexata bajarapamona Jesús tocaponarenatsi palatanëyo. Nexata Jesús jumaitsi bajarapamonaejavabelia:

—¿Jipatsa mapitabaraje, pevenënu, ruca mapapalatanëyotaje? jai Jesús.

Nexata bajarapamona jumaitsi Jesúsjavabelia:

—Romanonacua raja pepo pevetsinë pitabara, pevenënu, jai.

¹⁷Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

Nexata Jesús itsa jumecanaviata bajarapacuenia, bajarapamona jamatabëcuenenabenajaca bajarapacuenia Jesús pejumaitsijavata. Nexata bajarapamona jamatabëjumaitsi:

—iXaniavaetsia baja rovia Jesús panejumecanaviata! jamatabējai.

**Pacuenia Jesús tsipaeba jivi petēpaecujinae icatsia piasaējavanexa
yabara pelivaisi**

(Mt 22.23-33; Lc 20.27-40)

¹⁸Saduceovi saicaya itsalivaisi xaina. Bajarapamonae jamatabēcuenenavēxaniabiaya jumai tsabiabi: “Petēpaevi rabaja petēpaecujinae, icatsia apo asaē tsane,” jai tsabiabi. Nexata saduceovi imoxoyorenatsi Jesús. Saduceovi jumaitsi Jesúsjavabelia mapacueniaje:

¹⁹—Jesús, Moiséspijinē bajayata vajanacatoyaquinaelivaisi, jumaitsi mapacueniaje: “Ponē pematapijinē pepua penacojiobinē baja, totēpatsi pexi xainaenejeva, nexata juyapijinē bepita pematapijinēmi pijavami. Bajarapacuenia juyapijinē bepita pematapijinēmi pijavami pexi pexainaenexa bajarapovajavabelia. Nexata pexi itsa xainabeje, bematapijinēmi pexi petaenexa daxitajivi,” jai Moiséspijinē bajayata vajanacatoyaquinaelivaisi. ²⁰Nexata jinavanapa ēnacaemonae siete ponēbeje. Pepo matapijinē copiaya nacojioba. Nexata bajaraponē pijava vecuatēpa pexi xainaenejeva. ²¹Nexata pematapijinēmi pepēnarucaenē pita pematapijinēmi pijavami. Nexata icatsia bajaraponē ata tēpa pexi xainaenejeva bajarapovajavabelia. Nexata icatsia itsanē tuatuajēmatapijinē pita bajarapova. Bajaraponē ata icatsia tēpa pexi xainaenejeva bajarapovajavabelia. ²²Bajarapacuenia tēpa daxita siete ponēmibeje nacaemonae, bajarapova pepitaponaevi. Itsiata itsanē ata pexi apo xinae bajarapovajavabelia. Bajaraxuacujinae belia bajarapova ata tēpa baja. ²³“Jivi raja petēpaecujinae, Dioso icatsia asaēyaexanaenatsi,” jamē. ¿Detsa nexata ponē, bajarapamonaeyajuvēnēnē, pijava tsane bajarapova bajarapamatacabī? Daxita pamonaē siete ponēmibeje, nacaemonae, pitapona picani bajarapovami, jai saduceovi Jesúsjavabelia.

²⁴Nexata Jesús jumaitsi saduceovijavabelia:

—Paxamē saya pajamatabēcuenenavēxaniabame. Paxamē raja apo payapētaemē pacuenia Dioso pejumelivaisibaxutota jumaitsi. Apo payapētaemēnua pacuenia Dioso caējēpatsi daxitacuene pexanaenexa. Bajaraxuata jamatabēcuenenavēxaniabiaya paneyanijobame: “¿Detsa ponē pitsiana bajarapova?” panejamē. ²⁵Pamatacabī raja petēpaevimi Dioso icatsia asaēyaexanaenatsi, apo nacojiobi baja tsane. Bajarapamatacabita itsajivi ata pexēnatoyo apo canajetsi tsane pebijavabelia petonacojiobinexatsi. Bajarapamonae nacojiobinejeva, jinavanapae-na athēbētatsia pacuenia ángelevi jinavanapa. ²⁶Itsa pepacuenē paxamē paneyanijobame Dioso icatsia piasaēyaexanaejavanexatsi petēpaevimi, nexata pacatsipaebianatsi. Paxamē rabaja payapētaneme pacuenia bajayata Moiséspijinē peyaquinaebaxutota jumaitsi. Bajarapabaxutota jumaitsi pacuenia Moiséspijinē Dioso barēcuaicuajaitsi tsiquirinaemēyo

petajueyecaecotiajavaverena. Abraham baja pepuatēpae, Isaac ata baja pepuatēpae, Jacob ata baja pepuatēpae, bajarapamonae yabara bajayata Dioso jumaitsi Moiséspijinējavabelia mapacueniaje: “Xanē rabaja abaxē Abraham pijaDiosonē, Isaac ata pijaDiosonē, Jacob ata pijaDiosonē,” jai Dioso Moiséspijinējavabelia bajayata petēpaevimi yabara. ²⁷Bajarapacuenia Dioso pejumaitsixae, nayapētane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athēbētatsia. Nexata paxamē itsa pajumaitsimē: “Petēpaevi rabaja petēpaecujinae, icatsia apo asaē tsa-ne,” itsa pajamē, pinijicuenia pajamatabēcuenenavēxaniabame, jai Jesús saduceovijavabelia.

**Palivaisi bitso jivi bejumecovēnēta daxita Dioso pitorobilivaisianē
pejumecovēnētsijava matatoxenetsia yabara pelivaisi
(Mt 22.34-40)**

²⁸Judíovi pecujarubinē pata Jesúsjavaberena. Nexata bajaraponē Jesús jumetanetsi xaniavaetsia pejumecanaviataponaejava saduceovijavabelia. Nexata judíovi pecujarubinē jumaitsi Jesúsjavabelia:

—¿Detsa palivaisi bitso jivi bejumecovēnēta daxita Dioso pitorobilivaisianē pejumecovēnētsijava matatoxenetsia? jai.

²⁹Jesús nexata jumaitsi judíovi pecujarubinējavabelia:

—Palivaisi bitso jivi bejumecovēnēta, daxita Dioso pitorobilivaisianē pejumecovēnētsijava matatoxenetsia jumaitsi mapacueniaje: “Paxamē, Israelpijinē papemomoximē, pajumetaema. Vajatuxanenē rabaja caenē Dioso. ³⁰Bajaraponē panijatuxanenē, panijaDioso, daxita panejamatabēēthētojavavetsina pasivamēre. Pasivamēre daxita panejamatabēcueneta ata, daxita panenajamatabēxainaesaēta ata, daxita panesaēta ata,” pejailivaisi bitso jivi bejumecovēnēta daxita Dioso pitorobilivaisianē pejumecovēnētsijava matatoxenetsia. ³¹Bajaraxuacujinae pecotocaevilivaisi, palivaisi bitso jivi bejumecovēnēta, jumaitsi icatsia mapacueniaje: “Pasivamēre itsajivi ata pacuenia paxamē panijacuata panaasivamē,” jai. Bajarapalivaisi ata jivi bitso bejumecovēnēta. Ajibi rabaja itsalivaisi pematatsēnēa, Dioso pitorobilivaisi, palivaisi bitso jivi bejumecovēnēta,” jai Jesús judíovi pecujarubinējavabelia.

³²Nexata icatsia judíovi pecujarubinē jumaitsi Jesúsjavabelia:

—Jesús, xaniajamē rabaja pacuenia jumaitsimē. Caenē tsaena Dioso ponapona. Ajibi tsaena pematatsēnēa itsanē Dioso. ³³Bejumecovēnētatsi Dioso daxita vajajamatabēēthētojavavetsina, daxita vajanajamatabēxainaesaēta ata, daxita vajasaēta ata. Biasivatsi itsajivi ata pacuenia vaxaitsi vajacuata nasivatsi. Daxita bajaraxua itsa jumecovēnētatsi, bitso nacatonamatamota Diosojavabelia. Bajaraxua bitso nacatonamatamota ofrenda Diosojavabelia vajarajutabiabijava matatoxenetsia. Baitsi xua Diosonexa

ofrendacuenia totajuitabiabatsi, dajubicuene itsa tobeyabiabatsi, baja-raxua matatoxenetsia bitso nacatonamatamota, jai judíovi pecujarubinē Jesúsjavabelia.

³⁴ Jesús itsa jumetane judíovi pecujarubinē xaniavaetsia pejumecanaviatsijavatsi, nexata Jesús jumaitsi judíovi pecujarubinējavabelia:

—Tsiquirijavayo catosaica Diosojavabelia nenajamatabēcuene-copatsinexa nijatuxanenē Dioso nexanaenexa, jai Jesús judíovi pecujarubinējavabelia.

Bajaraxuacujinae daxitajivi baja Jesús cujunavatsi. Nexata baja Jesús jivi jamatabēcueneējēbiaya livaisi apo yanijobitsi.

Pacuenia Jesucristo yabara Davidpijinē bajayata tajēvelia:

“Tajatuxanenē,” jai, yabara pelivaisi

(Mt 22.41-46; Lc 20.41-44)

³⁵ Jesús livaisi tsipaeba templobota. Jesús pijacuata nayabarajumaitsi:

—¿Detsa xuajitsia judíovi pecujarubivi apo jumecovēnētsi Cristo Dioso pexēnatocuene, ponē athēbēvetsica Dioso itorobjiitsiatsica jivi pecapane-paenexa? Bajarapamonae saya jamatabēcuenenavēxaniabiaya jumai tsabiabi Cristo yabara: “Cristo raja itsa patsiana, Davidpijinē pemomo tsa-ne,” jai tsabiabi. ³⁶ Davidpijinē bajayata Espíritu Santo pejamatabēcueneta tajēvelia jumaitsi Cristo yabara mapacueniaje:

Dioso jumaitsi tajatuxanenējavabelia: “Ecare abaxē tacujuanenia. Vecatsivajēnae jumecovēnētsiaexanaenatsi abaxē copiaya nijavajabitsaē nitorobicuenganexa,” jai Dioso tajatuxanenējavabelia,

jai bajayata tajēvelia Davidpijinē mapacueniaje Cristo yabara.

³⁷ Nexata Davidpijinē bajayata Cristo yabara: “Tajatuxanenē,” itsa jai, nexata Cristo Davidpijinē apo pemomo. Tsipaji baja cajena Cristo saicaya Dioso pexēnato, nayabarajai Jesús judíovi pecujarubivi pecanaējētsinexa Cristo Dioso pexēnatocuene.

Nexata jivibitsaētoخانeto Jesús pejumetaevitsi jumebarēyatanetsi.

Pacuenia Jesús jumaitsi jivijavabelia: “Judíovi pecujarubivi bitso pinijicuenia Dioso naneconitsiaexanaenatsi,” jai yabara pelivaisi

(Mt 23.1-36; Lc 11.37-54; 20.45-47)

³⁸ Jesús jivi ayaibitsaētoخانetojavabelia, pijajivijavabelia ata, livaisi tsipaeba. Nexata Jesús livaisi petsipaebijavata jumaitsi mapacueniaje:

—Xania, panayajivitaema, palivaisi judíovi pecujarubivi tsipaeba-pona, panejumecovēnētsiyaniva. Bajarapamonae jitsipabiaba tomara tuatuajējava piapiajavanē penaxatabiababavanapaenexa jivi peyaiyataenexatsi. Jitsipabiabanua bitso yayiyataeya pebajacobinexatsi callejava.

³⁹ Bajarapamonae itsa najoneyabiaba judíovi penacaetuatabiabibonējava,

jitsipabiaba penaenexa pexaniavirijavanëta. Nexata natsiitapetabiaba penaenexa peyaiyataevitsi penaenexa petsinubijavanëta. Bajarapamonae itsa napatabiaba fiestajava ata, jitsipabiaba penaenexa peyaiyataevitsi penaenexa petsinubijavanëta. ⁴⁰Bajarapamonae yamaxëitojorobiaya vecuanotabiabanua pamonajivi pevecuatëpaevanëtsi pecobecovëjavaxi. Bajarapamonae itajara pinijicuenia vajëcabiaba Diosojavabelia. Itsiata pepo pexaniajaijamatãbëcueneta apo vajëcabiabi. Bajarapacuenia vajëcabiaba saya jivi petaenexatsi Dioso itajara bitso bepejumecovënëtsivi. Nexata bajarapamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamona Dioso apo pejumecovënëtsivi, jai Jesús judïovi pecujarubivi yabara.

Pacuenia ofrenda rajuta Diosojavabelia pamona pevecuatëpaevatsi yabara pelivaisi
(Lc 21.1-4)

⁴¹Itsamatacabi Jesús eca templobota. Pacajonita jivi palata jeyabiaba ofrendacuenia perajutsijava Diosojavabelia, bajarapacajoni pecanacujitsita Jesús eca. Nexata Jesús cobetaeyeca jivi palata pejeponaejava bajarapacajonita. Ayaijava palata pexainaevi, caejivi canacujitsia, ayaijava palata jepona. ⁴²Bajarajota napata pamona pevecuatëpaevatsi, bepejiobiva. Nexata bajarapova najia anijapalatanëyobeje piamatamobinëyobeje. ⁴³Nexata Jesús junata pijajivi. Jumaitsi pijajivijavabelia:

—Xaniajanë pacuenia pacatsipaebijitsiatsi. Mapovaje pamona pevecuatëpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatãbëcuenebarëya daxita xua itsamonae jia bajarapacajonita matatoxenetsia. ⁴⁴Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje bepejiobiva daxitajavayomi penaevetsijavayotaminexa, jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

Pacuenia Jesús pijajivitonëjavabelia tajëvelia tsipaeba itsamatacabi itsanacuapijivi templo pexuabijavanexatsica yabara pelivaisi
(Mt 24.1-2; Lc 21.5-6)

13 ¹Itsa baja Jesús, pijajivi yajava, pitsaparena templovecua, Jesús pijajivitonë jumaitsi Jesúsjavabelia:

—i Tajatuxanenë, jica, nataema mapaibotoxanetonëje, mapaboxanetonë atajel jai Jesús pijajivitonë.

²Nexata Jesús tajëvelia jumaitsi pijajivitonëjavabelia:

—Daxita raja mapaboxanetonë tanemeje, bajarapaboxanetonëmi itsamatacabi itsanacuapijivi penetsianica irabetsica. Nexata mapaibotoxanetonëmije itsai boto ata pejumavereca apo bocae tsane, jai Jesús tajëvelia pijajivitonëjavabelia.

**Pacuenia itsijitsia Jerusalén tomarata, daxitanacuanējāva ata,
mapanacua pecopiarucaevājēnaeje yabara pelivaisi
(Mt 24.3-28; Lc 21.7-24; 17.22-24)**

³Jesús eca petsutojumata. Patsutojumata olivonaenē apaaxayo templobo canacujitsijavalia, bajarapatsutojumata Jesús eca. Nexata Pedro, Santiago, Juan, Andrés, bajarapamatabēxēyo pijaepatojavata Jesúsjavabelia jumaitsi:

4—Patajatuxanenē, pajitsipajē patanetsipaebinexamē patayapētaenexa paepatota copiapatsijitsia xua vajunupaebame. ¿Detsa peneta pitsicuene pataenajē itsa copiapatsijitsia xua jumaitsimē templobo yabara? jai bajarapamonae Jesúsjavabelia.

⁵Jesús nexata tajēvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaename. Pētsa panacopatame itsajivi ata pape-cayamaxēitojorobinexa. ⁶Tsipaji raja peyamaxēitojorobivinexa ayaibitsaēto patsiana hexanē itajara tsane. Bajarapamonae najumetsēnētsiaya jumai tsane: “Xanē raja Cristonē, Dioso athēbēvetsica taneitorobinētsica jivi tacapanepaenexa,” jai tsane. Bajarapamonae jivi, ayaibitsaēto yamaxēitojorobiana.

⁷Vajabitsaē pexanaejāva imoxoyonacuanējāva, tajēnacuanējāva ata, pavēnēlivaitsaename. Itsiata pētsa pajunavame. Bajara peneta itsane mapanacua pevereveceavājēnaeje. Itsiata baitsi jane bepījia bajarapamatacabi mapanacuaje abaxē apo vereverecajuni tsane. ⁸Mapanacuaje pevereveceavājēnae peneta copiaya itsaviriavi nabena itsaviriavijavabelia. Itsanacuanēpījivi pijinia nabena itsanacuanēpījivijavabelia. Ira najēabiana ayaicuenia nacuanējāva. Ayaijaniboxaneto najetarucaena nacuanējāva. Ayaicuenia bitso jivi bejiobi tsane nacuanējāva. Daxita bajarapacune itsa pataename, saya abaxē taxuxuabaponaena piayaicune, jai Jesús pijajivijavabelia tajēvelia pevajunupaebijavata pacuenia itsamatacabi itsijitsia mapanacuata.

⁹Icatsia Jesús tajēvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Nexata paxamē xania panayajivitaename. Tsipaji raja xanē patajivixamē, tomara pevetsivijavabelia pacacaponabiabiana. Bajarapamonae pacajumaconibabeyabiabiana judfovi penacaetuatabibonēta. Paxamē patajajivixamē pacanubiana nacuaevetsivi pitabarata, presidentevi ata pitabarata. Nexata bajarajota bajarapamonaejavabelia patsipaebianame xanē talivaisi. ¹⁰Nexata daxitanacuanēpijivijāva patsipaebanajetarubenaename pecapanepaelivaisinexatsi. ¹¹Itsa pacataicaena papecanconitsinexa nacuaevetsivijavabelia, pētsa pajamatabēcūenebējamē panenayajivicuauaijainexa bajarapamonaejavabelia. Palivaisi

panejamatabëcuenevetsina pacatonaitajëtsiana, patsipaebianame baja-rapamonaejavabelia. Tsipaji raja bajarapaepatota Espíritu Santo pacacuaicuaijaiyaexanaena. Paxamë baitsi panejamatabëcueneta apo pacuai-cuaijamë tsane. ¹² Bajarapamatacabi patajajivixaemë, panacaemonae atamë, itsajivi panijamonaejivi ata pacacanajetsiana nacuaevetsivijavabelia papecabeyaxuabinexa. Paneaxa ata, paneena ata, pacacanajetsiana nacuaevetsivijavabelia papecabeyaxuabinexa. Panexi ata pacacanajetsiana nacuaevetsivijavabelia papecabeyaxuabinexa. ¹³ Daxitajivi pacaitoya tsane patajajivixaemë. Itsiata pajivi ajamatabëcuenesaë tsane Dioso pejumecovënëtsijava nacua pecopiarucaejavabelianexa, bajarapajivi Dioso capanepaenatsi, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

¹⁴ Icatsia Jesús tajëvelia vajunupaeba papiayaicuene itsamatacabi copiapatsijitsia Jerusalén tomarata. Jesús jumaitsi pijajivijavabelia mapacueniaje:

—Diosojumepaebinëmi, profeta Danielpijinë, tajëvelia Dioso pitorobicueniatsi piayaicuene pevajunupaebilivaisi bajayata yaquina. Xua panijatamaranëmi vereverecaeyaexanaejitsiatsi, bajaraxua pelivaisi yaquina. (Pajivi lebiana mapalivaisije, yapëtaena papiayaicuene vajunupaeba mapalivaisitaje.) Nexata paxamë pataename bajarapapiayaicuene penucaejava templobota, itsajota picani apo benucae. Nexata Judea nacua pejinavanapaevi itsa vënëlivaisitaena bajarapapiayaicuene penucaejava templobota, pëtsa nubena. Naxanitsiayo bajarapamonaë rëcëpecaena ibotsutonëjavabelia. ¹⁵ Pajivi pijabojumata athëbëyo ecaya, itsa vënëlivaisitaena bajarapapiayaicuene penucaejava templobota, bajarapajivi perunaecujinaetsica bepijia najetabajiraviana. Pëtsa joneya pijaboyalía pejutsinexa pecobecovë. ¹⁶ Pajivi pijinia nacuenebaponapona pijapabita, itsa vënëlivaisitaena bajarapapiayaicuene penucaejava templobota, bepijia najetabajiraviana. Pëtsa naviata pijaboyabelia pejutsinexa penaxatabijava. ¹⁷ iPapetiriavi penacueto yacotajinavanapa, bitso bejiobi tsane bajarapamatacabi! iBitso nabejiobitsiaya jinavanapaena! iPapetiriavi ata mitoapaenacuetoxi isajinavanapa, bitso bejiobi tsane bajarapamatacabi! ¹⁸ Bajaraxuata tajëvelia Diosojavabelia pavajëcare piayapëbejematacabita papecatocopiapatsiyaniva bajarapapiayaicuene. Nexata pamatacabi parëcëpecaename, pexaniamatacabi Dioso pacatocopatsiana bitso nabejiobitsiaya paneponaeyaniva. ¹⁹ Tsipaji raja bajarapamatacabi bitso jivi bejiobi tsane. Pabejiobicuene abaxë jivi caeto ata apo tae Dioso nacua pexanaecujinae, bajarapabejiobicuene taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo bejiobiaexanaetsi tsane. Tsipaji Dioso epatua yatuucutsiana jivi bitso nabejiobitsiaya pejinavanapaematacabianëminexa, bitso jivi nabejiobitsia pejinavanapaeyaniva. ²⁰ Dioso epatua itsa apo yatuucutsi tsipae bitso jivi nabejiobitsiaya

pejinavanapaematacabianëminexa, caejivi ata apo asaë tsipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejiobitsiaya pejinavanapaematacabianëminexa, jai Jesús pijajivijavabelia tajëvelia pevajunupaebijavata papiayaicuene itsamatacabi copiapatsijitsia Jerusalén tomarata.

²¹ Icatsia Jesús tajëvelia vajunupaeba pacuenia itsamatacabi mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi. Jesús jumaiti pijajivijavabelia mapacueniaje:

—Nexata itsajivi yamaxëitojorobiaya itsa pacajumaiti tsane: “Pataema. Mara Cristo nucaje,” itsa pacajai tsane, pëtsa pajumecovënëtame. Itsa pacajumaiti tsane: “Bajarajota nuca Cristo,” itsa pacajai tsane, pëtsa pajumecovënëtame. ²² Itsamonae jumai tsane: “Xanë raja Cristonë,” jai tsane. Itsiata jemajai tsane. Itsamonae jumai tsane: “Diosojumepaebinënë raja, profetanënë,” jai tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitojorobinexa saya jivi. Nexata bajarapacuenia itsamonae yamaxëitojorobaponaenatsi. Itsiata pamonae pepacuene Dioso pijajivi, Dioso pitapetsivitsi, bajarapamonae apo yamaxëitojorobi tsanetsi. ²³ iXania baja tsane! Xanë raba-ja pacatsipaebatsi tajëvelia dexitacuene panenayajivitaenexa, jai Jesús pijajivijavabelia tajëvelia pevajunupaebijavata pacuenia itsamatacabi mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi.

**Pacuenia Jesús tajëvelia navajunupaeba icatsia pepatsijavanexatsica
petëpaecujinae yabara pelivaisi
(Mt 24.29-35, 42, 44; Lc 21.25-36)**

²⁴ Jesús tajëvelia navajunupaeba itsamatacabi icatsia pepatsijavanexatsica. Jesús jumaiti pijajivijavabelia mapacueniaje:

—Xanë tapatsivajënaetsica, jivi taena pecujunavicuene. Jivi nabejiobitsiaya jinavanapaena. Nexata jivi nabejiobitsiaya pejinavanapaematacabicujinae matacabipijijuumeto aitaquiri tsane. Meravipijijuumeto ata aitaquiri tsane. ²⁵ Tulupu ata othopaenica irabetsica. Dexitacuene, xua rubena athëbëtatsia, najëabiana. Xaniavaetsia apo rubenae tsane. ²⁶ Nexata bajarapaepatota xanë, Daxitajivi Pematapijinënë, jivi netaena athëbëvetsica itarërëbota tanajetarucaejava. Patsianicajë dexitacuene taevetsinexa. Tanivenivenaecotia yajavapatsianicajë. ²⁷ Bajaraxuacujinae ángelevi itorobianajë, pamonae tajajivi, Dioso pitapetsivitsi, daxitanacuanëjavaverena tanetocaetuatsinexa xanëjavaberena, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

²⁸ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaiti pijajivijavabelia mapacueniaje:

—Pacanaëjère pacuenia itsi higuerranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonejavanexa. ²⁹Bajara pijinia pacuenia peneta itsa pataename pecopiapatsijava, xua yabara pacatsipaebatsi, nexata payapëtaename imoxoyo baja tava-jënae tsane tapatsijavanexatsica. ³⁰Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëajavabelia ata, apo vereverecae tsane. Matapania xua yabara pacatsipaebatsi, itsa baja copiapatsiana, bajarapamonae jane baja vereverecaena. ³¹“Itaboxo, ira yajava, tsitecaena daxitamatacabijavabelianexa,” jama-tabëjai ata tsane itsamonae, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³² Jesús icatsia jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsijitsia daxita xua yabara tajëvelia pacatsipaebatsi. Athëbëpijivi ata, ángelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtane, jai Jesús pijajivijavabelia.

³³ Icatsia Jesús jumaitsi pijajivijavabelia:

—Xania baja tsane. Daxitamatacabi saya panecopiaevetavanapaename. Tsipaji raja apo payapëtaemë tsane paepatota patsijitsianëtsica. ³⁴Nexata pacuenia bo pexainanë, pijabo evetsiaexana pijajivi, bajara xanë itsinë tsane. Bo pexainanë itsa ponaejitsia tajënacuyabelia, pijajivi evetsiaexana pijabo. Nexata pijajivi, caejivi canacujitsia, rajutapona petonacuenebavanapaejavanexatsi pecovëta. Nexata pijajiviyajuvënë itoroba baupa pevetsinënexa petoetevabiabinexatsi pijabobaupa. Bo pexainanë jumaitsi bajaraponëjavabelia: “Xaniavaetsia netoetevabiabianame baupa matapania tapatsimatacabijavabelianexa,” jai bo pexainanë. ³⁵Nexata paxamë ata bajarapacuenia panecopiaevetavanapaename matapania tapatsimatacabitsicajavabelianexa. Tsipaji raja apo payapëtaemë tsane pamatacabita patsijitsianëtsica. Ajena meravi, caecanivia, patsipajë. Meravi tuatuajëta ata patsipajë. Matacabivëpata ata patsipajë. Bajayacunua ata patsipajë. ³⁶Bajaraxuata xania baja tsane. Daxitamatacabi saya panecopiaevetavanapaename. Jemata itsa patsipajë, paepatota apo panecopiaevetsimë, pacacaxitarabijitsipatsi panemajitsijavata. ³⁷Palivaisi pacatsipaebatsi paxamëjavabelia, daxitajivinexa jumaitsinë. iDaxitamatacabi saya panecopiaevetavanapaename! jai Jesús pijajivijavabelia.

**Pacuenia picani Jesús pijavajabitsaë jamatabëvaetabatsi
yabara pelivaisi**

(Mt 26.1-5; Lc 22.1-2; Jn 11.45-53)

14 ¹Anijamatacabibeje abaxë ajibi pejonenexa pascuafiesta, itsafiestanua, pafiestajava judíovi baxane levadurata matajërëbinejeva

pexanaepan. Nexata bajarapafiestabejevajënaeya, sacerdotevi penamata-caitorobivi, judíovi pecujarubivinu, najumejaita picani bajarapafiestajava pevaetabinexatsi Jesús. Penajumetsënëtsilivaisita picani jamatabëvætabatsi Jesús pebeyaxuabinexatsi. ²Itsiaa bajarapamonæ najumaitsi:

—Fiestajava meta abaxë apo vaetabi tsanetsi jivi vajanacaitsacueniabivaniva, najai bajarapamonæ.

Pacuenia Jesús petiriva tsimataepanatsi petuxujuviaceitera yabara pelivaisi
(Mt 26.6-13; Jn 12.1-8)

³Jesús ponapona Betania tomarata, Simón pijabota. Simón bajayajebi bitso peperabëtsabanaenëmi. Nexata Jesús pexaeyecaejavata mesata, petiriva cobenaimoxoyorenatsi petuxujuviaceitera, nardovënëra, alabastrobotellabëta pejeaceitera. Bajarapora bitso penamatamotsira. Nexata bajarapova yavëto-xobiaxuaba bajarapora, petuxujuviaceitera. Bajaraxuacujinae Jesús tsimataepanaicatsi bajarapaaceitera. ⁴Bajarajota itsamonæ penaenævi itsa taeyena Jesús petsimataepanaejavatsitsica, bajarapamonæ jamatabëanaepanareca. Nexata ëpamonæ najumai tsenæ:

—¿Detsa xuajitsia saya xuaba bajarapacuenia maporaje? ⁵Canajetsipa rajane. Nexata matamopitsipa trescientos padenariobeje matatoxenetsia. Bajarapapalata rajutsipa bepejiobivi bajarapacuenia peyavenonaenexa, najai tsenæ ëpamonæ.

Bajarapamonæ anaepana bajarapovajavabelia.

⁶Nexata Jesús jumaitsi bajarapamonæjavabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuenæ nexanaje. ⁷Daxitamatacabi raja bepejiobivi jinavanapa itsaxuayo pajinavanapame. Pamatacabi pajitsipame pexaniacuenæ panetoexanaenexa bepejiobivijavabelia, nexata patoexanaenæ. Itsiaa baitsi jane xanë daxitamatacabi apo ponaponaenë tsane paxamëjavata. ⁸Mara pape-tirivaje pexaniacuenæ netoexana pacuenia baja cuenecaëjëpatsi. Itsamonæ petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviaceitera, abaxë apo tæpae atanë. Nexata baja bajarapova neperabëxaniavaeta itsamonæ tanemëthëtsivajënae. ⁹Xaniajanë pacuenia pacatsipaebijitsiatsi. Daxitanacuanëjava tajajivi itsa paebanajetarubenaena pexanialivaisi jivi tacapanepaelivaisinexa, vajunupaebabiabiananua pacuenia exana xanëjavaberena mapapetirivaje, jai Jesús pijajivijavabelia.

Pacuenia Judas pona Jesús pijavajabitsaë pecobeyabelia
pecanajetsinexatsi yabara pelivaisi
(Mt 26.14-16; Lc 22.3-6)

¹⁰Jesús pijajivi doce ponëbejeyajuvënënë pevënë Judas. Itsavënë Iscariote. Nexata Judas pona sacerdotevi penamatacaitorobivijavabelia.

Jesús jane baja yajumejailiatsi pecanajetsinexatsi. Nexata jane baja Judas Jesús canajetatsi sacerdotevi penamatacaitorobivi pecobeyabelia. ¹¹Nexata sacerdotevi penamatacaitorobivi itsa tane bajarapacune, barëya. Jumaitsi bajarapamonae Judasjavabelia:

—Palata pacarajutsianatsi, jai.

Nexata jane baja xuacujinae Judas Jesús naitaxutocaevetaponaponatsi. Nexata paepatota Judas toyapëxanepanatsi, perajutsinexa jane baja bajarapamonae pecobeyabelia.

**Pacuenia Jesús barë nabane pijajivi pecopiarutsinabani baja
pebeyaxuabivajënaetsi yabara pelivaisi
(Mt 26.17-29; Lc 22.7-23; Jn 13.21-30; 1 Co 11.23-26)**

¹²Junua jane baja fiesta, pafiestajava judíovi baxane levadurata mata-jërëabinejeva pexanaepan. Bajarapamatacabi ovejaxi babia pexaenexa pascua fiestamatacabi. Nexata Jesús yanijobatsi pijajivi.

—¿Detsa belia paponanajë patacamitsaexanaenexa pascua fiestamatacabi pexaejava nexaenexa? jai Jesús pijajivi.

¹³Nexata Jesús itoroba anijanëbeje pijajivitonëbeje. Jumaitsi:

—Tomarabelia paponarebeje. Bajarajotalia pacaxitajarabianamebeje mera canalito pecanajetarucaenë. Bajaraponë papënanajetarucaenenamebeje. ¹⁴Pabota bajaraponë joneyojopaena, bajarapabo pexainaenëjavabelia pajumaitsimëbeje tsane: “Vajanacacujarubinë raja jumaitsi: ‘¿Detsa jota pënëyatuucutsibo eca, pabota tajajivi barëxaejitsianë xua jivi baxane pascua fiestamatacabi?’ jai raja vajanacacujarubinë,” pajamëbeje tsane bajarapabo pexainaenëjavabelia. ¹⁵Nexata athëbëabetsia anijairabeje pënëyatuucutsibojavata, pacatsitajëtsianabeje. Bajarapaboënëta athëbëyotsia paira ayaiënëtuatuajë tsane. Daxitacuene bajarajota xainae-na. Nexata vajaxaejavanexa bajarajotatsia paexanaenenamebeje, jai Jesús pijajivitonëbejejavabelia.

¹⁶Nexata jane baja ponabeje Jesús pijajivitonëbeje. Patabeje baja tomarabelia. Caxitajarababeje daxita pacuenia Jesús jumaitsitsibeje. Nexata xua jivi baxane pascua fiestamatacabi daxita Jesús pijajivi pebarëxaenexa, bajaraponëbeje exanabeje jane baja.

¹⁷Itsa baja meravitsia, Jesús patajopa bajarajota pijajivi, doce ponëbeje, yajava. ¹⁸Daxita mesata pexaeyenaejavata, Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë, xanëjavata pexaeyecaenë, necanajetsiana tajavajabitsaë pecobeyabelia, jai Jesús.

¹⁹Nexata Jesús pijajivi bejamatabëjiobireca. Nexata Jesús pijajivi, caenë canacujitsia, Jesúsjavabelia yanijobapona.

—¿Xanë tsaja tsane? jai tsaponae Jesús pijajivi.

²⁰Nexata Jesús jumaitsi pijajivijavabelia:

—Doce paponēmēbejeyajuvēnēnē raja. Ponēbeje peneta caecuenia panajuacajabutsianajēbeje panbē platojavabelia, bajaraponē tsane.

²¹Nexata xanē, Daxitajivi Pematapijinēnē, tēpaenajē pacuenia baja cajena xanē yabara Dioso pejumelivaisibaxutota tajēvelia jumaitsi. Itsiata ponē tajavajabitsaē pecobeyabelia necanajetsiana, bajaraponē bitso bejiobi tsane pinijicuenia. Itsa meta bajaraponē apo naexanae tsipae, bajarapacuenia apo necanajetsi tsipae. Nexata xanepanaejitsipatsi bajaraponē itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia.

²²Nexata pexaeyenaejavata Jesús pita panbē. Jesús jumaitsi Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae epatsēnēquejeba bajarapapanbē. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

²³Bajaraxuacujinae icatsia Jesús copavēnējavata yapita pijajivi pebarēapaeranexa. Diosojavabelia jumaitsi:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Daxita Jesús pijajivi bajarapora apa.

²⁴Jesús pijajivijavabelia jumaitsi:

—Tajana raja othopaena jivi ayaibitsaētoخانeto pecapanepaenexatsi.

Nexata tatēpaejava pejamatabēcueneta, jivi yapētaena pepacuene xania-jai Dioso jivi pecapanepaejavanexa, pacuenia baja cajena tajēvelia Dioso najumecapanepaeya jumaitsi. ²⁵Xaniajanē pacuenia pacatsipaebijitsiatsi. Xanē rabaja matavējēa apo apaenē tsane uvacuaira mapanacuataje, matapania icatsia apaenajē Dioso pijanacuatatsia pejanauvacuaira, jai Jesús pijajivijavabelia.

Pacuenia Jesús tajēvelia jumaitsi Pedrojavabelia: “Pedro, xamē raja nayavajunuaxainaename tajajivitonēcuenemē,” jai, yabara pelivaisi (Mt 26.30-35; Lc 22.31-34; Jn 13.36-38)

²⁶Jesús pijajivi barēnaxēana Diosojumevajianē. Bajaraxuacujinae Jesús pijajivi barēpona petsutojumabelia. Patsutojumata olivonaenē apaaxayo, bajarapatsutojumabelia barēpona. ²⁷Nexata bajarapatsutojumata Jesús jumaitsi pijajivijavabelia:

—Daxita raja paxamē ajena, pameravi, panexuabarēcēpecaename.

Tsipaji rabaja patanexuabarēcēpecaejavanexamē yabara, Dioso pejumelivaisibaxutota tajēvelia jumaitsi mapacueniaje: “Beyaxuabianatsi raja oveja pevetsinē. Nexata pijaovejabitsaēto nacayajatsia rēcēpecaena,” jai Dioso pejumelivaisibaxutota paxamē patanexuabarēcēpecaejavanexamē yabara.

Nexata ajena, pameravi, tajavajabitsaë itsa nevaetabiana tanebeyaxua-binxeta, daxita paxamë panexuabarëcëpecaename. ²⁸Itsiata baitsi jane tatëpaecujinae icatsia asaënë tsane. Nexata paxamë panevajënaeyabelia copiata ponaenajë Galilea nacuayabelia, jai Jesús pijajivijavabelia.

²⁹Nexata Pedro jumaitsi Jesúsjavabelia:

—Daxita mapamonaeye caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

³⁰Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, nania-naevëpata, anijajumebeje vacara pefiabivajënaeya, nayavajunuaxainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

³¹Itsiata Pedro ajumesaëya jumaitsi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuaxainaenë tsane nijajivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

Pacuenia Jesús vajëta Diosojavabelia Getsemanívenëjavata yabara pelivaisi
(Mt 26.36-46; Lc 22.39-46)

³²Jesús, pijajivi yajava, pata Getsemanívenëjavata. Bajarajota Jesús jumaitsi pijajivijavabelia:

—Panevetenare abaxë majotaje tavajëtsiepatoyo Diosojavabelia, jai.

³³Nexata Pedro, Santiago, Juan, bajara saya pamatabëxëyo, Jesús barë-pona pesaicaeyojavabelia. Bajaraxuacujinae Jesús bitso najamatabëxaina. Nexata bejamatabëjiobireca. ³⁴Nexata Jesús jumaitsi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata tanajamatabëxainaejava yatëpaejitsianë. Paxamë abaxë majotaje panacopabare. Paitavamë tsane. Pëtsa pamajitame, jai Jesús pijajivi acueyabi ponëbejejavabelia.

³⁵Nexata Jesús, caenë, pevajënaeyabelia icatsia tsiquirijavayo ponataba. Tsipaji Jesús tajëvelia yapëtane pacuenia Dioso tocopatatsi bitso ayai-cuenia pebejiobiaexanaenexatsi paepatota pijavajabitsaë beyaxuabijitsiatsi. Nexata Jesús irataeya bocajunua pevajëtsinexa Diosojavabelia. Vajëta picani Diosojavabelia bitso bejiobitsiaya pebeyaxuabiyanivatsi. ³⁶Nexata Jesús pevajëtsijavata Diosojavabelia, jumaitsi:

—Taxa Diosomë, netocopatame picani tanebeyaxuabinexa betajiobicuena. Daxitacuene raja cacaëjëpa nexanaenexa. Nexata necapanepare bajarapabejiobicuenevecua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús pevajëtsijavata Diosojavabelia.

³⁷Bajaraxuacujinae Jesús naviarena acueyabi ponëbeje pijajivijavabere-na. Caxitajaraba Jesús pijajivi pemajitanubenaevi. Nexata Jesús jumaitsi Pedrojavabelia:

—Simón, ¿pamajitanubename tsaja? ¿Apo pacacaējēpae tsabaja rovia caeepatoyo ata paneaitavatsenaenexa? ³⁸Pětsa pamajitame. Paitavamēre. Pavajēre Diosojavabelia pibisiacuene paneexanaeyaniva. Tsipaji raja dova-thi pacajamatabēcuenējēbiana. Paxamē picani panejamatabēcueneta pexaniacuene jamatabēpaexanabiabame. Itsiata baitsi jane apo pajamatabēcuenesaēmē pexaniacuene paneexanaenexa, jai Jesús Pedrojavabelia.

³⁹Nexata icatsia Jesús pona pecovēyabelia pevajětsinexa icatsia Diosojavabelia. Bajara icatsia pacuenia Jesús vajēta Diosojavabelia pacuenia vajēta copiata. ⁴⁰Icatsia Jesús naviarena pijajivijavaberena. Caxitajaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana. Nexata Jesús pijajivi apo yapētae pacuenia jumecanaviatsijitsia Jesúsjavabelia. ⁴¹Icatsia abaxē Jesús naviata pecovēyabelia pevajětsinexa icatsia Diosojavabelia. Bajaraxuacujinae, acueyabi baja xuabeje pevajětsicujinae, Jesús icatsia rena pijajivijavaberena. Jumaitsi Jesús pijajivijavabelia:

—¿Abaxē tsarovia tsiteca pamajitanubename? Ajibi rabaja. Copiapata rabaja paepatota xanē, Daxitajivi Pematapijinēnē, necanajetsijitsia pibisiacuene pexanaevi pecobeyabelia. ⁴²Panonobapunare baja. Ponaenatsi baja. Imoxoyo rabaja najetaruca tajavajabitsaē pecobeyabelia tanecanajetsinēnexa, jai Jesús pijajivijavabelia Judas yabara.

Pacuenia Jesús vaetabatsi pijavajabitsaē yabara pelivaisi

(Mt 26.47-56; Lc 22.47-53; Jn 18.2-11)

⁴³Jesús pijavajabitsaē pevaetabijavatanexatsi, cuaicuaijai tsanucaē pija-jivijavabelia. Nexata bajarapaepatota patanajetaruca Judas, Jesús pijajivi doce ponēbejeyajuvēnēnēmi. Judas pēnanajetarubenatsi jivi ayaibitsaē-toxaneto. Bajarapamonaeyajuvēnēvi itsamonae canajetarubena espadanē. Itsamonae canajetarubena naebonē yajava. Bajarapamonaē itorobatsi sacerdotevi penamatacaitorobivi, judíovi pecujarubivi ata, judíovi pijaancianovi ata. ⁴⁴Judas pebarērenavajēnae bajarapamonaē, copiaya baja cajena Judas tsipaeba pacuenia bajarapamonaē yapētaejitsia Jesús cuene. Judas jumaitsi mapacueniaje:

—Ponē raja peneta bajacobiaya itabaratsutsunexuabianajē, bajaraponē Jesús tsane. Bajaraponē pavaetabianame. Pacobecētsianame xaniavaetsia. Nexata panecobecētsinē pacaponaeremena, jai baja cajena Judas pematacanajetarucaevijavabelia pebarērenavajēnae.

⁴⁵Nexata jane baja Judas itsa patanajetaruca, exana pacuenia baja cajena jumaitsi pematacanajetarucaevijavabelia. Judas Jesús itabaratsutsuniaya bajacobatsi, Judas jane baja pematacanajetarucaevi peyapētaenexa Jesús cuene.

⁴⁶Nexata jane baja Jesús pijavajabitsaē vaetabatsi. Cobecētatsi xaniavaetsia.

⁴⁷Bajarajota Jesús pijajiviyajuvēnēnē pijaespada navemarajonotaxuabina. Muxuyoropaebiaxuaba sacerdotevi pepo penamatacaitorobinē pijajivitonē. ⁴⁸Nexata Jesús jumaitsi pevaetabivitsijavabelia:



(Mr 14.46)

—Paxamē meta panetaneme betanacobetoxotsinē. Bajaraxuata pacapone name espadanē, naebonē yajava, patanevaetabinexamē pacuenia pavaetababiabame penacobetoxotsinē. ⁴⁹Xanē caematacabi canacujitsia Dioso pejumelivaisi paxamējavabelia pacatsipaebabiabatsi templobota. Itsiata bajarapamatacabi apo panevaetabimē. Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata tajēvelia jumaitsi xanē yabara, jai Jesús pevaetabivitsijavabelia.

⁵⁰Nexata jane baja Jesús pijavajabitsaē pevaetabijavatatsi, daxita Jesús pijajivi xuabarēcēpecatsi pacuenia baja cajena Jesús jumaitsi tajēvelia pijajivijavabelia.

Pacuenia pevējēato najetabajirava yabara pelivaisi

⁵¹Pevējēato pēnanajetaruca Jesús pecaponaevitsi. Sábanata namataquinanajetaruca. Nexata pevējēato bajarapamonae yasábanavaetabatsi.

⁵²Nexata pevējēato sábanaisinaxuaba. Najetabajirava jumasanē.

**Pacuenia Jesús nutatsi judíovi penamatacaitorobivi pitabarata
yabara pelivaisi**

(Mt 26.57-68; Lc 22.54-55, 63-71; Jn 18.12-14, 19-24)

⁵³ Jesús caponaliatsi sacerdotevi pepo penamatacaitorobinē pijabo-yabelia. Nacaetuata bajarajota daxita sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava. ⁵⁴ Itsa baja Jesús caponaliatsi, nexata Pedro bajarapamonae pecovëya tajiyo najetaruca. Sacerdotevi pepo penamatacaitorobinē pijabo matatoyorotsia yacaranata ibopanaxanetonē, mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopana-bojavabelia, itsabelia Jesús cajunuatsi. Nexata sacerdotevi pepo penamatacaitorobinē pijabopanabota, Pedro nanonopeca isoto muxuneneta templobopijipolicíavita.

⁵⁵ Nexata bajarapabo ënëtuatuajëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarë-cuaicuajai. Bajarapamonae nayanijoba.

—¿Jipatsa yapëtane Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiaata bajarapamonae apo caxitajarabi itsaneconi ata Jesús pijaneconi. ⁵⁶ Itsamonae saya penajumetsënëtsilivaisi paeba Jesús yabara. Itsiaata caelivaisi najuapaebi ata, najumejëpaeya apo paebi bajarapamonae.

⁵⁷ Itsamonae nonobapuna. Penajumetsënëtsilivaisi paeba Jesús yabara. Penonobapunaeviyajuvënënë jumaitsi mapacueniaje:

⁵⁸ —Paxanë raja, pamatabëxëyo panubenajë majotaje, pajumetani-ji Jesús pejumaitsijava. Bajaraponë jumaitsi: “Xanë raja xuabianicajë mapatemploboje, jivi pexanaebo. Acueyabi matababita icatsia itsabo veretetsianajë. Jivi apo pexanaebo tsane,” jai maponë Jesúsje, jai penonobapunaeviyajuvënënë.

⁵⁹ Itsiaata daxita bajarapamonae najumejëpaeya apo paebi.

⁶⁰ Nexata jane baja sacerdotevi pepo penamatacaitorobinē nonotapuna bajarapamonae pitabarata. Nexata jumaitsi Jesúsjavabelia:

—¿Apo yapëtaemë tsaja itsalivaisiyo ata nejumecanaviatsinexa? ¿Xaniajai tsabaja pacuenia mapamonae caneconitsiajumaitsi? jai Jesúsjavabelia sacerdotevi pepo penamatacaitorobinē.

⁶¹ Jesús itsiaata moya. Apo jumepitsi cajena. Nexata icatsia sacerdotevi pepo penamatacaitorobinē jumaitsi Jesúsjavabelia:

—¿Xamë tsabaja pepacuene Cristomë, athëbëvetsica Dioso pecaitorobinëtsica jivi necapanepaenexa? ¿Xamë tsaja, Dioso pexënatomë? jai.

⁶² Nexata Jesús jumaitsi bajaraponëjavabelia:

—Jājā, xanë rabaja. Paxamë raja panetaename, Daxitajivi Pematapijinënë, taecaejava Dioso pecujuanenia, daxitajamatabëcuene

pecaējēpaenētsi. Panetaenamenua tanajetarucaejava athēbēvetsica itarē-rēbota, jai Jesús.

⁶³ Bajarapacuenia Jesús pejumaitsijava itsa jumetane, sacerdotevi pepo penamatacaitorobinē penaxatatsijava anaeya titinaxuaba. Bajarapacuenia titinaxuaba pianae panaexae Jesús pejumaitsijava yabara. Nexata sacerdotevi pepo penamatacaitorobinē jumaitsi daxita penacaetuatsivijavabelia:

—Pijacuata rabaja pejumaitsijumeta naneconita. Pematatsēnēa apo namatavenonaetsi itsamonae vajanacatsipaebinxana paneconi yabara maponēje naneconitsiaexanaejitsiatsi. ⁶⁴ Paxamē rabaja pajumetaneme maponēje Dioso apo pejitsipaecuenia pecuaicuaijajava. Tsipaji Dioso bepexēnato nataeya cuaicuaijai. ¿Detsa nexata paxamē pajamatabēitsimē? jai sacerdotevi pepo penamatacaitorobinē daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

⁶⁵ Nexata bajarapamonae yajuvēnēvi Jesús itabarasuabatsi. Bajaraxuacujinae papaēbērēpanata itaxutocētatsi. Pitaxutocētsicujinaetsi itabaratsaquibabeponatsi pecobethaitonēta. Nexata bajarapamonae jumai tsaponae Jesúsjavabelia:

—iVēnējonare ponē caitabaratsaquibabepona! jai tsaponae bajarapamonae.

Bajaraxuacujinae templobopijipolicíavi itabarapacabiauxuabatsi Jesús.

Pacuenia jane baja Pedro nayavajunuaxaina Jesús pijajivitonēcuene yabara pelivaisi

(Mt 26.69-75; Lc 22.56-62; Jn 18.15-18, 25-29)

⁶⁶ Itsa abaxē Jesús sacerdotevi pepo penamatacaitorobinē pijabo enē-tuatuajēalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarajota taeyetatsi petiriva, sacerdotevi pepo penamatacaitorobinē pijabota penacuenebiva. ⁶⁷ Bajarapova Pedro taeyetatsi penanonopecaejavata. Nexata bajarapova naitaxutobabatsia asaēya taenucatsi Pedro. Jumaitsi:

—Xamē ata rabaja naponaponame Jesúsata, Nazaret tomarapijinēta, jaitsi.

⁶⁸ Nexata Pedro itsiata nayavajunuaxaina Jesús pijajivitonēcuene. Nexata Pedro jumaitsi bajarapovajavabelia:

—Jume raja. Apo yapētaenē cajena bajaraponē. Apo yapētaenē pacuenē yabara nejumaitsimē, jai Pedro.

Bajaraxuacujinae Pedro pejonebaupajavaverenajavabelia natixilia. Nexata vacara fiaba. ⁶⁹ Icatsia bajarapova Pedro tanetsi. Nexata pamonae bajarajota nubena, bajarapamonaejavabelia bajarapova jumaitsi:

—Mara ponëje Jesús pijajiviyajuvënënëje, jai bajarapova Pedro yabara.

⁷⁰ Icatsia nexata Pedro jumaitsi:

—Jume raja. Apo yapëtaenë cajena bajaraponë, jai.

Bajaraxuacujinae, icatsia caepatoyocujinae, bajarajota penubenaevi Pedro jumaitsi:

—Xaniajai raeta baja cajena. Xamë Jesús pijajiviyajuvënënëmë. Tsipaji rabaja Galilea nacuapijinëmë. Galilea nacuapijivi pecuaicuaijaicuenia cuaicuaijamë, jaitsi.

⁷¹ Nexata Pedro pejumexaniataenexatsi, ajumesaëya jumaitsi:

—Itsa apo xaniajanë tsipae paxamëjavabelia, nexata Diosojavabelia naneconitsipajë. Apo yapëtaenë cajena ponë yabara panejumaitsimë, jai Pedro.

⁷² Itsa baja Pedro najumevereta bajarapacuenia pejumaitsijava, vacara icatsia fiaba. Nexata bajarajota Pedro najamatabënapitajaraba pacuenia Jesús jumaitsi: “Anijajumebeje vacara pefiabivajënaeya, nayavajunuaxainaename tajajivitonëcuenëmë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejajjavatsi Jesús, Pedro najaaraba. Nexata bajarajota Pedro bitso najamatabëxaina Jesús pejumaitsiyumetsi yabara. Pedro nexata nua.

Pacuenia Jesús nutatsi Pilato pitabarata yabara pelivaisi

(Mt 27.1-2, 11-14; Lc 23.1-5; Jn 18.28-38)

15 ¹ Ajena baja matacabi tsarucaponae, sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nacae-tuata. Icatsia pematatsënëa itsamonae bajarapitsijamatabëcuenevi yajavanacae-tuata penabarëcuaicuaijainexa. Bajaraxuacujinae bajarapamonae Jesús cobecëtsiaya caponaliatsi nacuaevetsinë Pilatojavabelia. ² Nexata Pilato yanijobatsi Jesús.

—¿Xamë tsaja judíovi pepo nevetsinë? jaitsi.

Nexata Jesús jumaitsi Pilatojavabelia:

—Jājā, xanë rabaja pacuenia nejumaitsimë, jai Jesús Pilatojavabelia.

³ Sacerdotevi penama itsamonae bajarapitsijamatabëcuenevi yajtacaitorobivi jumaitsi Pilatojavabelia:

—Jesús raja bitso pibisiacuene exanabiaba, jai.

⁴ Nexata icatsia Pilato yanijobatsi Jesús.

—¿Itsalivaisiyo ata tsaja apo yapëtaemë nejumecanaviatsinexa? ¿Apo jumetaemë mapacuenia pecaneconitsijavaje? jaitsi.

⁵ Itsiata Jesús matavëjëa apo jumepitsi Pilatojavabelia. Bajaraxuata Pilato apo yapëtae pacuenia exanaeijtsia Jesúsjavabelia.

Pacuenia baja Pilato tocopata Jesús pebeyaxuabinexatsi

yabara pelivaisi

(Mt 27.15-31; Lc 23.13-25; Jn 18.38-19.16)

⁶ Nacuaevetsinë Pilato xaina pijacujirucuene. Caevai canacujitsia, pascua fiestamatacabi, Pilato copatabiaba caenë penaneconitsinë

pepitsapaenexa penaneconitsivi pejebabiabibovecua. Pajivi yabara jivi Pilatojavabelia vajēcabiaba, Pilato nexata copatabiaba bajarapajivi pascua fiestamatacabi. Bajarapacuenia Pilato caenē copatabiaba jivi pesivajamatabēcuenē xanepanaenexatsi. ⁷Pamatacabi Jesús naneconitsiaexanatsi, bajarapamatacabi Barrabásvēnēnē jivi pebarēbevi barēnaneconitsiaaponapona penaneconitsivi pejebabiabibota. Barrabás, itsamonaē yajava, barēnabia picaní gobierno pijajivijavabelia. Nexata taicatsi. Naneconitsiaexanejebatsi penaneconitsivi pejebabiabibota. ⁸Nexata jivi pona Pilatojavabelia. Jumaitsi bajarapamonae Pilatojavabelia:

—Pacuenia pascua fiestamatacabi copatabiabame caenē pepitsapaenexa penaneconitsivi pejebabiabibovecua, bajarapacuenia panetocopare caenē pepitsapaenexa penaneconitsivi pejebabiabibovecua, jai bajarapamonae Pilatojavabelia.

⁹Nexata Pilato jumaitsi bajarapamonaejavabelia:

—¿Pajitsipame tsaja patacatocopatsijava pepitsapaenexa Jesús, pajudíovimē pepo papecaevetsinē? jai Pilato.

¹⁰Bajarapacuenia Pilato jumaitsi tsipaji yapētane pajamatabēcuenē yabara sacerdotevi penamatacaitorobivi tocaponarenatsi Jesús. Pilato jamatabēcueneyapētane sacerdotevi penamatacaitorobivi Jesús pecue-neitoyaxaetsi petocaponaejavatsirena. ¹¹Nexata bajarapamonae asaēya vajēca Barrabás pecapitsapaenexatsi. Tsipaji baja cajena sacerdotevi penamatacaitorobivi muxubijiapenetsia jumaitsi jivijavabelia:

—Asaēya pavajēcaename Barrabás pecopatsinexatsi. Nexata Barrabás copatsianatsi pepitsapaenexa penaneconitsivi pejebabiabibovecua. Pētsa pavajēcame Jesús pecopatsinexatsi, jai baja cajena sacerdotevi penamatacaitorobivi jivijavabelia.

¹²Nexata icatsia Pilato yanijoba jivijavabelia:

—¿Detsa nexata xua pajitsipame taexanaenexa maponējavabeliaje: “Judíovitsi pepo vajanacaevetsinē,” paneyabarajainējavabelia? jai Pilato judíovijavabelia Jesús yabara.

¹³Nexata bajarapamonae vavajai pinijijumeta.

—iCruzajavabelia cobematabiabarutsiaexanare! jai Pilatojavabelia.

¹⁴Nexata Pilato jumaitsi bajarapamonaejavabelia:

—¿Detsa pitsineconi yabara nexata cobematabiabarutsiaexanaejitsipajē? jai Pilato Jesús yabara.

Itsiaata bajarapamonae icatsia pinijijumeta vavajai.

—iCruzajavabelia cobematabiabarutsiaexanare! jai tsaponae.

¹⁵Nexata baja Pilato tocopata Barrabás pepitsapaenexa penaneconitsivi pejebabiabibovecua jivi barajamatabēcuenexanepanaeya petaenexatsi. Nexata Pilato pijajivi, vajabitsaēvi, itoroba copiaya Jesús ayaicuenia pejumatitibabexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaēvi pecobematabiabarutsinexatsi cruzajavabelia.

¹⁶Nexata baja vajabitsaëvi Jesús caponaliatsi nacuaevetsinē Pilato pijaboxanetojavabelia. Nexata bajarajota nacaetuata daxita vajabitsaëvi. ¹⁷Bajaraxuacujinae Jesús quenetsiataeya xatatatsi peraënaetsautsaucaejava. Xua nacuaevetsinē banaxatata, bajaraxua xatatatsi benacuaevetsinēcuenia petaenexatsi. Coronacuenia pemataxatatsinexatsi, peejuvitoyoroto tsimataexanatsi. Bajarapatoyoroto Jesús mataxatatatsi. ¹⁸Bajaraxuacujinae quenetsiataeya bajacobaponatsi.

—iBajaco, judíovi pepo pevetsinē! jai tsaponae bajarapamonae Jesúsjavabelia.

¹⁹Bajarapamonae caenē canacujitsia mataconibiaxuabaponatsi naebota. Suabaponatsinua. Beyaiyataeya itajara pematabacabēta tonubenajoneyabiabatsi Jesús pitabarata. ²⁰Jesús quenetsiataeya pecapocaponaecujinaetsi, vejumajonotatsi baja xua xatatatsi, peraënaetsautsaucaejava. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

**Pacuenia jane baja Jesús cruzajavabelia cobematabiabarutatsi
yabara pelivaisi**

(Mt 27.32-44; Lc 23.26-43; Jn 19.17-27)

²¹Alejandrobeje Rufobeje paxa, Simónvënēnē, Cirene tomarapijinē. Nexata Simón najetaruca vayafotusatojavaverena. Nexata vajabitsaëvi Simón junatatsi, pacruzajavabelia Jesús cobematabiabarutatsijitsiatsi, peyavenonaeyacaponaenexa.

²²Caponaliatsi Jesús Gólgotavënë tsutojavabelia. “Gólgota,” itsa jai hebreojumeta, mapajumetaje pejumaitsiijume: “Jivimatasipatsuto,” pejaijume. ²³Bajarajota picani Jesús rajutatsi vinora piapaenexa, pematajërēabira mirravënëjavata, bitso penavixaetaeyaniva pecobematabiabiavatatatsi cruzajavabelia. Itsiata Jesús apo apae. ²⁴Nexata jane baja Jesús vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajarajota canamuxusita beibotoxi. Bajarapacuenia canamuxusita peyapētaenexa ponē pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami.

²⁵Bajayacunuaepatota, a las nueve, Jesús cobematabiabarutatsi cruzajavabelia. ²⁶Bajarajota Jesús pematabocoto matatsënēyo yaquinaruta tablapayota itsamonae ata peyapētaenexa pajamatabēcuenia yabara Jesús cobematabiabarutatsi cruzajavabelia. Jumai tsarutsi peyaquinarutsiitanecruzajavata mapacueniaje: “Mara ponēje judíovi pepo pevetsinēje,” jai tsarutsi Jesús yabara. ²⁷Anijanēbeje penacobetoxotsinēbeje, Jesús yajavacobematabiabarutatsi. Caenē canacujitsia pijacruzata rubatsi. Bajaraponēbeje Jesús pemuxuneneta rutatsibeje. Itsanē Jesús pecujuanenia rutatsi. Itsanē Jesús petsavenonenia rutatsi. ²⁸Bajarapacuenia Jesús

itsa yajavacobematabiabarutatsi penacobetoxotsinēbeje, nexata Jesús tocopiapatatsi pacuenia baja cajena Dioso pejumelivaisibaxutota tajēvelia jumaitsi Jesús yabara. Dioso pejumelivaisibaxutota tajēvelia jumaitsi Jesús yabara mapacueniaje: “Naneconitsiaexanaenatsi bepibisiacuene pexanaenēcuenia,” jai baja cajena tajēvelia Dioso pejumelivaisibaxutota Jesús yabara.

²⁹ Jesús pecobematabiabarutsijavatatsi cruzajavabelia, bajaraxuayo penajetarubenaevi Jesús itaropitsiaya bijataeyabiabatsi. Jumai tsabiabi bajarapamonae:

—Yiara jane maitsimēje. Xamē raja imata jumaitsimē: “Xuabianicajē templobo. Acueyabi matabita icatsia veretetsianajē itsabo,” jamē.

³⁰ Nacapanepare jane baja nijacuata. Cruzajavavetsica runaimica, jai tsa-biabi Jesúsjavabelia bajaraxuayo penajetarubenaevi.

³¹ Bajara pijinia pacuenia sacerdotevi penamatacitorobivi, judíovi pecujarubivi ata, capocaponatsi Jesús. Ēpamonae najumaitsi:

—Maponēje itsamonae yabara jumai tsabiabi: “Capanepaenajē jivi,” jai tsabiabi. Caranata pijacuata penacapanepaenexa, apo caējēpaetsi.

³² Itsa xaniajai pepacuene Cristo, athēbēvetsica Dioso pitorobinētsica jivi pecapanepaenexa, Israel nacuapijivi pepo pevetsinēnexanua, aeconoxae runaenica cruzajavavetsica vajataenexa. Nexata jane baja jumecovēnētsia-natsi Cristonēcuenia, najai bajarapamonae capocaponaeya Jesús yabara.

Ponēbeje ata Jesús yajavacobematabiabarutatsi, bajaraponēbeje ata, Jesús bijataerucatsibeje.

Pacuenia baja Jesús tēpa yabara pelivaisi

(Mt 27.45-56; Lc 23.44-49; Jn 19.28-30)

³³ Jesús baja itsa tēpaejitsia, ajena matonejejitsia, daxita nacuajava aita-quiri tsajuni. Matapania caniviyojavabelia, bejamatabēcuenia a las tres, nacua napebeta icatsia. ³⁴ Nexata icatsia paepatota nacua napebeta, bajarapaepatota pinijicuenia Jesús aējai. Jumaitsi:

—Eloi, Eloi, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsi-jume: “TajaDioso, tajaDioso, ¿detsa xuajitsia baja tajaepato necopata-me?” pejaijume.

³⁵ Nexata itsamonae bajarajota penubenaevi bijiaya jumetane bajarapacuenia Jesús pejumaitsi-ja. Nexata saya jamatabēcuenenavēxaniabiaya jumaitsi bajarapamonae:

—Jica, pajumetaema. Mara ponē junata profeta Elíaspijinēmije, Diosojumepaebinēmi, jai bajarapamonae.

³⁶ Nexata bajarapamonaeyajuvēnēnē piajatuvinorayalia bepijia jabu-taxuaba esponjavēnējava. Bajaraxuacujinae esponjavēnējava naebou-pita cētaruta. Toyotsiatsi picani Jesús petsutsuninexa bajaraxua. Ponē

picani Jesús toyotsiatsi bajaraxua petsutsuninexa, bajaraponë jumaitsi penajuanubenaevijavabelia:

—Bajarapacuenia abaxë copatarutatsi Jesús. Taenatsi Elíaspijinë itsa najetaruca cruzavecuia penutsinexatsitsica Jesús, jai bajaraponë capocaponaeya.

³⁷Jesús icatsia pinijicuenia aëjai. Bajaraxuacujinae jane baja Jesús tēpanajereca. ³⁸Paepatota Jesús tēpanajereca, bajarapaepatota templobo ënëtuatuajëalia peyatuucutarutsipana, ayaipapaëbërëpanaxaneto, titititica tuatuajëareca, athëbëvetsicacujinae irabereca. ³⁹Nexata paepatota Jesús tēpanajereca, vajabitsaëvi pijacapitán Jesús pitabara canacujitsialia nuca. Nexata bajaraponë taenuca Jesús pinijicuenia peaëjaijava. Taenucanua Jesús petēpanajetsijavareca. Nexata vajabitsaëvi pijacapitán jumaitsi:

—Matsaena ponë tēpaje, pepacuene baja rovia Dioso pexënato, jai.

⁴⁰Bajarajota petiriavibitsaëtoxiato tajiyooverena taenubena Jesús petēpaejava. Bajarapapetiriavi tuatuajëta nanubena mapamatabëxëyoje. Itsava Maríavënëva, Magdala tomarapijiva. Itsava Salomévnënëva. Itsava icatsia Maríavënëva. Bajarapova Santiagobeje Josébeje pena. Bajaraponë Santiago, pevëjëato abaxë itsanë Santiagovënëvëcuia. ⁴¹Pamatacabi



(Mr 15.38)

abaxë Jesús ponapona Galilea nacuata, bajarapapetiriavi Jesús pënajina-vanapatsi peyavenonaenexatsi. Papetiriavibitsaëtojavata Maríabana nanu-bena, bajarapapetiriavi ata Maríabana Jesús najuapënaponarena Galilea nacuaverena Jerusalén tomaraberena.

Pacuenia Jesús petëpaenë mëthëtatsi yabara pelivaisi

(Mt 27.57-61; Lc 23.50-56; Jn 19.38-42)

42-43 José Arimatea tomarapijinë, judíovi pevetsinë, peyaiyataenëtsi. Bajaraponë José copiaevetaponapona pecopiapatsijava pamatacabi cae-në Dioso evetsijitsia daxita pijajivi mapanacuataje. Judíovi baja pena-cueraevetsimatacabinexa pevajënaeya pamatacabi, caniviyotsia baja. Bajarapamatacabi judíovi banacuenevereta baja penacuenebijava. Nexata bajarapaepatota José acueneura ata, najamatabësäëta. Nexata lia nacuae-vetsinë Pilatojavabelia. Nexata José vajëta Pilatojavabelia petocopatsine-xatsi Jesús petëpaenë pemëthëtsinexa. 44 Nexata Pilato jamatabëjumaitsi:

—Xaniajai tsamë rabaja Jesús tëpa, jamatabëjai tsipaji abaxë bajayajebi Jesús apo rucae cruzajavabelia pecobematabiabarutsicujinaetsi.

Nexata Pilato junata vajabitsäëvi pijacapitán. Nexata Pilato yanijoba vajabitsäëvi pijacapitánjavabelia, Jesús petëpaecuene Pilato peyapëtaene-xa. 45 Nexata vajabitsäëvi pijacapitán tsipaeba Pilatojavabelia.

—Jesús rabaja capanepaeya tëpa, jai.

Nexata jane baja Pilato José tocopatatsi cruzajavavetsica pepitsi-nexa Jesús petëpaenë. 46 Nexata José comuata pexaniaviriasábana. Bajaraxuacujinae José jane baja cruzajavavetsica pitsica Jesús petëpaenë. Daxitanëreca mataquionaeya matacacëba pexaniaviria piapiasábanapana-ta. Bajaraxuacujinae itsajota cajena José iboitapajanitojavata pinijiibovaju exanaeyaexanabuata petëpaevi pebutaponaenexa, bajarapaibovajualia José buata Jesús petëpaenë. Bajaraxuacujinae pinijiibopanaxaneto José tixirena. Yavajuvëpaacatabuata. 47 María Magdala tomarapijiva, itsava pijinia María, José pena, bajarapovabeje tanebeje itsajota Jesús buatatsi petëpaenë.

Pacuenia Jesús petëpaecujinae icatsia asaë yabara pelivaisi

(Mt 28.1-10; Lc 24.1-12; Jn 20.1-10)

16 ¹ Judíovi baja penacueraevetsimatacabi itsa verevereca, acue-yabi povamaxëto comuata petuxujuvira. Itsava Maríavënëva, Magdala tomarapijiva. Itsava Salomévenëva. Itsava icatsia Maríavënëva. Bajarapova Santiago pena. Bajarapamonae petuxujuvira comuata pepe-rabëexabinexa picani Jesús petëpaenë. ² Nexata baja judíovi penacuerae-vetsimatacabi itsa verevereca, meravia pitsijavata, ajena baja matacabi tsarucaponae, bajarapamonae ponalia Jesús pebuatsiibovajutsijavabelia. ³ Nexata bajarapamonae namutualia najumaitsi tsanajetarubenae:

—¿Jipatsa meta nacatotixitsiana Jesús peyavajuvëpa acatabuatsiibopanaxanetotsi? najai tsanajetarubenae bajarapamonae.

⁴Nexata bajarapamonae itsa imoxoyotabuatapona, naëcobarëcëpalia ibovajujavabelia. Nexata taeyabuata ibopanaxanetomi petixitabuatsijavalia ibovajuvëpavecua. Bajarapaibopana bitso pinijiibopanaxaneto.

⁵Nexata petiriavi itsa joneya Jesús pebuatsiibovajutsijavalia, taeyeta pecujuanenia pevëjëato. Bajaraponë naxatateca piapiajava penioponaejava. Nexata petiriavi najunaviaca. ⁶Nexata pevëjëato jumaitsi petiriavijavabelia:

—Pëtsa panajunaviacame. Paxamë picani pajaitame Jesús, Nazaret tomarapijinë, ponë cobematabiabarutatsi cruzajavabelia. Asaë rabaja ica-tsia bajaraponë petëpaecujinae. Ajibi rabaja tsarucacae majotaje. Pataema jane itsajota picani buatatsi. ⁷Paponare baja. Patsipaebianame pijajivijavabelia, Pedrojavabelia ata. Pajumaitsimë tsane bajarapamonaejavabelia: “Jesús pina panevajënaeyabelia pona Galilea nacuayabelia. Baja pina jotalia pacaxitajarabianame Jesús pacuenia baja pacajumaitsi,” pajamë tsane pijajivijavabelia, jai pevëjëato petiriavijavabelia.

⁸Nexata saya bajarapapetiriavi rëcëpeca Jesús pebuatsiibovajutsivecua. Neconecojai saya pecajunavi. Nexata namutoepatua apo tsipaebi itsajivijavabelia ata. Tsipaji bitso junava.

**Pacuenia Jesús petëpaecujinae, icatsia itsa asaë, tsitanaitajëta María
Magdala tomarapijivajavabelia yabara pelivaisi
(Jn 20.11-18)**

⁹Judíovi baja penacueraevetsimatacabi itsa verevereca, meravia pitsijavata, ajena baja matacabi tsarucaponae, Jesús icatsia asaë petëpaecujinae. Bajarapamatacabi copiata Jesús tsitanaitajëta María, Magdala tomarapijivajavabelia. Bajarapova cajena copiaya Jesús vecuacapsipa siete padovathibeje itsa abaxë Jesús apo beyaxuabitsi. ¹⁰Nexata María, Magdala tomarapijiva, Jesús petsitanaitajëtsicujinaetsi, pona Jesús pijajivijavabelia. Nexata María pevajënae Jesús pijajivi abaxë vënuëyena Jesús. Nexata María itsa pata Jesús pijajivijavabelia, tsipaeba pacuenia María tane Jesús. ¹¹María jumaitsi Jesús pijajivijavabelia:

—Jesús rabaja icatsia asaë petëpaecujinae. Taniji rabaja tajacuata, jai. Itsiata Jesús pijajivi apo jumexaniataetsi María.

**Pacuenia Jesús petëpaecujinae icatsia itsa asaë, tsitanaitajëta
pijajivitonëbejejavabelia yabara pelivaisi
(Lc 24.13-35)**

¹²Jesús pijajivitonëbeje najetarucabeje namutua. Nexata Jesús pijajivitonëbeje namutua penajetarucacajavatabeje, Jesús tsitanaitajëta beitsanëcuenia pijajivitonëbejejavabelia. ¹³Nexata Jesús pijajivitonëbeje itsa tanebeje

Jesús, naviatecabeje. Nexata pacuenia tanebeje Jesús, tsipaebabeje itsamona Jesús pijajivijavabelia. Itsiata bajarapamonae apo jumexaniataetsibeje.

Pacuenia Jesús petēpaecujinae, icatsia itsa asaē, pijajivi itoroba pexanialivaisi jivi petsipaebanajetarubenaenexa daxitanacuanējava yabara pelivaisi

(Mt 28.16-20; Lc 24.36-49; Jn 20.19-23)

¹⁴Bexējavabelia icatsia Jesús tsitanaitajēta pijajivi once ponēbejejavabelia penabanenaejavata mesata. Nexata Jesús pinijicuenia muxujioba



(Mr 16.19)

pijajivi piajamatabëcuenetajaxae. Muxujiobanua apo pejumecovënëtsixae petsipaebijavatsi pamonae tane Jesús icatsia piasaëjava petëpaecujinae.

¹⁵Nexata Jesús jumaitsi pijajivijavabelia:

—Paponare daxitanacuanëjava daxitajivi panetsipaebanajetarubenaenexa pexanialivaisi pecapanepaelivaisinexatsi. ¹⁶Pajivi jumecovënëtsiana bajarapalivaisi, nexata pabautisabianame. Bajarapajivi Diosojavabelia capanepaenatsi. Pajivi apo jumecovënëtsi tsane bajarapalivaisi, daxitamatacabijavabelianexa naneconitsiana Diosojavabelia. ¹⁷Pamonae peneta jumecovënëtsiana bajarapalivaisi, mapacuenia exanavanapaenaje. Tavënëta jivivecua capitsapaponaena dovathi. Itsaviriajumetanua, apo penatsipaebijumemi ata, jemata natsipaebiana. ¹⁸Bajarapamonae jomo pecobeta pitsi ata tsane, apae atanua tsane jivi petëpaeyaexanaera, itsiata apo tēpae tsane. Bajarapamonae itsa nacobebuatsiana piavitanejivi pematatsënëvereca, pejayatsijivi jamatejema tsane piavitanejavavecua, jai Jesús pijajivijavabelia.

**Pacuenia Jesús petëpaecujinae, icatsia itsa asaë, naviata baja
athëbëabetsia yabara pelivaisi
(Lc 24.50-53)**

¹⁹Vajatuxanenë Jesús livaisi petsipaebicujinae pijajivijavabelia, Dioso baja pesaëta catsiatsi athëbëabetsia. Nexata athëbëtatsia Jesús eca Dioso pecujuanenia penajuaevetsinexabeje daxitacuene. ²⁰Nexata jane baja Jesús pijajivi daxitanacuanëjava jivi tsipaebanajetarubena bajarapapexanialivaisi. Nexata daxita pamonae jumetaeyabiabatsi, jumecovënëtabiabatsi pexaniajailivaisi petsipaebicuene. Tsipaji Jesús pijajivi jamatabëcuene-yavenonabiaba Jesús pijajivi pinijicuene pexanaenexa jivijavabelia livaisi petsipaebabiabijavata.